

Tuhun Nyoo Cha Tyaa San Lucas

**Nu sacuhun ra Lucas noo
tuhun chi ra Teófilo**

1¹⁻³Cha chitón yoho Tata Teófilo, vatyí cha cuaha ñáyivi nducu ñu cuhva ta tyaa ñu nuu tutu tuhun cha cuví nu nyicú ndi. Tyaa ñu tari maa cuhva nacatyí ñáyivi chi yo, ñáyivi cha nyehe ta cahán tuhun ra Jesús nya quívi xihna ri. Ta vityin tahán tucu chi chi yuhu tyi sacote tuhun ra chuun. Vatyí cha yahá sacuahí ta nyehe vahi tandíhi nya nu quichahá. Ta vityin ñañi ñañi ri cuatyai tuhun ra. ⁴Vatyí coto vahun tyi ndicha cha sacoto ñáyivi chuun.

**Nu sacoto noo ángel chi ra
Zacarías ama cucacu ra Juan
ra sacondutyá chi ñáyivi**

⁵Quívi cha cuví ra Herodes rey nicahnu Judea, chiyo noo tata sutu, chinañi ra Zacarías. Ta yihí ra cuenda ityi tata sutu cha chinañi Abías. Ta ñasihí ra chinañi ña Elisabet. Ta vachi ñu tata ra Aarón, ra chiyo ta cha naha. ⁶Ta ñahri maa cuatyí ñu iyó nuu Nyoo. Vatyí vaha xaan quichahá ñu tuhun cahán Nyoo. Ta yori maa cuví tyaa cuatyí siquí ñu. ⁷Soco yori maa sehe ñu chicoo. Vatyí cu Elisabet,

ña cuví coo sehe ña. Ta siin ri ninduvi tahan ñu chahnu xaan ñu.

⁸Ta noo quívi tahan chi ityi cuenda ra Zacarías cha sacuvi ra tyiño nuu Nyoo. ⁹Tari cuhva costumbre maa tata sutu, nyehe ra nya ra tahan chi nyatu chi. Ta tahan chi nyatu chi ra Zacarías cha quíhvi ra chichi vehe ñuhu, vatyí cahmi ra cutu. ¹⁰Cha ni ri ca cha ñohó ra chahmí ra cutu cuan, cuaha xaan ñáyivi chicán tahvi ñu ityi chata vehe. ¹¹Yucuan ta tuví noo ángel cuenda Nyoo nuu ra Zacarías. Ta chicuinanyaá ra chiyo vaha arta nu chahmí ra cutu. ¹²Ta cha nanyehe ra Zacarías chi ángel cuan, iyo xaan cuñí ra. Ta yuhví xaan ra. ¹³Soco ángel cuan catyí ra chi ra:

—Zacarías, ma yuhvun. Vatyí Nyoo chiñí ra tuhun cahún. Ta ñasihun cu Elisabet cucoo noo sehe ña. Ta Juan cusacunañun chi cue. ¹⁴Sií xaan cucuvi chuun. Ta cuaha xaan ñu, cusí cuñi quívi cacu cue. ¹⁵Vatyí sehun, cahnu xaan ra cucuví ra nuu Nyoo. Ma coho ra vinu ta ni ndixi. Ta ñihi xaan cuquíhi Tatyí li Nyoo chi ra nyata cumañi cacu ra ta tandíhi tyembu cha coo ra. ¹⁶Ta cuaha xaan ñáyivi

Israel cunyicon chi Sutu yo Nyoo cha cuenda ra. ¹⁷Ta cucoo tunyee iñi Nyoo chi ra. Ta cuquihi xaan Tatyí Ii Nyoo chi ra. Vatyí cucuvi ra tari ra Elías, ra cuví profeta Nyoo ta cha naha. Ta cusanicoo vaha ra chi ñáyivi chihin sehe ñu. Ta cusañaha ra chi ñáyivi quiñi iyó na quichaha ñu tuhun cahán Nyoo. Tyicuan caa cusanduvaha ra chi ñáyivi ta cuatu tuhva ñu chi Nyoo —catyí ángel chi ra Zacarías.

¹⁸Ta ndaca tuhun ra Zacarías chi ángel, ta catyí ra:

—¿Yoso caa ta cote noo cha ndicha vaha? Vatyí yuhu cha chahnu xain. Ta ñasihi cha chahnu xaan ña ñandihí —catyí ra.

¹⁹Ta ángel cuan quichaha catyí ra: —Yuhu Gabriel nañí. Ta chiqué tyiño Nyoo. Maa ra tachí chii vatyí cahin nuun ta sacote tuhun vaha ihya chuun. ²⁰Ta vityin nduñihun. Vatyí ña chinó iñun tuhun cahín. Ta ma cuví cahun nyacua nya chino cava tuhun cahin chuhun —catyí ángel cuan chi ra.

²¹Ta ñáyivi cha nyatú chi ra Zacarías ityí chata vehe, iyo xaan cuñi ñu ñáá tuhun cha cucuee xaan ra chichi vehe ñuhu. ²²Soco cuhva cha quita ra Zacarías, ña cuví maa cahan ra chihin ñu. Tyicuan ta tuví iñi ñu vatyí iyó cha nyehé ra chichi vehe ñuhu cuan. Ta quichaha cahan ra chihin ñu chihin seña ri. Vatyí ña cuví cahan ra.

²³Ta quívi cha ndihí tyiño saha ra Zacarías vehe ñuhu cuan, ta cuanuhu ra nya vehe ra. ²⁴Ta cha yahá tuhun cuan chicohon sehe ñasihi ra, cu Elisabet. Ta ña quita maa ña chata vehe cha ni ri ca

cha ohon yoo. Ta chicá xiñi ña: ²⁵“Tyehe caa sacuví Sutu Mañi yuhu chihin, tacuhva ma cahan cuehe ca ñáyivi chii”, chicá xiñi ña.

Nu sacoto noo ángel chi cu María vatyí cucacu ra Jesús

²⁶Nu cu iñu yoo cha ñohó sehe cu Elisabet, tachí Nyoo chi ángel Gabriel ñuu Nazaret ityí Galilea. ²⁷Vatyí cucahan ra chihin noo ñaha tyivaa cha nañí María. Ta cha nyañaa cha tandaha ña chihin noo ra nañí José. Ta ra José cuan vachi ra tata rey David. ²⁸Ta tuví ángel cuan nu nyaá ña. Ta quichaha catyí ra chi ña:

—Nocumi chuun, María. Ñihun tumañi iñi nuu Nyoo. Vatyí maa ra nyaá chuhun. Ta chi yoho nasocó xaan ca Nyoo nuu tandihí ca ñusihi —catyí ángel cuan chi ña.

²⁹Ta cuhva cha chiñi ña cha cahán ra, iyo xaan cuñi ña tuhun cahán ra. Ta ndichí xiñi ña: “¿Ñáá tuhun cha chaha ra ihya nocumi chi yo tyicuan caa?” ndichí xiñi ña.

³⁰Ta catyí ángel cuan: —Ma yuhvun, María, vatyí ñihún tumañi iñi nuu Nyoo. ³¹Vatyí cuacohon noo sehun. Ta sacunañun Jesús chi ra. ³²Cahnu xaan ra cuacuvi ra. Ta cunañi ra Sehe Nyoo ra cuvi nuu. Ta Nyoo Sutu Mañi yo cusacuvi ra rey chi ra. Tari cuví ra David, ra vachi ra tata. ³³Vatyí cunyaca ñaha ra chi ñáyivi Israel tandihí maa tyembu. Ta ma ndihí maa cha cunyaca ñaha ra —catyí ángel cuan chi ña.

³⁴Yucuan ta ndaca tuhun cu María chi ángel, ta catyí ña: —¿Yoso caa cuahan tuhun ihya? Vatyí yuhu, ta coo ca yíi.

³⁵Ta nacahan ángel ta catyí ra:

—Maa Tatyí Ii Nyoo cuquichi sicun. Ta tunyee iñi Nyoo cahnu cuquichi tari noo vico ta casi chi sicun. Yucuan chaha ra ii cha cucacu cunañi ra Sehe Nyoo.

³⁶Tyicuan caa tucu cu Elisabet ñáyivi chuun. Cucacu noo sehe ña vasi cha chahnu ña. Ñaha cha catyí ñáyivi vatyí ña cuví maa coo sehe. Soco vityin cha ñohó sehe ña. Cha iñu yoo ñohó. ³⁷Vatyí Nyoo ñahri cha ma cuví sacuví ra —catyí ángel chí ña.

³⁸Ta quichaha catyí cu María:

—Yuhu cuví musu Sutu yo Nyoo. Na sacuví maa ra yoso cuhva catyún —catyí ña.

Yucuan ta cuahan ángel cuan.

Cuahan cu María cuanyehe ña chi cu Elisabet

³⁹Cuví noo quívi cuan, numi xaan cuahan cu María noo ñuu ityi Judea nu maa ri maa yucu cuví. ⁴⁰Ta quihvi ña chichi vehe ra Zacarías. Ta chaha ña nocumi chi cu Elisabet. ⁴¹Cuhva cha chiñi cu Elisabet tuhun cahān cu María, natyoñō cha lee cha ñohó chichi ña. Ta chitu ña chihin Tatyí Ii Nyoo.

⁴²Ta chaa nacahan ña, ta catyí ña:

—Nyoo sahá ra tumañi iñi chuun cha nuu tandihi ñusihi. Ta nasocó ra chi sehun. ⁴³¿Ta yóó ñaha cuví yuhu? Vatyí quichi sihi Sutu Mañi yo quichi nyehe ña nu nyai.

⁴⁴Cuhva cha chiñi tuhun cahān, ta natyoñō sehi cha ñohó chichi. Vatyí sii xaan cuví chi ra. ⁴⁵Ta sii xaan cuñí añimon vatyí chinó iñun cha cuacuvi tuhun cahān Nyoo chuhun —catyí cu Elisabet.

⁴⁶Ta quichaha catyí cu María:

—Sacahní chi Nyoo chihin tandihi añime.

⁴⁷Ta sii xaan cuví chii vatyí sacacú Nyoo añime.

⁴⁸Vatyí cuví yuhu noo ñaha ndahvi ta Nyoo tiin cuenda ra chii. Ta vityin tandihi quívi cucatyí ñáyivi chii vatyí cahnu xaan tumañi iñi ñihí.

⁴⁹Vatyí Nyoo, cahnu xaan cuví ra. Ta cahnu cha sacuví ra chihin. Ta ii xaan sivi ra.

⁵⁰Ta tyicuan ri ndahvi cuñí ra chi tandihi ñáyivi cha sahá ñáyivi chi ra.

⁵¹Cahnu xaan cha sacuví ra chihin tunyee iñi iyó chi ra. Sanaá ra cuhva chicá xiñi ñu cahnu sahá chi.

⁵²Sanocueé ra chi ñu sacahnú chii. Ta ra cha ña cahnu sahá chii, sacucahnú ra chi ra.

⁵³Chahá Nyoo cha vaha chi ñu cuñí coto cha vaha, ñu chitó vatyí chiñuhú Nyoo chi. Soco ñu tyayii cha cuñí maa tyi ñahri chiñuhu chi, chihin nundaha nu ndii ñu, sacuhún ra chi ñu.

⁵⁴Tyinyeé ra chi ñáyivi Israel cha cuví musu ra. Ta ña naá iñi ra chi ñu. Nyehé ndahvi ra chi ñu.

⁵⁵Tari cuhva catyí Nyoo chi ra Abraham, sutu yo, ta chi sehe ra, tyicuan caa sacuví Nyoo tyicuan ri maa —catyí cu María.

⁵⁶Ta cu María ndoo ña chihin cu Elisabet uñi yoo. Ta cha yaha uñi yoo cuan ta cuanuhu ña nya vehe ña.

Quivi cacū ra Juan, ra cha sacondutya

⁵⁷Ta chaq̄ quivi cha cuacacu cha lee sehe cu Elisabet. Cacū cue ta raȳii cuví cue. ⁵⁸Ta cha chiñi ñáyivi cha nyicú yatyin yuvehe ña ta ñáyivi chi ña cha tyicuan caa, sii xaan cuví chi ñu. Ta sii xaan cuñí tucu maa ña. Vatyí vaha xaan cha sacuvi Nyoo chihin ña. ⁵⁹Ta nu cu uña quivi cha cacū cue, chahān ñu chihin cue vehe ñuhu. Vatyí cuhva cuenda ñu chi cue chi Nyoo. Ta saha ñu circuncidar chi cue tari cuhva iyó maa ñu. Chahnya ñu chiin ñii cue nu cuví cue raȳii. Ta cuñí ñu sacunañi ñu Zacarías chi cue tari sutu cue. ⁶⁰Soco sihi cue catyí ña:

—Ma cuvi. Juan, cunañi cue.

⁶¹Ta quichaha catyí ñu:

—¿Ñáá tuhun sacunañun Juan chi cue? Yori ñáyivi chi ndo cha nañi tyicuan caa —catyí ñu.

⁶²Ta quichaha ndaca tuhun ñu chihin seña ri chi sutu cue. Vatyí coto ñu ñáá sivi cuñí ra cha cunañi cue. ⁶³Ta chican sutu cue noo vitu, ta nuu vitu cuan tyaa ra tyehe caa: “Juan cuví sivi cue”, tyaa ra.

Ta tandihi maa ñu cuan iyo xaan cuñi ñu tuhun cuan. ⁶⁴Ta nacañan ra Zacarías caa cuhva ri cuan. Ta quichaha sacahnu ra chi Nyoo.

⁶⁵Tandihí maa ñu iyó yatyin ri yuvehe ñu, yuhví xaan ñu tuhun ihya. Ta tandihí maa ñáyivi cha iyó yucu ityi Judea cuan nacatyí ñu chi tahan ñu tuhun ihya. ⁶⁶Ta tandihí maa ñáyivi cha chitó tuhun cuan, ndichí xiñi ñu, ta ndaca tuhun ñu chi tahan ñu:

—¿Yóó ra cuví cha lee cuan? —
catyí ñu.

Vatyí ndicha, Nyoo nasoco xaan ra chi cue.

Nu sacahnú ra Zacarías chi Nyoo

⁶⁷Sutu cue, ra Zacarías, tyitú ra chihin Tatyí Ii Nyoo. Tyicuan ta quichaha cahan ra tuhun cha chahá Nyoo chi ra, ta catyí ra:

⁶⁸—Cahnu xaan ra cuví Sutu
Mañi yo Nyoo cuenda yo ñu
Israel.

Vatyí quichí ra nu nyicú yo, cha cuví yo ñáyivi chi ra.

Ta sacacū ra chi yo.

⁶⁹Ta chaha ra noo ra cahnu chi yo, cha cusacacu chi yo.

Tata ra David ra cha sacuvi tyiño nuu Nyoo vachi ra.

⁷⁰Tyicuan caa cahan Nyoo chihin yuhu ra cacuví profeta cuenda ra ta cha naha.

⁷¹Vatyí tyicuan caa cusacacu ra chi yo ndaha ra xaan iñi chi yo, ra cha tasi cuñí nyehé chi yo.

⁷²Tyicuan caa cundahvi cuñí nyehé ra chi ñáyivi chi yo ta cha naha.

Ta ma sanaa ra iñi ra tuhun cahan ra.

⁷³Ican ihya tuhun cahan Nyoo chihin ra Abraham sutu yo.

⁷⁴Catyí ra vatyí cusacacu ra chi yo ndaha ra xaan iñi chi yo.

Vatyí ma yuhvi ca yo sacahnu yo chi ra.

⁷⁵Ta maa ra sanducachi ra iyó yo nuu ra.

Ta vaha coo yo nuu ra tandihí quivi cha cuacoo yo ñáyivi —
catyí ra Zacarías.

⁷⁶Ta catyí ra Zacarías chi cha lee cuan tyehe caa:

—Ta yoho sehi, profeta Nyoo cahnu cucatyí ñáyivi chuun.

Vatyí cuhun ityi nuu Sutu Mañi yo. ta cucahun tuhun ra chihin ñáyivi vatyí cha cuñí quichi ra.

⁷⁷ Ta cusacoton chi ñáyivi vatyí cunasaha Nyoo tucahnu iñi cuatyí ñu.

Ta tyucuan caa ta cacu añima ñu.

⁷⁸ Vatyí Sutu yo Nyoo cuñí ra chi yo. Ta cundahvi cuñí ra chi yo.

Ta saquichí ra noo ra tyinyeé chi yo. Tari noo ñuhu ñanyii cucuvi ra.

⁷⁹ Vatyí chihin cha sañahá ra chi yo sacundichín ra nu nyicú yo nu ñaa iñi cha catyi cuatyí yo.

Ta cusañaha ra chi yo yoso caa quihvi yo ityi vaha —catyí ra Zacarías.

⁸⁰ Ta cha luhlu cuan cuahan chahnu ra. Nyee cuñí ra chihin Tatyí Ii Nyoo. Ta chicoq ra noo chiqui ndii nyacua nya quivi cha chicohon nuu ñáyivi Israel chi ra.

Quivi cacu ra Jesús

(Mt. 1.18-25)

2 Ta quivi cuan iyó noo ra nyacá ñaha, nañi ra Augusto. Tachi ra tyiño natyaa ra sivi tandihi ñáyivi nicahnu ñuhu ñayivi. ² Ta quivi cuan ra Cirenio cuví ra ra nyacá ñaha tandihi ñuu ityi Siria. ³ Ta tahán chi cuhun tandihi ñáyivi nya ñuu ñu. Vatyí cuhva ñu sivi ñu yucuan. ⁴ Yucuan chaha quita ra José ñuu Nazaret ityi Galilea. Ta chahan ra ityi Judea ñuu Belén nu cacu ra David. Yucuan chahan ra vatyí tata ra David vachi ra.

⁵ Ta chahan ra chi cuhva ra sivi ra chihin cu María. Ta cha cuñí tandaha ña chihin ra. Ta ñohó sehe ña. ⁶ Ta chiquitahan chaa quivi cha cacu sehe ña cha ni ri ca cha ñohó ñu Belén cuan. ⁷ Ta yucuan cacu sehe nuu ña. Ta natyihí ña chi cue chichi sahma. Ta nandacun ña chi cue chichi noo nu chachí quiti. Vatyí cuaha xaan ñáyivi chaq coyo ñuu cuan. Ta ña nuña ca ni minoo vehe nu cunyaa ñu.

Nu cahán ángel chihin ra sahá cumi mbee

⁸ Yatyin ñuu Belén cuan nyicú suhva ra casahá cumi mbee sana ra cha cha cuaa cuan. ⁹ Ta sana iñi ra ta tuví noo ángel Nyoo. Ta cha ndichin Nyoo Sutu Mañi yo ndundichin nicachico ri nu canyicú ra. Ta nayuhví xaan ra. ¹⁰ Ta quichaha cahán ángel cuan, ta catyí ra tyehe caa:

—Ma yuhvi ndo. Vatyí cuacatyí mai noo tuhun chi ndo. Noo tuhun cha sii xaan cuacuvi chi tandihi ñáyivi. ¹¹ Vatyí vityin cacu ra sacacú añima ndo ñuu ra David. Noo ra cuví Cristo, ra cuví Sutu Mañi yo. ¹² Ta ihya cuví seña chahi chi ndo, cunyehe ndo chi cha lee cuan, siqui noo cue sahma. Catuvi cue chichi noo nu chachí quiti —catyí ángel chi ra casahá cumi mbee cuan.

¹³ Ta caa cuhva ri cuan chaq coyo cuaha xaan ca ángel casacahnú ra chi Nyoo, ta cacatyí ra:

¹⁴ Sacahnu yo chi Nyoo nu nyaá ra gloria.

Ta ñáyivi iyó siqui ñuhu ñayivi cha ñihi tumañi iñi ra, na coo

taxi añima ñu, catyí angel cuan.

¹⁵Yucuan ta cuanuhū coyo ángel cuan gloria. Tyicuan ta ra casahá cumi mbee quichahā catyí ra chi ra tahan ra:

—Cōho ndo Belén. Cunyehe yo ñáá cha cuvī. Vatyí maa Sutu yo Nyoo sacoto chi yo.

¹⁶Tyicuan ta numi xaan cuahan coyo ra Belén. Ta nañihī ra chi cue chihin cu María ta ra José. Ta catuví cue noo nu chachí quiti. ¹⁷Ta yahā cha canyehe ra chi cue, ta canacatyí ra chi ñu ñáá ndihī tuhun cahān ángel chihin ra cuenda cha lee cuan. ¹⁸Ta tandihī ñu chihī tuhun cahān ra, iyo xaan cuñī ñu. ¹⁹Soco cu María ta cuhva chicá ri xihī ña tuhun cuan. ²⁰Ta ra sahá cumi chi mbee cuan cuanuhū coyo ra. Ta casacahnú ra chi Nyoo cha cuenda cha cachiñī ra ta canyehe ra. Vatyí chino cava tandihī cha catyí angel chi ra.

Nu cuacuhva cuenda ñu chi ra Jesús chi Nyoo vehe ñuhu cahnu

²¹Ta nu cu uña quivi, sahā ñu circuncidar chi cue, tari cuhva tuhva maa ñu. Ta sacunañī ñu chi cue, Jesús. Suri maa sivi cha catyí ángel chi cu María quivi cha cumañi ca cohon sehe ña.

²²Ta cha yahā quivi cha tahan chi vatyí ndundhī ñu nuu Nyoo, tari cuhva catyí maa ley Nyoo cha tyaa ra Moisés, tyicuan ta cuahan ñu Jerusalén. Vatyí cuacuhva cuenda ñu chi cue chi Nyoo. ²³Sacuvī ñu tyicuan caa vatyí iin caa maa catyí ley tyehe caa: “Tandihī rayi cha cuvī sehe nuu ñu, cucuhva cuenda

ñu chi Nyoo”, catyí ley cuan. ²⁴Ta chahan ñu chicuhva cuenda ñu uvi tahan quiti tari cuhva catyí maa ley Sutu yo Nyoo nu catyí chi tyehe caa: “Cuhva ndo uvi tahan cucu o uvi tahan ndicuiya”, catyí ley cuan.

²⁵Ta quivi cuan iyó noo ra ñuu Jerusalén cha nañī Simeón. Ta cuvī ra noo ra vaha, ra sacahnú chi Nyoo. Ta nyatú tuhva ra nya quivi cusacacu Nyoo chi ñáyivi Israel. Ta yihī ra Tatyí Ii Nyoo. ²⁶Ta sacoto Tatyí Ii Nyoo chi ra vatyí ma cúvi ra cha ni ri ca cha ta nyehe ca ra chi ra sacacú chi ñu Israel, ra cuvī Cristo, ra cha cusaquichi Sutu yo Nyoo. ²⁷Ta ra cuan chahan ra vehe ñuhu cuhva catyí maa Tatyí Ii Nyoo chi ra. Cuhva cuan chahan tucu sutu ta sihi cha lee cuan chinyaca ñu chi cue vehe ñuhu cahnu, vatyí sacuvi ñu tari cuhva catyí maa ley. ²⁸Ta quehen ra Simeón chi ra Jesús. Ta tyihī sucun ndaha ra chi ra. Ta quichahā sacahnu ra chi Nyoo. Ta catyí ra:

²⁹—Sutu Mañi yuhu. Na cúvi mai vityin chihin cha vaha.

Vatyí cha sacuvun cha catyūn chi yuhu cha cuvī sehun.

³⁰Vatyí cha nyehī chihin nui chi ra cusacacu chi ndi.

³¹Vatyí sañahun chi ra nuu tandihī ñáyivi.

³²Cha catyí ra ta cucahnu ñáyivi Israel nuu inga ñáyivi.

Ta ican ra cuvī ra cha sacundichín añima tandihī inga ñáyivi cha ñima ñu Israel cuvī. Vatyí cusacuvi ra na cutuñi iñi ñu tuhun Nyoo —catyí ra Simeón.

³³Ta ra José chihin sihi ra Jesús, iyo xaan cuñī ñu cha cahān

ra Simeón tuhun cha lee cuan.

³⁴Yucuan ta chican tahvi ra Simeón chi Nyoo chaha ñu. Ta catyí ra chi cu María sihi ra Jesús:

—Nyehe chi cha lee ihya. Vatyí cuaha xaan ñáyivi cuchino iñi ñu chi ra quivi coto ñu tuhun ra, ta cucacu añima ñu. Soco cuaha ñu ma chino iñi ñu chi ra, ta cunaa ñu. Ta cucahan ñu chi ra. ³⁵Ta cha tyicuan caa cusanatuvi ra cha caa añima noo noo ñáyivi. Soco cha cuenda yoho, María. tari cha uhvi cha yahá sava noo tyicaa añima ñáyivi, tyicuan caa cha uhvi cunyehún cha catyí cha lee ihya — catyí ra Simeón.

³⁶Ta yucuan ñohó tucu noo ñaha cha cuví profeta Nyoo. Ta cha chahnu xaan ña. Nañí ña Ana. Ta sehe ra Fanuel noo ra vachi tata ra Aser cuví chi ña. Luhlu xaan ña ta tandaha ña, ta ucha ri cuiya chiyo ña chihin yíi ña ta chihí ri ra. ³⁷Ta cha cumi xico cumi cuiya chihí yíi ña. Ta vehe ñuhu cahnu ña quitá ña, vatyí ndiyaca ta ñiyaca chicán tahvi ña chi Nyoo. Ta iyó cuhva cha ña chachí ña cha ni ri ca cha chicán tahvi ña. ³⁸Ta cuhva cha ñohó ra José ta cu María chihin cha lee, chaq ña nu canyicú ñu. Ta nacuhva ña tyahvi nyoo chi Nyoo. Ta quichahq cahan ña tuhun ra Jesús chihin tandíhi ñáyivi cha nyatú tuhva cha quita ñuu Jerusalén chichi ndaha ra ñuu Roma.

Nu cuanuhu ñu nya Nazaret

³⁹Cha yahq cha sacuvi ñu tandíhi maa yoso caa catyí ley Sutu yo Nyoo, ta cuanuhu ñu nya Galilea nya ñuu ñu nu nañí Nazaret. ⁴⁰Ta

ra Jesús cuahan chahnu ca ra. Ta cuahan ndunyee ca ra ta cuahan chicoo ca cha chiñi tuñi Nyoo. Vatyí nasoco Nyoo chi ra.

Nu ñohó ra Jesús chichi vehe ñuhu

⁴¹Ra José chihin sihi ra Jesús ndíhi cuiya ri tuhva ñu chahán nya Jerusalén cha vico pascua. ⁴²Ta quivi ndíhi ra Jesús uchi uvi cuiya, chahan tandíhi ñu Jerusalén tari tuhvá maa ñu chahán cha vico. ⁴³Ta quivi ndíhi vico ta cuandichi ñu, ta ra Jesús ndoo ra Jerusalén. Ta ña saha ñu cuenda. ⁴⁴Cuñí maa ñu vatyí cuandichi ra mahñu nu tuvi ñáyivi cuan. Yucuan chaha ñahri chicá iñi ñu chicá ityi ñu noo quivi. Tyicuan ta nanducu ñu chi ra chichi nu tuvi ñáyivi cuan, ⁴⁵ta ña nañihí ñu chi ra. Tyicuan ta cuanuhu chata ñu cuananducu ñu chi ra nya Jerusalén.

⁴⁶Cha yahq cha uñi quivi ta nañihí ñu chi ra chichi vehe ñuhu cahnu cuan. Nyaá ra chihin ra sacuahá cuenda ley vehe ñuhu. Ta tyasohó ra cuan tuhun cahán ra. Ta ndacá tuhun ra tuhun chi ra. ⁴⁷Ta tandíhi ñu chiñí tuhun cahán ra, iyo xaan cuñí ñu chihin cha chiñi tuñi ra, ta chihin tuhun cha nacahán ra. ⁴⁸Cuhva cha nanyehé sutu ra ta sihi ra chi ra, iyo xaan cuñí ñu. Ta sihi ra catyí ña chi ra:

—Sehe luhli. ¿Ñáá tuhun cha sacuvun chi ndi tyehe caa? Sutun ta yuhu chiq xaan iñi ndi ta nanducu xaan ndi chuun —catyí ña.

⁴⁹Tyicuan ta catyí ra Jesús: —¿Ñáá tuhun cha nanducu ndo chii? ¿Atu ña chito ndo vatyí niñi cuñí chi cha cahin tuhun Suti chihin ñáyivi? —catyí ra.

⁵⁰Soco ña cutuñí iñi ñu tuhun cahán ra.

⁵¹Tyicuan ta cuanuhü ra chihin ñu nya Nazaret. Ta quichahá ra tuhun cahán ñu. Ta sihi ra naquehen vaha ña tandíhi tuhun ihya chichi aña ña. ⁵²Yucuan cuví nu cuacuahnu ca ra Jesús. Ta cuahan chaa ca cha chiñi tuñi xiñi ra. Ta sii xaan cuví chi Nyoo chihin ra ta ñáyivi ñandíhi.

Ra Juan, ra sacondutya, cahán ra tuhun Nyoo nuu ñáyivi

(Mt. 3.1-12; Mr. 1.1-8; Jn. 1.19-28)

3 Nu ndíhi chahun cuiya cha cuví ra Tiberio rey cahnu ñuu Roma, ta ityi Judea nyacá ñaha ra Poncio Pilato. Ta ra Herodes nyacá ñaha ra Galilea. Ta yañi ra, ra Felipe nyacá ñaha ra Iturea chihin Traconite. Ta ra Lisantias nyacá ñaha ra Abilinia quívi cuan. ²Ta ra Anás chihin ra Caifás, ican ra cuví ra ra cacuví nuu chi tandíhi tata sutu. Ta quívi cuan cahán Nyoo chihin ra Juan sehe ra Zacarías noo nu chiqui ndíi. ³Ta ra Juan chicá noo ra tandíhi ñuu cha nyaá yatyin ri nu nyaá noo yuvi cahnu cha nañí Jordán cahán ra tuhun Nyoo chihin ñáyivi. Ta catyí ra chi ñu na ndu uvi iñi ñu cuatyí ñu ta na condutya ñu. Tyicuan caa ta Nyoo saha ra tucahnu iñi chi ñu, catyí ra. ⁴Tyehe caa cuví tari cuhva catyí nu libru cha tyaq ra Isaías profeta Nyoo ta cha naha. Ta catyí ra:

Chiñí yo cha caná chaa noo ra noo nu chiqui ndíi, ta catyí ra:

“Tari sanduvahá ndo noo ityi, tyicuan caa sanduvaha ndo

añima ndo vatyí cuaquichi Sutu Mañi yo.

Nuña ndo noo ityi ndoo chi ra na quihvi ra aña ndo.

⁵Tari cha sanandutú ndo noo ticoho, ta tari sandundaá ndo noo yucu cahnu, ta tari sandundoó ndo cha yacua, ta tari sanduvií ndo nu quiñi caa, tyicuan caa ñasama ndo cuhva iyó ndo.

⁶Tyicuan caa ta tandíhi ñáyivi ta nyehe ñu vatyí Nyoo chaha ra cha cacú aña ñu.”

⁷Ta tyicuan caa cahán ra Juan chihin ñáyivi. Yucuan ta cuhva cha chiñí ñu tuhun cahán ra, ta catyí ñu chi ra vatyí na sacondutya ra chi ñu. Yucuan ta quichaha catyí ra chi ñu: —iNyoho tari noo tata coo xaan cuví ndo! ¿Yóo cha sañaha chi ndo vatyí chihin cha condutya ri ndo ta ma tachi tuñi ca Nyoo chi ndo?

⁸Ñasama ndo cuhva iyó ndo, na nyehe ñáyivi vatyí cha ndu uvi iñi ndo cuatyí ndo. Ta ma catyí ndo vatyí tata ra Abraham vachi ndo. Vatyí nyacua nya noo yuu ihya, Nyoo cuví sananduvi ra noo ñáyivi chi ra Abraham. ⁹Tari yutun cha ña chahá chiti, tyicuan caa cuví ndo. Vatyí ña sacuví ndo tari cuhva cuñí Nyoo. Ta yutun cha ña chaha chiti, cahnya ñáyivi chi tun. Ta cahmi ñu chi tun. Tyicuan caa tucu nyoho cha cuñí cuiri cahun ndo nu cayu ñuhu —catyí ra Juan.

¹⁰Yucuan ta quichaha ndaca tuhun ñáyivi chi ra:

—¿Yoso caa sacuvi ndi, cuñí yoho? —catyí ñu.

¹¹Ta nacahan ra Juan, ta catyí ra:
—Yóó ra cha iyó uvi tahan camisa, tahán chi cuhva ra noo chi ra cha ñahri chi. Ta yóó ñu cha iyó cha cachi, tahán chi cuhva ñu cha cachi ñu ñahri chi —catyí ra.

¹²Ta chaá coyo tucu suhva ra catavá xuhun cuenda gobiernu Roma, ta cuñí ra condutya ra. Ta candacá tuhun ra chi ra Juan:
—Maestro, ¿yoso caa sacuvi tucu nyuhu? —catyí ra.

¹³Ta catyí ra Juan chi ra:
—Tari cuhva catyí ley tava ndo xuhun. Ta ma tava ndo cuaha ca.

¹⁴Yucuan ta quichaha candacá tuhun tucu suhva sindaro chi ra, ta catyí ra:

—Ta nyuhu tucu, ¿yoso caa sacuvi ndi? —catyí ra.

Ta nacahan ra Juan ta catyí ra:
—Ma tinyaa ca ndo cha chii ñáyivi. Ta ma tyanaha ndo chi ñu. Ma tyaa ndo cuatyí siquí ñu tatu ñahri cuatyí ñu. Ta ndoó ndo vaha yoso cuhva yahvi ndo —catyí ra Juan.

¹⁵Iyo cuñí ñáyivi tuhun cahán ra Juan. Ta cuñí ñu tyi ican ra cuví Cristo, ra cha sacacú chi yo. ¹⁶Soco ra Juan catyí ra chi tandihí ñu:

—Cha ndicha vatyi sacondutyé chi ndo chihin ndutya. Soco cha yaha yuhu cuhin cuquichi inga ra cusacondutya chi ndo chihin Tatyí Ii Nyoo ta chihin ñuhu. Iyó ca tunyee iñi chi maa ra, ta ñima ca yuhu. Vatyi ña nañé cha cuví musu ra ta niri cha ndachi ñii xityin ndichan ra. ¹⁷Tari noo ra cha cuanaquehen vaha ñiñi, ta natyihí vaha ra chichi yaca. Ta cahmi ra mihin. Tyicuan caa cuví maa Sutu

Mañi yo chihin yo. Tatu chinó iñi yo chi ra, cunaquehen vaha ra chi yo, ta cunyicu yo chihin ra. Soco tatu ña chinó iñi yo chi ra cutyihí ra chi yo anyaya nu cayu ñuhu cha ma ndahva ca maa —catyí ra Juan.

¹⁸Ta tyehe caa cahán ra Juan chihin ñu. Ta cuaha xaan ca tuhun cahan ra nuu ñu tyi cuaquichi Sehe Nyoo ta cua sacacu ra chi yo. ¹⁹Ta cahán ra Juan chi ra Herodes cha cuenda tandihí cuii cha ña vaha nyacuví ra. Vatyi naquehen ra chi cu Herodías, ñasihi ra Felipe yañi ra. Ta cuaha ca cha ña vaha nyacuví ra. ²⁰Soco ra Herodes tahán chi cha tyasohó ra tuhun ihya soco ña cuñí ra. Nu ndihí tuhun tyihí ndihí ra chi ra Juan vehe caa.

Quivi cua condutya ra Jesucristo

(Mt. 3.13-17; Mr. 1.9-11)

²¹Cumañi ca cha cohon ra Juan vehe caa sacondutya ra chi tandihí ñáyivi. Ta sacondutya tucu ra chi ra Jesús. Ta cha ni ri ca cha chicán tahvi ra Jesús chi Nyoo ta nuña andivi. ²²Ta nyehe ra Tatyí Ii Nyoo quichí siquí ra tari noo paloma. Ta tyacu noo ndusu andivi cha catyí tyehe caa:

—Yoho cuvún Sehi cha cuñí. Ta sii xaan cuñí chuhun —catyí ndusu cuan.

Ñáyivi vachi ra Jesucristo tata

(Mt. 1.1-17)

²³Oco uchi cuiya ra Jesús ta quichaha saha tyiño ra tyiño Nyoo. Ta tandihí ñáyivi cuñí maa ñu vatyi sehe ra José cuví chi ra. Ta ra José, sehe ra Elí cuví chi ra. ²⁴Ta ra Elí,

sehe ra Matat cuví chi ra. Ta ra Matat, sehe ra Leví cuví chi ra. Ta ra Leví, sehe ra Melqui cuví chi ra. Ta ra Melqui, sehe ra Jana cuví chi ra. Ta ra Jana, sehe ra José cuví chi ra. ²⁵Ta ra José, sehe ra Matatías cuví chi ra. Ta ra Matatías, sehe ra Amós cuví chi ra. Ta ra Amós sehe ra Nahum cuví chi ra. Ta ra Nahum, sehe ra Esli cuví chi ra. Ta ra Esli, sehe ra Nagai cuví chi ra. ²⁶Ta ra Nagai, sehe ra Maat cuví chi ra. Ta ra Maat, sehe ra Matatías cuví chi ra. Ta ra Matatías sehe ra Semei cuví chi ra. Ta ra Semei, sehe ra José cuví chi ra. Ta ra José, sehe ra Judá cuví chi ra. ²⁷Ta ra Judá, sehe ra Joana cuví chi ra. Ta ra Joana sehe ra Resa cuví chi ra. Ta ra Resa, sehe ra Zorobabel cuví chi ra. Ta ra Zorobabel, sehe ra Salatiel cuví chi ra. Ta ra Salatiel, sehe ra Neri cuví chi ra. ²⁸Ta ra Neri, sehe ra Melqui cuví chi ra. Ta ra Melqui, sehe ra Adi cuví chi ra. Ta ra Adi, sehe ra Cosam cuví chi ra. Ta ra Cosam, sehe ra Elmodam cuví chi ra. Ta ra Elmodam, sehe ra Er cuví chi ra. ²⁹Ta ra Er, sehe ra Josué, cuví chi ra. Ta ra Josué, sehe ra Eliezer cuví chi ra. Ta ra Eliezer, sehe ra Jorim cuví chi ra. Ta ra Jorim, sehe ra Matat cuví chi ra. ³⁰Ta ra Matat, sehe ra Leví cuví chi ra. Ta ra Leví, sehe ra Simeón cuví chi ra. Ta ra Simeón, sehe ra Judá cuví chi ra. Ta ra Judá, sehe ra José cuví chi ra. Ta ra José sehe ra Jonán cuví chi ra. Ta ra Jonán, sehe ra Eliaquim cuví chi ra. ³¹Ta ra Eliaquim, sehe ra Melea, cuví chi ra. Ta ra Melea, sehe ra Mainán cuví chi ra. Ta ra Mainán, sehe ra Matata cuví chi ra. Ta ra Matata, sehe ra Natán cuví chi ra. ³²Ta ra Natán, sehe ra David, cuví chi ra. Ta ra

David, sehe ra Isaí cuví chi ra. Ta ra Isaí, sehe ra Obed cuví chi ra. Ta ra Obed, sehe ra Booz cuví chi ra. Ta ra Booz, sehe ra Salmón cuví chi ra. Ta ra Salmón, sehe ra Naasón cuví chi ra. ³³Ta ra Naasón, sehe ra Aminadab cuví chi ra. Ta ra Aminadab, sehe ra Aram cuví chi ra. Ta ra Aram, sehe ra Esrom cuví chi ra. Ta ra Esrom, sehe ra Fares cuví chi ra. Ta ra Fares, sehe ra Judá cuví chi ra. ³⁴Ta ra Judá, sehe ra Jacob cuví chi ra. Ta ra Jacob, sehe ra Isaac cuví chi ra. Ta ra Isaac, sehe ra Abraham cuví chi ra. Ta ra Abraham sehe ra Taré cuví chi ra. Ta ra Taré, sehe ra Nacor cuví chi ra. ³⁵Ta ra Nacor, sehe ra Serug cuví chi ra. Ta ra Serug, sehe ra Ragau cuví chi ra. Ta ra Ragau, sehe ra Peleg cuví chi ra. Ta ra Peleg, sehe ra Heber cuví chi ra. Ta ra Heber, sehe ra Sala cuví chi ra. ³⁶Ta ra Sala, sehe ra Cainán cuví chi ra. Ta ra Cainán, sehe ra Arfaxad cuví chi ra. Ta ra Arfaxad, sehe ra Sem cuví chi ra. Ta ra Sem, sehe ra Noé cuví chi ra. Ta ra Noé, sehe ra Lamec cuví chi ra. ³⁷Ta ra Lamec, sehe ra Matusalén cuví chi ra. Ta ra Matusalén sehe ra Enoc cuví chi ra. Ta ra Enoc, sehe ra Jared cuví chi ra. Ta ra Jared, sehe ra Mahalaleel cuví chi ra. Ta ra Mahalaleel, sehe ra Cainán cuví chi ra. ³⁸Ta ra Cainán, sehe ra Enós cuví chi ra. Ta ra Enós, sehe ra Set cuví chi ra. Ta ra Set, sehe ra Adán cuví chi ra. Ta ra Adán, sehe Nyoo cuví chi ra.

Nu nducú nyehe cuihna chi ra Jesús

(Mt. 4.1-11; Mr. 1.12-13)

4 Ta chitú ra Jesús chihin Tatyí li Nyoo cha yahá condutya ra. Yucuan ta quitá ra nu cuví yuvi

cahnu Jordán ta cuanuhu ra. Ta Tatyí li Nyoo chinyaca chi ra noo nu chiqui ndii. ²Yucuan chinyaa ra uvi xico quivi. Ta nducú nyehe cuihna chi ra. Ña chachi maa ra quivi cuan. Yaha cuan ta quichaha chisoco ra. ³Yucuan ta quichaha catyí cuihna chi ra:

—Tatu ndicha cha Sehe Nyoo cuví chuun, catyí chi yuu cha catuví ihya, na nanduví pan.

⁴Ta ra Jesús nacahan ra, ta catyí ra:

—Catyí tuhun Nyoo tyi ñima chihin cha cachi ri ñáyivi ta conyito ñu. Soco conyitó tucu añima ñu chihin tandihi tuhun cahán Nyoo —catyí ra Jesús chi cuihna.

⁵Yucuan ta quehen cuihna chi ra Jesús. Ta cuahan ra chihin ra noo nu sucun ca. Ta numi ri sañaha ra tandihi nu nyacá ñaha ñáyivi siqui ñuhu ñáyivi. ⁶Ta cuihna catyí ra chi ra Jesús:

—Ndaha yuhu nyaá tandihi ñáyivi ihya. Vatyí chaha Nyoo cha cunyaca ñahi tandihi ihya siqui ñuhu ñáyivi. Ta cuví cuhve yóo chi cuñí mai cuhve. ⁷Cuhve tandihi ñáyivi cuan chuun tatu yoho ta cuiñi chitun nui, ta sacahnnun chii —catyí cuihna cuan chi ra Jesús.

⁸Soco ra Jesús catyí ra chi cuihna:

—Çanyaha chuun nui, cuihna. Vatyí nyaá tuhun cahán Nyoo ta catyí chi tyehe caa: “Noo ri chi maa Nyoo sacahnu yo. Ta iin ri chi maa ra quichaha yo.”

⁹Yaha cuan ta quehen tucu cuihna cuan chi ra Jesús. Ta chinyaca ra chi ra nya ñuu

Jerusalén. Ta sandaa ra chi ra xiñi vehe ñuhu cahnu. Ta quichaha catyí ra chi ra Jesús:

—Tatu ndicha cha Sehe Nyoo cuví chuun, sandupehla nyacua nya nu ñuhú. ¹⁰Vatyí nyaá nu catyí chi nu tutu Nyoo tyehe caa:

Nyoo cusaquichi ra ángel, quichi saha cuenda chuun.

¹¹Cunaquehen ra chuun chihin ndaha ra. Ta ma cuhva ra cha taxin chahun chihin yuu —catyí ra chi ra.

¹²Tyicuan ta nacahan ra Jesús, ta catyí ra:

—Soco catyí tucu nu tutu Nyoo tyehe caa: “Ma nducu nyehun chi Sutu Mañi yo Nyoo”, —catyí ra.

¹³Ta cuihna ña cuví sandahvi ñaha ra chi ra Jesús. Ta cuahan ra suhva quivi.

Nu quichaha ra Jesús cahan ra tuhun Nyoo chihin ñáyivi

(Mt. 4.12-17; Mr. 1.14-15)

¹⁴Cha yaha tuhun cuan, ta nachaa ra ityi Galilea. Ta tyitú ra yihí chihin tunyee iñi Tatyí li Nyoo. Ta cahán ñáyivi tuhun ra tandihi ri ityi. ¹⁵Ta sañahá ra chi ñáyivi nu cuví vehe ñuhu tandihi ri ñuu. Ta tandihi ñu sacahnú ñu chi ra.

Nu nyaá ra Jesús Nazaret ñuu nu chahnú ra

(Mt. 13.53-58; Mr. 6.1-6)

¹⁶Tyicuan ta nachaa ra Jesús nya Nazaret, ñuu nu chahnú ra. Ta noo quivi nyitatú ñáyivi, ta quihvi ra chichi vehe ñuhu, tari tuhva maa ra. Ta chicunanyaá ra vatyí cua sacuaha ra tuhun Nyoo. ¹⁷Ta chaha ñu noo libru Nyoo chi ra cha tyaa

ra Isaías ra profeta Nyoo ta cha naha. Ta cuhva cha nuña ra, nañihí ra noo nu catyí tyehe caa. Ta quichaha sacuaha ra:

¹⁸Nyaá Tatyí Ii Nyoo chihin vatyí maa ra tachí chii.

Vatyí nacachí ra chii vatyí sañahi tuhun vaha ra chi tandihí ñáyivi ndahvi.

Tachí ra chii vatyí sanduvahi chi ñu uhvi añima.

Tachí ra chii vatyí sacote tuhun ra chi ñu nyaá ndaha ra ña vaha, vatyí cusacacu Nyoo chi ñu.

Tachí ra chii vatyí sanyehi chi ñáyivi cuaa.

Ta sacote chi ñu nyehe tindoho vatyí cucacu ñu.

¹⁹Ta sacote chi ñu vatyí cha chaá quívi cha chahá Nyoo tumañi ñi chi ñu.

²⁰Ndihí sacuaha ra ta nacasi ra nu libru cuan. Ta nacuhva ra chi noo ra cha nyaá vehe ñuhu cuan. Ta chicunyaá ra. Yucuan ta tandihí ñáyivi cha nyicú cuan ndoq ñu nyehe ñu chi ra. ²¹Yucuan ta quichaha catyí ra chi ñu:

—Vityin quívi ihya chinó cava tuhun cha nyaá nu libru cha sacuahí nuu ndo —catyí ra Jesús chi ñu.

²²Tandihí ñu, vaha cahán ñu tuhun ra Jesús. Ta iyo cuñí ñu tuhun cha cahán ra vatyí vaha xaan cha cahán ra. Ta quichaha ndaca tuhun ñu chi tahan ñu:

—¿Atu ñima ra ihya cuví sehe ra José?

²³Ta quichaha catyí ra Jesús chi ñu:

—Chité cha nacacá ñi ndo. Vatyí tyehe caa cua catyí ndo chii: “Tatu

ra sanduvahá cuvún, sanduvaha xihna ca chi maun. Tandihí cha chiñi ndi cha sacuvun ñuu Capernaum. Sacuvi tucu ñuu maun vityin.”

²⁴Ta catyí tucu ra Jesús:

—Cha ndicha vatyí ni noo ra profeta Nyoo, ta ña quichaha ñáyivi ñuu ra chi ra. ²⁵Ta cha ndicha catyí chi ndo vatyí cuaha xaan ñu chihí yíi chiyo Israel ihya cuiya cha chica noo ra Elías. Ta cuiya cuan ña coon savi uñi cuiya sisava. Ta cuaha xaan tama chiyo. ²⁶Soco ña tachí Nyoo chi ra Elías vatyí tyinyee ra chi ni noo ñu chihí yíi Israel cuan. Soco tachí Nyoo chi ra nu nyaá noo ñaha chihí yíi ñuu Sarepta cha nyaá yatyin ñuu Sidón.

²⁷Ta tyicuan caa tucu cuaha ra yihí cuehe cha tyahyu coño chi chiyo Israel quívi chica noo ra Eliseo, profeta Nyoo. Soco ña nduvahá ni noo ra Israel cuiya cuan. Minoos ri ra Naamán ra ñuu Siria nduvahá —catyí ra Jesús.

²⁸Ta cha chiñi ñáyivi nyicú vehe ñuhu cuan tuhun cuan, cuxaan xaan tandihí cuii ñu. ²⁹Ta nducuita ñu. Ta tiñ ñu chi ra Jesús. Tavá ñu chi ra xiñi noo yucu nya yuhu ñuu, vatyí tuchi ñu chi ra yucuan.

³⁰Soco ra Jesús yahá ri ra mahñu ñu ta cuahan ra.

Noo ra cha yihí tatyí ña vaha chi
(Mr. 1.21-28)

³¹Ta cuahan ra Jesús Capernaum cha nyaa Galilea quívi nyitatu ñáyivi. Ta quichaha sañaha ra chi ñáyivi. ³²Ta iyo cuñí ñu tuhun cahán ra. Vatyí ñihí cahán ra tari noo ra iyó vaha ityi chi cha cahán.

³³Ta chichi vehe ñuhu cuan nyaá noo ra cha yihí tatyí ña vaha chí. Ta quichaha canachaa ra, ta catyí ra:

³⁴—Saña chi ndi, yoho Jesús ra ñuu Nazaret. ¿Ñáá tuhun cha tyihun chuun chihin ndi? ¿Atu vachi sanaun chi ndi? Yuhu, ñohó nui chuun. Ta chité vatyí Sehe Nyoo cuví chuun —catyí tatyí ña vaha cuan sacahan chi chi ra cuan.

³⁵Ta cahan ra Jesús chihin tatyí ña vaha cuan, ta catyí ra:
—Taxi ri. Saña chi ra ndahvi chiña —catyí ra.

Tyicuan ta tatyí ña vaha cuan sanduva chi ra cuan nu ñuhú. Ta quitá tatyí cuan chi ra ta cuahan. Ta ñahri ca sacuvi chi chi ra ndahvi cuan. ³⁶Tandihí ñáyivi nayuhvi ñu. Ta quichaha catyí ñu chi tahan ñu:
—¿Ñáá túhun cuví ihya? Ra Jesús ihya chihin cha iyó ityi chi ra ta chihin tunyee iñi ta tachi ra chí tatyí ña vaha cuan na quita. Ta quichaha chi nu cahán ra —catyí ñu.

³⁷Ta tandihí ri ityi cahán ñáyivi tuhun ra Jesús.

Nu sanduvahá ra Jesús chi maha tyiso ra Simón Pedro

(Mt. 8.14-15; Mr. 1.29-31)

³⁸Ta quitá ra Jesús chichi vehe ñuhu cuan. Ta chaq ra vehe ra Simón. Ta tyiso ra Simón cuhví ña chihin cahñi. Ta quichaha cahán ñu chihin ra Jesús cha cuenda ña. ³⁹Ta nanyehe noo ra nu catuví ña. Ta quichaha catyí ra chí cahñi cuan vatyí na quita. Ta caa cuhva ri cuan ta quita cahñi cuan chí ña. Ta nducuita ri ña. Ta quichaha tyiñuhu ña chí ra.

Cuaha xaan ñu cuhví sanduvahá ra Jesús

(Mt. 8.16-17; Mr. 1.32-34)

⁴⁰Ta cuhva cha quee ñanyii, tandihí maa ñu cha cumí chí ñu cuhví tandihí nuu cuehe, chinyaca ñu chí ra Jesús. Ta tyiso ra ndaha ra siqui noo noo ñu. Ta tyicuan caa ta sanduvahá ra chí ñu. ⁴¹Ta chichi cha tandihí ñu yihí ñu cha yihí tatyí ña vaha chí, ta quitá chí. Ta suri cana chaa chí cuahan coyo chí, ta catyí chí:

—Yoho Sehe Nyoo cuví chuun — catyí chí.

Soco ña chahá ca ra Jesús cha cahan chí. Vatyí chitó chí vatyí ra Cristo, ra cha saquichí Nyoo cuví ra.

Nu cahán ra Jesús tuhun Nyoo nuu tandihí cuii ñáyivi ñuu cha iyó Galilea

(Mr. 1.35-39)

⁴²Cundichin cuan ta quitá ra Jesús ñuu cuan. Ta cuahan ra noo nu taxi ri iyó. Soco ñáyivi nanducu ñu chí ra. Ta chaq ñu nya nu ñohó ra. Ta ña cuñi ñu cha cuhun ra.

⁴³Soco catyí ra Jesús chí ñu:

—Cumañi sacote chí ñáyivi inga ñuu tuhun vaha yoso caa nyacá ñaha Nyoo aña ñu. Vatyí yucuan chaha vachi siqui ñuhu ñáyivi.

⁴⁴Ta tyicuan caa chicá noo ra Jesús cahán ra tuhun Nyoo vehe ñuhu ityi Galilea.

Nu chahá ra Jesús noo nyatu cha ñihi ra cuaha xaan tiyaca

(Mt. 4.18-22; Mr. 1.16-20)

5 Noo quivi nyaá ra Jesús yuhu miñi nu cuví Genesaret. Ta chaq coyo cuaha xaan ñáyivi, vatyí cuñi ñu cuiñi ñu tuhun Nyoo. Ta

tihin xaan ñohó ra Jesús mahñu ñu. ²Ta nanyehé ra uvi tahan canoa yatyin ri yuhu miñi cuan. Yori ñohó chichi. Vatyí cha quita coyo ra catiín tiyaca cuan. Ta cha quichaha canacatya ra yuhva ra. ³Yucuan ta quihvi ra Jesús chichi noo canoa cuan. Ta canoa cuan chi ra Simón cuví. Ta catyí ra chi ra vatyí na tyandaha ra suhva ca cahun nya mahñu ca cuan. Tyicuan ta chicunyaá ra Jesús chichi canoa cuan. Ta quichaha sañaha ra chi ñáyivi. ⁴Cuhva cha ndihí cahan ra, catyí ra chi ra Simón:

—Sacuhun canoa nya nu cama ca ndutya cuan. Ta tuchi ndo yuhva vatyí tiin ndo tiyaca —catyí ra Jesús chi ra.

⁵Ta nacahan ra Simón ta catyí ra: —Maestro, cha saha tyiño xaan ndi ñiyaca maa ta ni noo tiyaca ña ñihí ndi. Soco tatu maun catyí, cuatuchi tucu ndi yuhva —catyí ra Simón.

⁶Cuhva cha cacañi ra yuhva cuan, cuaha xaan tiyaca ñihí ra. Ta nyacua tahnya yuhva ra chihin cha vee ti. ⁷Tyicuan ta cachaha ra seña chi ra tahan ra, ra cha canyicú chichi inga canoa cuan, na quichi coyo ra ta tyinyee ra chi ra. Yucuan ta chaá coyo ra cuan. Ta casacutu ra ninduvi canoa cuan chihin tiyaca. Ta nyacua cuñí nyee canoa cuan cha tyitu yihí tiyaca.

⁸Cha nanyehé ra Simón Pedro cha tyicuan caa, ta chicuñi chiti ra nuu ra Jesús. Ta catyí ra chi ra:

—Cuachiyo chuun nui, Sutu Mañi yuhu, vatyí yuhu ra iyó cuatyí cuví —catyí ra.

⁹Vatyí ra Simón iyo xaan cuñi ra chihin tandihi ra canyicu chihin

ra. Vatyí cuaha xaan tiyaca catiín ra. ¹⁰Tyicuan caa tucu ra tahan ra Simón: ra Jacobo chihin ra Juan, sehe ra Zebedeo, iyo xaan cacuñi ra. Ta catyí ra Jesús chi ra Simón:

—Ma iyo xaan cuñun. Vatyí vityin ta nu cuahan ca chi quivi, ma tiin con tiyaca. Soco cunducun ñáyivi, tavon chi ñu nu quiñi caa na quihvi ñu cuenda Nyoo —catyí ra Jesús chi ra Simón.

¹¹Yucuan ta casacunuhu ra canoa nya ñuhu ityi. Ta casandoq ra tandihi cha iyó chi ra nyacua nya tiyaca cha tiin ra. Ta cuahan ra chihin ra Jesús.

Nu sanduvaha ra Jesús chi noo ra tyahyu coño

(Mt. 8.1-4; Mr. 1.40-45)

¹²Noo quivi ñohó ra Jesús noo ñuu nu iyo noo ra cuhvi. Ta tyahyu xaan coño ra. Ta cha nanyehé ra chi ra Jesús, ta chicuñi chiti ra nuu ra. Ta nacañinoo ra xiñi ra nya nu ñuhu. Ta chacu ndahvi ra nuu ra, ta catyí ra:

—Sutu Mañi yuhu, tu yoho ta cuñun, cuví sanduvahun chii —catyí ra.

¹³Tyicuan ta tyiso ra Jesús ndaha ra siqui ra. Ta catyí ra:

—Cuñí sanduvahi chuun. Ta na nduvahun vityin ri —catyí ra Jesús chi ra.

Ta caa cuhva ri cuan ta nduvaha ra cuan. ¹⁴Tyicuan ta catyí ra Jesús chi ra:

—Ma nacatyun chi ñáyivi. Noo ri catyí chuun, cuhan nu nyaá tata sutu. Ta sañahun chuun chi ra. Ta cuhva cuendon cha tahan chi cuhvon tari cuhva catyí nu ley ra

Moisés tacuhva coto ñáyivi vatyí nduvahun —catyí ra Jesús chi ra.

¹⁵Vasi ña cuñí ra cha coto ñáyivi, soco cuaha ca ñáyivi ñihi ñu tuhun ra. Ta cuaha xaan ñáyivi ndu iin ri ñu, vatyí cuñí ñu cuñí ñu tuhun cahán ra. Ta cuñí xaan ñu nduvaha ñu. ¹⁶Soco ra Jesús, canyaha canyaha ri ra nu iyó ñáyivi. Ta cuahan ra noo nu yori ñáyivi iyó. Ta yucuan chican tahvi ra chi Nyoo.

Nu sanduvahá ra Jesús chi noo ra cuhví cha ña cuví nacanda

(Mt. 9.1-8; Mr. 2.1-12)

¹⁷Noo quivi sañahá ra Jesús chi ñáyivi. Ta chicunycú suhva ra fariseo, ra quichahá xaan ley vehe ñuhu cha tyaá ra Moisés ta cha naha. Ta nyicú tucu suhva ra sacuahá cuenda ley vehe ñuhu cuan. Quichí coyo ra ñuu cha iyó Galilea, ta ñuu Jerusalén, ta tandíhi ca ñuu cha iyó Judea. Ta iyó xaan tunyee iñi Nyoo chi ra Jesús, tacuhva vatyí sanduvaha ra chi ñu cuhví.

¹⁸Yucuan ta chaá coyo ra canyisó chihin noo chito chi noo ra ña cuví nacanda. Ta cuñí ra quíhvi ra chichi vehe ta cacun ra chi ra nuu ra Jesús.

¹⁹Soco ña cuví quíhvi ra vatyí tuvi xaan ñáyivi. Tyicuan ta candaá ra ityi xiñi vehe. Ta sacuachiyó ra suhva tyiyo. Tyicuan ta sanoó ra chi ra cuhví cuan maa maa nuu ra Jesús mahñu nu tuvi ñáyivi cuan.

²⁰Yucuan cuví nu nyehe ra Jesús vatyí cachinó xaan iñi ra chi ra. Ta quichaha catyí ra chi ra cuan:

—Xaa, cha chicoó ticahnu iñi tandíhi cuatyun —catyí ra Jesús.

²¹Tyicuan ta ra casacuahá cuenda ley vehe ñuhu chihin ra fariseo

quichaha nacuaan iñi ra: “¿Yóó ra cuví ra ihya? Vatyí cuñí maa ra vatyí cuví saha ra ticahnu iñi cuatyi yo. Noo ri maa Nyoo cuví saha ra ticahnu iñi cuatyi yo”, ndichi xiñi ra.

²²Soco ra Jesús chitó ra tuhun chicá xiñi ra. Ta quichaha catyí ra chi ra:

—¿Ñáá tuhun chicá xiñi ndo tyehe caa? ²³⁻²⁴¿Ñáá cha yii ca catyí yo? ¿Atu yii ca catyí yo: “Cuatyun cha yaha ndachi”, o yii ca catyí yo chi noo ñáyivi: “Ndícuita ta cacon”? Soco vityin cua sañahi chi ndo vatyí iyó ityi chii cha sahi ticahnu iñi cuatyi. Vatyí yuhu Rayii cha quichi nya gloria cuví. Ta vityin cua sanduvahi chi ra ña cuví caca ihya —catyí ra Jesús.

Tyicuan ta quichaha catyí ra chi ra cha catuví cuan:

—Catyí chuun, ndícuita. Naquehen chiton ta cuanuhu nya vehun.

²⁵Ta caa cuhva ri cuan nducuitá ra cha cuhví cuan, ta naquehen ra chito ra. Ta cuanuhu ra vehe ra, surí sacahnú ra chi Nyoo. ²⁶Tandíhi ñáyivi iyo xaan cuñí ñu. Ta yuhví xaan ñu. Ta sacahnú ñu chi Nyoo, ta catyí ñu:

—Vityin ndicha nyehé yo minoo tuhun cha iyo caa —catyí ñu.

Nu caná ra Jesús chi ra Leví

(Mt. 9.9-13; Mr. 2.13-17)

²⁷Yaha cuan ta quitá ra Jesús vehe cuan. Ta nanyehé ra chi noo ra cha tavá xuhun cuenda gobiernu ñuu Roma. Ta nañí ra Leví. Ta nyaá ra nu tyiyahví ñáyivi. Ta catyí ra Jesús chi ra:

—Coho chihin —catyí ra.

²⁸Tyicuan ta nducuita ra Leví. Ta sandoo ra tandihí cha iyó chi ra. Ta cuahan ra chata ra Jesús.

²⁹Tyicuan ta savaha ra Leví noo vico cahnu vehe ra cuenda ra Jesús. Ta cuaha vavaha ra catavá xuhun cuenda gobiernu ñuu Roma canyicú ra mesa. Ta canyicú tucu inga ñáyivi. ³⁰Soco ra fariseo chihin ra sacuahá ley vehe ñuhu quichaha cahan nyaa ra chi ra cachicá noo chihin ra Jesús ta catyí ra:

—¿Ñáá tuhun chachí ndo ta chihí ndo chihin ra catavá xuhun ta chihin ra cahnu cuatyí? —catyí ra.

³¹Ta ra Jesús nacahan ra, ta catyí ra:

—Ña chiñuhú doctor chi ra iyó vaha. Chi ra cuhví, yucuan ra chiñuhú doctor chi. ³²Yuhu ña vachi tyinyei chi ñu vaha sahá chi, soco vachi tyinyei chi ñu chitó vatyí iyó cuatyí, vatyí tacuhva nasama ñu cuhva iyó ñu —catyí ra Jesús chi ra.

Nu sañahá ra Jesús vatyí cha yaha canyaha ra chi ñu nyicón chi ra, cusavaha ñu ayuno

(Mt. 9.14-15; Mr. 2.18-20)

³³Tyicuan ta quichaha candaca tuhun ra chi ra Jesús, ta catyí ra:

—Ra canyicón chi ra Juan savahá ra ayuno, ña cachachí ra ta nanducú ra chi Nyoo, ta tyicuan caa tucu ra fariseo. Soco ra cachicá noo chihin yoho, ndi quívi maa chachi ra ta chihi ra. ¿Ñáá tuhun? —catyí ra.

³⁴Ta nacahan ra Jesús, ta catyí ra:

—¿Atu cuví cha ma cuhva ndo cachi ñu canyicu vico tandaha tatu

nyaá ra cha cua tandaha chihin ñu? Ma cuvi. Vatyí sii cuñí ñu, ta cuñí ñu cachi ñu. ³⁵Soco cuhaa quívi cuachiyo ra tandaha cuan nu nyicú ñu. Yucuan ndicha quívi, ta cusaha ñu ayunar.

Nu sañahá ra Jesús vatyí ña nacachi tahan tuhun chahnu cha iyó ñáyivi chihin tuhun chaa cha sañahá ra

(Mt. 9.16-17; Mr. 2.21-22)

³⁶Tyicuan ta cahan ra Jesús noo cuhva chihin ñu, ta catyí ra:

—Yori cahnya noo sahma chaa, ta chihin cuan naquicu ñu noo sahma chahnu. Vatyí tatu sacuvi ñu tyicuan caa, cundiýi sahma chaa cuan. Ta siin ri ma cuhva chi chihin sahma chahnu cuan. ³⁷Ta tyicuan caa tucu ma cuvi tyihi ñáyivi vinu chaa chichi ñii chahnu. Vatyí cutahnya ñii cuan chihin vinu chaa cuan. Ta tiví vinu cuan ta tiví ñii chahnu cuan ñandihí. ³⁸Yucuan chaha tahán chi tyihi yo vinu chaa chichi ñii chaa. Vatyí tyicuan ta ninduvi ta saha cuenda chi tahan. ³⁹Ta yori ñu chihi vinu chahnu, ta cuñí ñu coho ñu cha chaa. Vatyí catyí ñu, vaha ca vinu chahnu. Cuñí ca ñu vinu chahnu cuan vatyí ican cuan cuví costumbre cha iyó maa ñu.

Tohon ra cachicá noo chihin ra Jesús yoco trigu quívi nyitatu ñáyivi

(Mt. 12.1-8; Mr. 2.23-28)

6 Noo quívi cha nyitatu ñáyivi, yahá ra Jesús mahñu cha tachi ñu. Ta ra cachicá noo chihin ra catohón ra yoco trigu. Ta casacoyó ra chihin ndaha ra. Ta cachachí ra chiti cuan. ²Tyicuan ta catyí suhva ra fariseo chi ra:

—¿Ñáá tuhun cha sacuví ndo noo tyiño cha ña tahán chi sacuvi yo quívi nyitatu yo?

³Ta nacahañ ra Jesús, ta catyí ra:

—¿Atu ta sacuaha ca ndo cha sacuví ra David chihin ra tahan ra quívi cha chisoco ra? ⁴Quihví ra chichi vehe Nyoo. Ta quehen ra pan cha chacun ñáyivi nuu Nyoo. Ta chachí ra. Ta chahá ra chi ra candihí chihin ra. Ta maa ri maa tata sutu tahán chi cachi pan cuan —catyí ra Jesús.

⁵Yucuan ta catyí tucu ra Jesús:

—Yuhu cuví Rayíi cha quichí nya gloria. Ta iyó ityi chii vatyí catyí chi noo noo ndo ñáá cha sacuvi ndo quívi nyitatu yo —catyí ra.

**Nu sanduvahá ra Jesús chi noo ra
cha ityi ndaha**

(Mt. 12.9-14; Mr. 3.1-6)

⁶Inga quívi cha nyitatu ñáyivi, quíhvi ra Jesús chichi vehe ñuhu. Ta quichaha sañaha ra chi ñáyivi. Ta yucuan nanyehé ra chi noo ra cha na ityi chiyo ndaha vaha. ⁷Ta ra casacuaha cuenda ley chihin ra fariseo, canducú nyehe ra chi ra Jesús, tatu sanduvaha ra chi ra cuhví cuan quívi nyitatu ñu. Tyicuan caa ta cuvi tyaa ra cuatyí siquí ra. ⁸Soco ra Jesús chitó ra tuhun chicá xiñi ra. Ta catyí ra chi ra cha ityi ndaha cuan:

—Nducuíta. Ta cuinanyaun mahñu ihya.

Tyicuan ta ra cha ityi ndaha cuan nducuitá ra. Ta chicunanyaá ra mahñu. ⁹Tyicuan ta catyí ra Jesús chi ra canyicú cuan:

—Cua nducu tuhín noo tuhún chi ndo. ¿Yoso caa cuhva tahán

chi cha sacuvi yo quívi nyitatu yo? ¿Atu tahán chi vatyí sacuvi yo cha vaha, o cha ña vaha? ¿Atu tahán chi vatyí sacacu yo chi ñáyivi, o cha cahñi ndihí yo chi ñu?

¹⁰Tyicuan ta ra Jesús nanyehé ra chi noo noo ra canyicú cuan. Ta quichaha catyí ra chi ra cuhví cuan:

—Sanacaa ndahun.

Tyicuan ta ra cuhví cuan sanacaa ra ndaha ra. Ta nduvahá ndaha ra. ¹¹Soco suhva ra canyicú cuan, cuxaan xaan ra. Ta quichahá candaca tuhun ra chi ra tahan ra:

—¿Yoso caa sacuví yo tacuhva cha ma cuvi ca cahan ra Jesús nuu ñáyivi? —cacatyí ra.

**Nacachí ra Jesús ndi uchi uvi tahan
ra tyi caca ra tyiño ra**

(Mt. 10.1-4; Mr. 3.13-19)

¹²Quívi cuan ndaa ra Jesús noo yucu. Ta ñiyaca maa chicán tahvi ra chi Nyoo. ¹³Cuhva cha cundichin, caná ra chi tandihí ri ñu nyicón chi ra. Ta nacachí ra uchi uvi tahan ri ra. Ta sacunañi ra chi ra, apóstol ra, ta cuñí chi catyí, ra caca tyiño nuu ra. ¹⁴Ta ihya nyaá sivi ndi uchi uvi tahan ra: Ra Simón ra cha sacunañi ra Cristo Pedro chi, ta yañi ra, ra Andrés, ta ra Jacobo, ra Juan, ra Felipe, ra Bartolomé, ¹⁵ra Mateo, ra Tomás, ra Jacobo sehe ra Alfeo, ta ra Simón ra yihí cuenda ityi ra cacuñí cahun cuatyí siquí gobiernu ñuu Roma cha nyacá ñaha chi ñu. ¹⁶Ta ra Judas, yañi ra Jacobo, ta ra Judas Iscariote, ra cha naxico tuhún chi ra Jesús.

**Nu sañahá ra Jesús chi cuaha xaan
ñáyivi**

(Mt. 4.23-25)

¹⁷Noo ra Jesús yucu cuan chihin ndí uchi uvi tahan ra. Ta chicutayucu ra nu ndaa cuan chihin ñu nyicón chi ra. Ta cuaha ri ityi quita coyo ñáyivi. Quita coyo ñu ñuu Jerusalén ta tandíhi ca ñuu cha iyó Judea, ta ñuu Tiro chihin ñuu Sidón cha nyicú yuhu tyañuhu. Ta chaá ñáyivi cuan vatyí cuiñi ñu tuhun cahán ra Jesús. Ta tandíhi ñu cuhví cuñi ñu vatyí sanduvaha ra chi ñu. ¹⁸Ta tandíhi ñu cha yihí tatyí ña vaha chi, nduvaha ñu saha ra. ¹⁹Ta tandíhi ñu cuñi ñu tiin ñu chi ra. Vatyí nduvaha ñu chihin tunyee iñi Nyoo, vasi tacuhva tiin ri ñu chi ra.

**Ñu ñihí tumañi iñi, ta ñu ña ñihí
tumañi iñi**

(Mt. 5.1-12)

²⁰Tyicuan ta nanyehé ra Jesús chi ra cachicá noo chihin ra. Ta quichahá catyí ra chi ra:

—Tandíhi nyoho cha ndahvi ndo, sii xaan cuví chi ndo, vatyí tahán chi cha cunyaca ñaha Nyoo ánima ndo.

²¹Tandíhi nyoho cha chisocó ndo vityin, sii xaan cuví chi ndo. Vatyí coo quívi cha ma nyehe ca ndo soco. Tandíhi nyoho cha chacú chaa ndo cha cuihya iñi ndo, sii xaan cuví chi ndo vatyí coo quívi ta ñahri ca tucuihya iñi coo chi ndo. Ta cuacu ndo chihin cha sii cuñi ndo.

²²Sii xaan cucuvi chi ndo, quívi cha tasi cuñi ñáyivi nyehé ñu chi ndo, quívi tavá ñehe ñu chi ndo

nu nyaá ñu, quívi cahán ñu chi ndo, quívi catyí ñu vatyí ñáyivi ña vaha cuví ndo vatyí chinó iñi ndo chi yuhu Rayii cha quichí nya gloria. ²³Sii xaan cucuvi chi ndo quívi nyehe ndo tindoho cuan vatyí tyicuan caa tucu sacuvi ñáyivi ta cha naha. Cahán vavaha ñu chi ra cacuvi profeta Nyoo. Caña ndava ndo chihin cha sii cuñi ndo. Vatyí cahnu xaan cha cucuhva Nyoo chi ndo gloria.

²⁴Soco ndahvi nyoho, ñu tyayii. Vatyí vityin sii xaan cuñi ndo chihin tandíhi cha tyayii ndo. Soco coo quívi maa maa ri tundoho cunyehe ndo. Vatyí ñahri cuiñi ndo nuu Nyoo.

²⁵Ta ndahvi nyoho cha cuñi maa ndo vatyí ñahri cumañi chi ndo cha vityin, vatyí coo quívi cunyehe ndo soco. Nyoho cha sii cuñi ndo cha vityin, ndahvi nyoho vatyí coo quívi cunyehe ndo tucuihya iñi. Ta cuacu chaa ndo. ²⁶Ta ndahvi nyoho vatyí vaha cahán ñáyivi siqui ndo. Vatyí tyicuan caa tucu ñáyivi ta cha naha, vaha xaan cahán ñu siqui ra cha cahán cha ña ndicha.

Cuñi ndo chi ñu xaan iñi chi ndo

(Mt. 5.38-48; 7.12)

²⁷Tandíhi nyoho cha chiñi ndo tuhun cahín, catyí chi ndo tyehe caa: Cuñi ndo chi ñu xaan iñi chi ndo. Sacuvi ndo cha vaha chihin ñu cha tasi cuñi nyehe chi ndo.

²⁸Cahan ndo cha vaha chihin ñu cha cahán ña vaha siqui ndo. Cacan tahvi ndo chaha ñu cahán chi ndo.

²⁹Tatu yóo cha cañi inchiyo nuu ndo, cuhva tucu ndo inga chiyo nacañi maa ñu. Tatu yóo cha tinyaa

chaqueta ñihno ndo, cūhva ndihi ndo camiseta ndo. ³⁰Cūhva ndo ñáá ndihi cha chicán ñu chi ndo. Tatu tinyaa ñu ñáá cha iyó chi ndo, ma ndacan ndo chi ñu. ³¹Tari cūhva cuñí ndo cha sacuvi ñáyivi cha vaha chihin ndo, tyicuan caa sacuvi ndo cha vaha chihin ñu.

³²Tatu cuñí ndo chi maa ri maa ñu cha cuñí chi ndo, ñahri cha vaha xaan sacuví ndo. Vatyí tyicuan caa nyacuví tucu ñu quiñi iyó, cuñí ñu chi ñáyivi ñohó nuu ri ñu. ³³O tatu sacuví ndo cha vaha chihin ñu cha sacuví cha vaha chihin ndo, ñahri cha vaha xaan nyacuví ndo. Vatyí tyicuan caa nyacuví tucu ñu quiñi iyó. ³⁴O tatu sacuví ndo tumañi iñi chi noo ñáyivi, ta yihí iñi ndo vatyí cusacuvi tucu ñu cuan tumañi iñi chi ndo, ñahri cha vaha nyacuví ndo. Vatyí tyicuan caa nyacuví tucu ñu quiñi iyó. Tatu ñáá noo tumañi iñi sacuví ñu chi tahan ñu, nyatú ñu cha nacuhva tucu ñu cuan tumañi iñi chi ñu. ³⁵Soco nyoho, cuñi ndo chi ñu xaan iñi chi ndo. Ta sacuvi ndo cha vaha chi ñu. Ta cūhva noo ndo chi ñu. Soco ma cuatu ndo ñáá tumañi iñi cunacuhva ñu chi ndo. Tyicuan ta cahnu xaan cha cuñihi ndo nuu Nyoo ta cucuvi ndo sehe vaha Nyoo cahnu. Vatyí Nyoo vaha ñáyivi cuví ra chihin ñu cha ña nacuhva tyahvi nyoo chi ra ta chihin ñu quiñi iyó. ³⁶Vaha ñáyivi cuví ndo chihin ñáyivi, tari maa Nyoo Sutu yo, vaha ñáyivi cuví ra chihin ndo.

Ma cahan yo cha caa inga tahan yo

(Mt. 7.1-5)

³⁷Ma cahan ndo cha caá tahan ndo, tyicuan ta Nyoo ma tiin

cuenda ra cha caá maa ndo. Ma soco ndo chi ñáyivi cha cuhun ñu anyaya, tyicuan ta ma sacuhun Nyoo chi ndo anyaya. Saha ndo tucahnu iñi chi ñáyivi. Ta Nyoo cusaha ra tucahnu iñi chi maa ndo. ³⁸Cūhva ndo cha chiñuhú chi ñáyivi. Ta tyicuan caa cūhva tucu maa Nyoo cha chiñuhú chi maa ndo. Noo ñáyivi vaha, tatu xicó ñu ñáá cha xicó ñu chi ndo, tyitu maa chahá ñu chi ndo, tyicuan caa tucu cūhva Nyoo chi ndo. Vatyí tari cūhva cūhva ndo chi ñáyivi, tyicuan caa cūhva cūhva Nyoo chi ndo —catyí ra Jesús.

³⁹Ta chahá ra Jesús cūhva ihya chi ñu, ta catyí ra:

—Noo ra cuaa ña cuví sañaha ra ityi chi nonga ra cuaa. Vatyí ninduvi ra ña nyehé ra ityi cuahan ra. Ta cuví canacoyo ra chichi noo xahva. Tyicuan caa tucu noo ra ña chitó ityi Nyoo, vasi cuñí ra, soco ma cuví sañaha ra ityi Nyoo chi nonga ra. ⁴⁰Ni noo ra cuatya sicuela ma cuví coto ra cha chitó ra cha sañaha chi ra. Vatyí nicaa ni quichaha sacuahra ra. Coto ra soco nya ndihi sacuahra ra.

⁴¹¿Yoso caa tyi nyehún cuatyí luhlu cha cuví tari mihin lee ri cha yihí chiti nuu tahan, ta ña sahun cuenda cuatyí cahnu cha iyó chuun cha cuví tari vitu cahnu cha yihí nuu maun? ⁴²Tatu chiti nuu maun yihí noo vitu cahnu, yoso caa cuví catyun chi ra yañun: “Nyaca, natave mihin lee cha yihí chiti nuun.” ¡Yoho cha savahún chuun! Tava xihna vitu cahnu cha yihí chiti nuun. Tyicuan ta cuví nyehe vahun mihin lee cha cutavon chiti nuu yañun.

Chihin cha sacuví ñáyivi ta nicohon nuu ri yo chi ñu tatu ñu vaha, o ñu ña vaha cuví ñu

(Mt. 7.17-20; 12.34-35)

⁴³Noo yutun vaha chahá tun chiti vixi, chiti vaha. Ta noo yutun ña vaha chahá tun chiti ña vaha.

⁴⁴Tandihí yutun nicohon nuu yo chi tun chihin chiti ri tun. Vatyí tuñiyaca, ma cuhva tun mangu. Ta ni ri noo iñu nduhva ma cuhva tun tichaha ndivi. ⁴⁵Ta tyicuan caa tandihí ñáyivi vaha, tuhun vaha cahán ñu. Vatyí yihí cha vaha añima ñu. Soco ñáyivi ña vaha, maa maa ri maa tuhun ña vaha cahán ñu. Vatyí yihí cha caquiñi añima ñu. Chihin yuhu ñu cahán ñu tandihí cha quiñi caa cha quitá añima ñu.

Cacu añima ñu quichahá tuhun cahán ra Jesús, ta ñu ña quichahá tuhun cahán ra, ma cacu ñu

(Mt. 7.24-27)

⁴⁶¿Ñáá tuhun cha catyí ndo chii, “Sutu Mañi yuhu, Sutu Mañi yuhu”, tatu ña sacuvi ndo tari cuhva cha catyí chi ndo? ⁴⁷Ihya cua catyí chi ndo yóo chi ndacu nyoho cha vachi ndo nu nyaí, ta tyasohó ndo cha cahín, ta sacuví ndo cha catyí. ⁴⁸Tari noo ra chitó vaha savaha vehe cuví ndo. Vatyí xihna ca chatyá ra cono vavaha ta tahan ra yuu. Ta siquí yuu cuan savahá ra vehe ra. Ta quiví coon xaan savi, ta cama xaan ndutya yahá, ta ña nduva vehe cuan vatyí siquí yuu nanyaá chi. ⁴⁹Soco ñu cha chiñí tuhun cahín ta ña sacuví ñu tari cuhva catyí, cuví ñu tari minoo

ra ña chitó savaha vehe. Vatyí ña chatyá ra nu quiñi chaha vehe ra. Ta ñima nu yuu savahá ra vehe ra. Ta chaa quiví cha coon savi. Cama xaan ndutya yaha. Ta chatya chi chaha vehe ra vatyí ñuhu ri cuví. Ta nduva vehe ra vatyí ña cunye. (Ta tyicuan caa cuví ñáyivi, tatu sacuví ñu tari cuhva catyí, tyicuan ta cacu ñu. Soco tatu ma sacuvi ñu, ma cacu ñu) —catyí ra Jesús.

Nu sanduvahá ra Jesús noo musu capitán sindaro

(Mt. 8.5-13)

7 Cuhva cha ndihí cahan ra Jesús chihin ñáyivi, ta cuanuhu tucu ra inga chaha nya Capernaum. ²Ta yucuan iyó noo capitán cha nyacá ñaha noo cientu sindaro cuatyí. Ta iyó noo musu ra cha cuñí vavaha ra. Ta cuhví ra. Ta cha cuñí cúvi ra. ³Quiví cha chitó capitán cuan tuhun ra Jesús, tachí ra chi suhva ra cacuvi mandoñi ñuu Israel na cucahan ra chihin ra Jesús, vatyí na quichi ra vatyí sanduvaha ra chi musu ra. ⁴⁻⁵Tyicuan ta chaá coyo ra mandoñi cuan nu nyaá ra Jesús. Ta quichaha catyí ra chi ra: —Iyó noo capitán cuenda ñuu Roma. Ta vaha xaan ñáyivi cuví ra chihin yo cha cuví yo ñáyivi Israel. Nyacua savahá ra noo vehe ñuhu yo. Ta tahan chi vatyí tyinyeun chi ra. Vatyí cuhví xaan noo musu ra. Ta cuñí ra vatyí sanduvahun chi ra.

⁶Tyicuan ta cuahan ra Jesús chihin ra. Soco cuhva cha cumañi ca chaa ra nya vehe capitán cuan, capitán cuan tachí ra chi suhva ra tahan ra. Ta quichaha catyí ra chi ra Jesús:

—Tata, catyí capitán vatyí ma sayangon chuun cha cuhun nya vehe ra na. Vatyí ña naña ra cha cuhun, na. ⁷Yucuan chaha ña caña iñi ra quichi ra nu nyaún. ¿Atu ma sahan noo tumañi iñi chi ra vatyí noo tuhun cahan run ihya ri, ta nduvaha ri musu ra, na? ⁸Vatyí maa ra capitán cuví ra. Ta nyacá ñaha rey chi ra. Ta maa ra nyacá ñaha ra chi ra cuatyí ca cha nuu ra. Tatu tava ra tyiño chi noo ra cuatyí cuan, na cuhun ra. Cuhun ra. O tatu catyí ra chi nonga ra na quichi ra, quichi ra. O tatu tachi ra chi inga ra na sacuvi ra tyiño, sacuvi ra. Ta tyicuan caa tucu yoho, tatu catyun na nduvaha musu ra, tyicuan ta nduvaha ra na —catyí ra tahan capitán cuan chi ra Jesús.

⁹Cha chiñi ra Jesús cha catyí ra cuan ta iyo xaan cuñí ra. Ta nanyehe ra chi ñáyivi cha nyicú chihin ra, ta catyí ra:

—Ndicha ndicha cuí vatyí chinó xaan iñi capitán cuan. Ta nañihi que chi ni noo ra Israel cha chinó xaan iñi tari ra cuan —catyí ra.

¹⁰Yucuan ta cuanuhu ra tahan capitán cuan. Ta cha nachaꝯ coyo ra nya vehe, ta nanyehe ra vatyí cha nduvahaꝯ musu cuan.

Nu sanandotoꝯ ra Jesús chi sehe noo ñaha ndahvi chihí yíi

¹¹Cha yahaꝯ tuhun cuan ta cuahan ra Jesús noo ñuu cha nañi Naín. Ta cuahan tucu ra cachicá noo chihin ra, ta cuaha xaan ñáyivi ñandihí.

¹²Tyicuan ta cuhva cha cua chaa ra yatyin ñuu cuan, nanyehe ra cuaha ñáyivi quitá coyo ñuu cuan. Ta canyisó ñu noo ndiyi, cuacuchi

ñu sehe noo ñaha ndahvi cha chihí yíi. Ta noo tuhun ri maa ra iyó chi ña, ta chihí ra. ¹³Ta cha nanyehe ra Jesús chi ña, ta cundahvi cuñi nyehe ra chi ña. Ta quichahaꝯ catyí ra chi ña:

—Ma cuacun.

¹⁴Tyicuan ta tuhvaꝯ ra ta tiin ra chatun cha yihí ndiyi cuan. Tyicuan ta ra canyisó chi ndiyi cuan chicuitayucu ra. Ta catyí ra Jesús chi ndiyi cuan:

—Ndicuita, ra cuehe —catyí ra.

¹⁵Tyicuan ta ndicuita ndiyi cuan. Ta nicunyaa ra. Tyicuan ta quichaha cahan ra. Ta ra Jesús nacuhva cuenda ra chi ra chi sihi ra. ¹⁶Cha nanyehe ñu cha tyicuan caa ta yuhvi xaan ñu cuvi. Ta quichaha sacahnu ñu chi Nyoo. Ta catyí ñu:

—Cahnu xaan ra profeta Nyoo tuví nu nyicú yo ihya.

Ta catyí tucu ñu:

—Maa Nyoo, ican vachi nu nyicú yo, vachi tyinyee ra chi yo —catyí ñu.

¹⁷Ta tandihí maa ñáyivi nicahnu ityi Judea, chitó ñu cha sacuví ra Jesús.

Nu tachi ra Juan uvi tahan ra chicá noo chihin ra nu nyaá ra Jesús

(Mt. 11.2-19)

¹⁸Ta ra cachicá noo chihin ra Juan nacatyí ra tuhun cha sacuví ra Jesús. Tyicuan ta canaꝯ ra Juan chi uvi tahan ra. ¹⁹Ta tachi ra chi ra nu nyaá ra Jesús, vatyí cundaca tuhun ra chi ra tatu ican ra cuví Cristo ra cha cusaquichi Nyoo. Vatyí tatu ñima ra, tyi cuatu ra inga ra. ²⁰Tyicuan ta ra cha tachi ra Juan,

cuahan coyo ra. Ta chaa ra nu nyaá ra Jesús. Ta quichaha catyí ra:

—Ra Juan, ra sacondutyá, tachí ra chi ndi vatyí ndaca tuhun ndi chuun tatu icon cuví Cristo ra cha cusaquichi Nyoo. Vatyí tatu ñimon, cuatu ndi chí inga ra —catyí ra.

²¹Ta cuhva cha canyicú ra tachí ra Juan cuan, ra Jesús sanduvahá ra cuaha xaan ñu cuhví, ta cuaha xaan ñu yihí tatyí ña vaha chi.

Ta sananyehe ra chí ñu cuaa.

²²Tyicuan ta catyí ra Jesús chi ra tachí ra Juan:

—Cuahan ndo. Ta ñacatyí ndo chí ra Juan tandíhi cha nyehe ndo, ta tandíhi cha chíñi ndo. Ta catyí ndo chí ra yoso caa nanyehé ra cuaa, yoso caa nacacá ra coxo, yoso caa nduvahá ra tyahyu coño, yoso caa nacuíñi ra soho, yoso caa nandotó ndiyi, yoso caa cahín tuhun Nyoo chihin ñu ndahvi yoso caa sacacú ra añima ñu. Ta catyí tucu ndo chí ra vatyí ²³sií xaan cuví chí ñu ña chicá uvi iñi nyicón chii —catyí ra Jesús chi ra.

²⁴Cuhva cha cuahan coyo ra cha tachí ra Juan, ta quichaha cahan ra Jesús tuhun ra Juan chihin ñáyivi. Ta catyí ra:

—¿Ñáá cha chahan ndo chinyehe ndo quivi chahan ndo chiqui ndii cuan? ¿Atu chahan ndo chinyehe ndo noo ndoo cha naquísí tatyí?

²⁵¿O noo ra cha ñihno sahma vaha chinyehe ndo vaha? Ñima. Vatyí chitó ndo vatyí ra ñihno sahma vaha iyó vaha ra ñayivi ta iyó ra vehe rey. ²⁶¿Atu ña chinyehe ndo chí noo profeta Nyoo? Ican. Ta cahnu ca ra cuví ra ican saha noo profeta. ²⁷Ican tuhun ra Juan nyaá

nuu tutu cha tyaa ra Isaías ta cha naha. Ta catyí Nyoo tuhun ra tyehe caa:

Yuhu tachí chí noo ra cahan tuhun ityi nuu nu cuahun.

Vatyí cucahan ra tuhun chihin ñáyivi na nasama ñu cuhva iyó ñu, ta cuatu tuhva ñu quivi quichun.

²⁸Ta catyí chí ndo vatyí chichi cha tandíhi ra cha cacu, yori profeta cha cahnu ca ican saha ra Juan. Soco ra cha nyacá ñaha Nyoo añima, vasi cuví ra noo ra luhlu ca soco cahnu ca ra ican saha ra Juan ra sacondutyá —catyí ra Jesús.

²⁹Cha chíñi ñu tuhun ihya, tandíhi ñáyivi ta ra catavá xuhun cuenda gobiernu ñuu Roma cha sacondutyá ra Juan nacoto ñu vatyí cuhva sacuví Nyoo vaha xaan.

³⁰Soco tandíhi ra fariseo chihin ra sacuahá cuenda ley vehe ñuhu, maa ra cuví ra ña cuñí cha sacondutyá ra Juan chí ra, vatyí ña cuñí ra quehen ra cha chahá Nyoo. ³¹Ta catyí ra Jesús:

—¿Ñáá chihin sandu inuu ri chí nyoho, ñu iyó quivi ihya? ¿Yóó cha tari caa caá ndo? ³²Tari ra cuatyaa cuví nyoho. Vatyí ra cuatyaa nyasiquí ndotyín nuyahvi. Ta caná chaa ndotyín chí tahan ndotyín, ta catyí ndotyín: “Tiví ndi tiyoo ta ña chitá chaha ndo. Ta chitá ndi yaa cuihya, soco ña chacu ndo.”

Ta tyicuan caa ni noo cuhva ña tahan iñi ndo. ³³Vatyí ra Juan ra sacondutyá, quichí ra ta ña chachí vaha ra. Ta ña chihí ra vinu. Ta nyoho catyí ndo vatyí tatyí ña vaha yihí chí ra. ³⁴Ta quichí tucu yuhu Rayii cha quichi nya gloria. Ta

chachí ta chihí. Ta nyoho catyí ndo vatyí ra cuahyí cuví ta cuví noo ra tuhvá chihí. Ta ña tahán iñi ndo cha cutahín chihin ra iyó cuatyí, ta chihin ra tavá xuhun. Soco vasi ni noo ndi ña quehen cuenda ndo, ³⁵soco catyí chi ndo vatyí cha chiñi tuñi Nyoo, chaha ra chi ñu naquehen tuhun cahín ta tuhun cahán ra Juan. Ta maa ñu cusañaha ñu chi ndo vatyí vaha cha chiñi tuñi Nyoo —catyí ra Jesús.

**Nu nyaá ra Jesús vehe ra
Simón ra cuví fariseo**

³⁶Noo ra fariseo cha nañí Simón nacatyí tuhun ra chi ra Jesús noo vico vehe ra. Ta chaá ra Jesús vehe ra, ta chicunyaa ra mesa. ³⁷Tyicuan ta noo ñaha cata iñi ñuu cuan chitó ña vatyí nyaá ra Jesús yucuan. Ta chaá ña chihin noo yutyí alabastro tyitu yihí ndutya vixi chahán. ³⁸Ta chicunyaá ña yatyin ri chaha ra. Ta quichaha chacu chaá ña vatyí ndu uvi iñi ña cuatyí ña. Ta quitá ndutya nuu ña. Ta chihin ndutya nuu ña nacatyá ña chaha ra. Yaha cuan ta sana ityi ña chaha ra chihin ixi xiñi ña. Ta tyayuhú ña chaha ra. Tyicuan ta choso ña ndutya vixi chahán cuan siqui chaha ra. ³⁹Cuhva cha nyehe ra fariseo cuan cha tyicuan caa, ndichí xiñi ra: “Tatu ndicha ndicha cha Nyoo saquichi chi ra ihya, coto ra yóo ñaha tiñ chaha ra, vatyí ñaha cuan, ñaha iyó cuatyí cuví ña.”

⁴⁰Tyicuan ta ra Jesús catyí ra chi ra fariseo cuan:

—Yoho Simón, iyó noo tuhun cua catyí chuun —catyí ra chi ra.

Tyicuan ta nacahan ra Simón:

—Vaha, catyí chii, Maestro —catyí ra.

⁴¹Ta quichaha catyí ra Jesús tyehe caa:

—Uvi tahan ra yosoyicá ra xuhun chi noo ra cha tuhva chahá noo. Ta noo ra cuan yosiyicá ra ohon cientu denario. Ta nonga ra yosiyicá ra uvi xico uchi ri denario (tari ohon cientu ri pesu). ⁴²Ta ninduvi tahan ra ña cuví tyiyahvi ra. Ta ra tuhvá chahá noo cuan, saha ra ticahnu iñi chi ninduvi tahan ra. Ta vityin catyí chii, yoho Simón ¿nya ra cua cuñi ca chi ra cha chahá noo cuan? —catyí ra Jesús.

⁴³Tyicuan ta nacahan ra Simón, ta catyí ra:

—Ra cha cuaha ca saha ra tucahnu iñi chi —catyí ra.

Tyicuan ta catyí ra Jesús:

—Ndicha cha cahún.

⁴⁴Tyicuan ta nanyehé ra Jesús chi ñaha sihi cuan, ta catyí ra chi ra Simón:

—¿Nyeहुn chi ñaha ihya?

Yuhu quihvi chichi vehun. Ta ña chahun ndutya cha ndoo chahi tari cuhva costumbre cha iyó chi yo. Ta ñaha ihya nacatyá ña chahi chihin ndutya nuu ña. Ta yaha cuan, ta sana ityi ña chihin ixi xiñi ña. ⁴⁵Yoho ña tyayuhun ndahi, tari costumbre cha iyó chi yo, soco maa ña nyacua nya cuhva cha quihvi ihya ta ña sandihí ña cha tyayuhú ña chahi.

⁴⁶Ta yoho ña tyihun aceitye xiñi, soco ñaha ihya tyihí ña ndutya vixi chahán chahi. ⁴⁷Ta catyí chuun, yoho Simón, vasi cahnu xaan cuatyí ña, soco sahí ticahnu iñi chi ña. Yucuan chaha cuñí

xaan ña chii. Ta ñu sahí tucahnu iñi chiin ri cuatyí, chiin ri cuñí ñu chii —catyí ra Jesús.

⁴⁸Tyicuan ta quichaha catyí ra Jesús chi ña:

—Cuatyun cha yaha sandachi. Vatyí cha saha Nyoo ticahnu iñi chuun —catyí ra chi ña.

⁴⁹Tyicuan ta ra nyicú chihin ra quichaha ndichí xiñi ra: “¿Yóó ra cuví ra ihya? Vatyí sahá ra tucahnu iñi cuatyí ñáyivi.”

⁵⁰Tyicuan ta quichaha catyí ra Jesús chi ñaha sihi cuan:

—Cuahan vityin, cha cacun vatyí chinó iñun chii. Cuahan chihin cha vaha —catyí ra chi ña.

Ñusihí cha tyinyeé chi ra Jesús

8 Cha yaha tuhun cuan, ta cuahan ra Jesús chicá noo ra noo noo ñuu cahnu ta noo noo ñuu luhlu. Ta cahan noo ra nuu ñáyivi. Ta sacoto ra chi ñu tuhun vaha yoso cuhva cuñí Nyoo cunyaca ñaha ra chi ñu. Ta ndi uchi uvi tahan apóstol, ra cha tyatyíño ra chi, cuahan coyo ra chihin ra. ²Ta cuahan coyo tucu suhva ñusihí cha sanduvaha ra, ñu cuhvi ta ñu yihí tatyí ña vaha chi. Ta chihin ñu cuahan cu María noo ñaha ñuu Magdala, cha yihí ucha tahan tatyí ña vaha chi ta nduvaha ña. ³Ta cuahan tucu cu Juana ñasihí ra Chuza ra cuví tyiño cuenda ra Herodes, ta cu Susana chihin cuaha xaan ca ñu cha tyinyeé chi ra chihin ñáá cha iyó chi ñu.

Nu sañahá ra Jesús vatyí tari noo ra chicá noo tachi, tyicuan caa cuví ra cahán tuhun Nyoo

(Mt. 13.1-9; Mr. 4.1-9)

⁴Ta cuaha xaan ñáyivi quitá noo noo ñuu, vatyí cua nyehe ñu nu cahan ra Jesús tuhun Nyoo. Ta tuvi xaan ñu nyicú ñu, ta quichaha catyí ra chi ñu chihin noo cuhva:

⁵—Quitá noo ra vehe ra. Ta cuahan ra nu iyó tyiño sahá ra, vatyí cua quití ra chiti trigu nu ñuhú ra. Ta cuhva cha quití ra canacoyo suhva chiti cuan yuhu ityi. Ta chañi ñáyivi siqui. Ta quichí saa ta chachi ti. ⁶Ta suhva ca chiti cuan canacoyo ticu yuu. Caña chiti cuan. Soco na ityi ri vatyí chihin xaan ñuhu yihí chaha. Ta siin ri ña cachin. ⁷Ta suhva ca chiti canacoyo chichi chiti iñu, soco quivi caña tun iin ri, tu iñu cuan chahñi chi tun. ⁸Soco suhva ca chiti canacoyo nu ñuhú vaha ta quivi chahnu tun, vaha xaan chaha tun chiti. Vatyí noo ri chiti cuan, cientu chiti quita chihin —catyí ra Jesús.

Ta cha yaha catyí ra tuhun cuan. Ta quichaha cana chaa ra vatyí na cuiñi ñáyivi, ta catyí ra:

—Tatu cutuñi iñi ndo, tyasoho ndo tuhun cahín —catyí ra.

Nu sacotó ra Jesús ñáá cuenda sañahá ra chihin cuhva ri

(Mt. 13.10-17; Mr. 4.10-12)

⁹Yaha cuan ta ra cachicá noo chihin ra, ndaca tuhun ra chi ra ñáá cha cuñí chi catyí tuhun cha nacatyí ra chi ñáyivi. ¹⁰Tyicuan ta quichaha catyí ra:

—Chi nyoho sacotó Nyoo tuhun xehe, yoso caa nyacá ñaha ra. Soco chi tandihí ca ñu cuan, cuhva ri chahí chi ñu. Tacuhva nyehe ñu ta cuví chi tari cha ña ndichin nyehé ñu, ta cuiñi ñu soco ma cutuñi iñi ñu ñáá tuhun cuví.

Nu sacotó ra Jesús ñáá cha cuiñi chi catyí tuhun ra tachí cuan

(Mt. 13.18-23; Mr. 4.13-20)

¹¹Cuhva cha catyí chi ndo, cuiñi chi catyí tyehe caa: chiti cuan tari tuhun Nyoo cuví. ¹²Ta tari nu canacoyo chiti trigu cuan yuhu ityi, tyicuan caa cuví noo ñu chiñi tuhun Nyoo. Soco quichi cuihna ta tinyaa ra tuhun Nyoo chi ñu tacuhva cha ma chino iñi ñu. Ta ma cacu ñu. ¹³Ta tari nu canacoyo chiti cuan ticu yuu, tyicuan caa tucu inga ñáyivi cha chiñi tuhun Nyoo. Ta sii xaan cuví chi ñu suhva ri quivi. Soco vatyi ña yihí vaha yoho ñu, suhva ri quivi chino iñi ñu, soco quivi cha quichaha nyehe ñu tindoho, ta sandihí ri ñu tuhun cha chinó iñi ñu. ¹⁴Tari nu canacoyo chiti chichi iñu, tyicuan caa cuví tucu inga ñu chiñi tuhun Nyoo. Chiñi ñu tuhun Nyoo soco ña cuiñi ñu sacuvi ñu tari cuhva chiñi ñu. Vatyi yihí ñu, nyaá ca xiñi ñu tuhun tindoho ican saha tuhun Nyoo. Ta nonga ñu nyiyo ca iñi ñu cha tyayii. Ta nonga tucu ñu sii ca cuiñi ñu chica noo yanga ri ñu. Ta tari cha ña chicoo chiti nuu ñu cuví cuan. ¹⁵Soco tari nu canacava chiti nu ñuhú vaha, tyicuan caa cuví noo ñu cha chiñi tuhun Nyoo. Ta vaha añima ñu vatyi chinó iñi ñu chihin tandihí añima ñu. Ta vaha tyasohó

ñu tuhun Nyoo, ta ña naa maa iñi ñu tuhun ra. Ta sacuvi ñu tandihí tuhun cahán ra.

Ma tyihi xehe yo ñuhú cha sandundichin Nyoo añima yo coto tinyaa ra

(Mr. 4.21-25)

¹⁶Yori yo cha natyaa yo ñuhú tima ta tixehe yo xiu chito o nonga nu xehe. Natyaa yo ñuhú tima soco cha cananyaa yo noo nu sucun. Ta cuhva quihvi ñáyivi chichi vehe soco ndichin. ¹⁷Vatyi ñahri noo cha ñohó xehe, ta cuiñun, tyi ma natuvi. Ta ni noo tuhun xehe, ta cuiñun, tyi ma quita nu ndichin ta coto yo. ¹⁸Yucuan chaha tyasoho ndo tuhun cahín. Vatyi tatu quichaha ndo tuhun cahín, cuaha ca cusañahi chi ndo. Soco tatu ma tyasoho ndo, tyicuan ta cutinyaa Nyoo tandihí maa chi ndo nyacua nya cha chihin ri cha cuiñi maa ndo tyi cumí ndo.

Tari yañi ra, ta tari sihi ra, tyicuan caa cuví chi ñu quichaha tuhun Nyoo, catyí ra Jesús

(Mt. 12.46-50; Mr. 3. 31-35)

¹⁹Tyicuan ta chaá sihi ra Jesús chihin yañi ra nu nyaá ra. Soco ña cuví chaa ñu vatyi tuví xaan ñáyivi. ²⁰Tyicuan ta sacoto ñáyivi canyicú cuan chi ra Jesús, ta catyí ñu: —Sihun chihin yañun nyicú ñu chata vehe. Ta cuiñi ñu cahan ñu chuhun.

²¹Tyicuan ta nacahan ra Jesús, ta catyí ra:

—Tandihí maa ñáyivi cha chiñi ta sacuvi tuhun Nyoo cha cahín, ican ñu cuví sihi, ta ican ñu cuví yañi —catyí ra Jesús.

**Nu sacutaxin ra Jesús tatyí ñihi
vavaha nu miñi**

(Mt. 8.23-27; Mr. 4.35-41)

²²Cuví chi noo quívi cuan quihví ra Jesús chichi noo canoa chihin ra cachicá noo chihin ra. Ta quichaha catyí ra chi ra:

—Coho ndo inga chiyo miñi ihya.

Yucuan ta cuahan coyo ra chihin canoa cuan. ²³Ta cha ni ri ca cha cuahan ra mahñu miñi cuan, tiñ ñumahna chi ra Jesús. Tyicuan ta sana iñi ra ta cha noo tatyí ñihi vavaha. Ta quichaha tyihi chi ndutya chichi canoa cuan. Ta quichaha cuñi nyee canoa cuan vatyí cama xaan ndutya quihví.

²⁴Tyicuan ta casandoyo ra chi ra Jesús. Ta quichaha catyí ra:

—iMaestro! iMaestro! Cha cuñi nyee yo chichi ndutya —catyí ra.

Tyicuan ta nducuita ra Jesús. Ta quichaha catyí ra chi tatyí cuan ta chi ndutya cuan, na cutaxin chi. Ta cutaxin ri. ²⁵Tyicuan ta quichaha catyí ra chi ra cachicá noo chihin ra:

—¿Ñáá tuhun yuhví ndo? ¿Atu ña chinó iñi ndo vatyí yuhu sahá cuende chi ndo? —catyí ra.

Soco ra cuan, yuhví xaan ra. Ta iyo xaan cuñi ra. Ta quichaha ndaca tuhun ra chi ra tahan ra:

—¿Yóó ra cuví ra ihya? Vatyí nyacua nya tatyí ta ndutya ta quichahá tuhun cahán ra.

**Nu nduvaha noo ra yihí tatyí ña
vaha ñuu Gadara**

(Mt. 8.28-34; Mr. 5.1-20)

²⁶Tyicuan ta cha coyo ra ityi Gadara cha nyaá inga chiyo miñi

ityi nuu Galilea. ²⁷Ta quita ra chichi canoa cuan. Ta yucuan cha noo ra cha quichi noo ñuu ityi cuan chisatahan ra chi ra. Ta yihí tatyí ña vaha chi ra. Ta cha naha xaan ña ñihnó maa ra sahma. Ni ri ña iyó ra vehe ra. Chicá noo ri maa ra nu ñaña calavari cuan. ²⁸⁻²⁹Ta tuhvá tatyí ña vaha cuan naquiqui chi ra. Ta yucuan chaha chahñi ñu ndaha ra ta chaha ra chihin cadena. Soco tatyí ña vaha cuan chahá fuerza chi ra cha cahnya ra. Ta sacono chi chi ra. Ta chinyaca chi chi ra noo nu yori maa ñáyivi iyó. Ta culva cha nyehe ra chi ra Jesús, chicuiñi chiti ra nuu ra. Ta quichaha canachaa ra, ta catyí ra:

—¿Ñáá tuhun tyihún chuun chihin yuhu, yoho Jesús, Sehe Nyoo cahnu? Chiquén chuun vatyí ma sanyehun tundoho chii —catyí ra yihí tatyí ña vaha cuan chi ra Jesús.

Ta catyí ra tyehe caa vatyí ra Jesús tachi ra chi tatyí ña vaha cuan, na quita chi ra ndahvi cuan.

³⁰Ta quichaha ndaca tuhun ra Jesús chi tatyí ña vaha cuan, ta catyí ra:

—¿Ñáá nañún?

Ta tatyí ña vaha cuan sacahan chi ra cuan, ta catyí ra:

—Nyuhu nañi ndi, Legión.

Tyicuan caa catyí ra vatyí cuaha xaan tatyí ña vaha yihí chi ra. Cuenda mil tatyí ña vaha cuan yihí chi ra. ³¹Tyicuan ta tatyí ña vaha cuan catyí chi ra Jesús vatyí ma tuchi ra chi chi nu tindoho nu ma cuvi maa quita chi. ³²Ta chicán tatyí ña vaha cuan chi ra Jesús nacuhva ra caquihvi chi chichi quini cha canyicú yuhu miñi cuan. Tyicuan ta chaha ra Jesús permiso

cha caquihvi chi chichi quini cuan.

³³Ta quitā tatyī nā vaha cuan chi ra ndahvi cuan. Ta caquihvi chi chichi quini cuan. Tyicuan ta cachino quini cuan. Ta yatyin cuan nyaá noo xahva yuhu miñi cuan. Yucuan canacoço ti chichi miñi cuan. Ta cachihī ti chihin ndutya cuan.

³⁴Tyicuan ta ra casahá cumi chi quini cuan, yuhví xaan ra. Ta cuahan coyo vavaha ra cua nacatyī ra chi ñáyivi nya ñuu. Ta tandihī ri ñáyivi cha nyehe ra, ta nacatyī ra tuhun cuan. ³⁵Tyicuan ta chaq coyo ñáyivi cua nyehe ñu ñáá cha cuvī cuan. Tyicuan ta chaq ñu nu nyaá ra Jesús. Ta nañihī ñu chi ra cha yihī tatyī nā vaha cuan chi. Nyaá ra nuu ra Jesús. Ta ñihno ra sahma ra. Ta vaha cuñī ra. Ta yuhví xaan ñu cuvī. ³⁶Tyicuan ta tandihī ñu cha nyehe cha cuvī cuan, nacatyī ñu chi tandihī ca ñáyivi yoso caa quitā tatyī nā vaha chi ra ndahvi cuan, ta nduvahā ra. ³⁷⁻³⁹Yucuan ta tandihī ñáyivi ityi Gadara cuan quichaha catyī ñu chi ra Jesús na cunuhu ra ityi nu quichi ra. Vatyī yuhví xaan ñu chihin cha sacuvī ra chihin tatyī ña vaha cuan. Tyicuan ta ra cha quitā tatyī ña vaha cuan chi, catyī ra chi ra Jesús, na cuhva ra cha cuhun ra chihin ra. Soco catyī ra Jesús chi ra:

—Cuānuhu nya vehun. Ta ñacuhva cuendon chi ñáyivi chuun ñáá cha sacuvī Nyoo chuhun —catyī ra.

Yucuan ta ra Jesús nandihvi ra chichi canoa cuan. Ta cuanuhu ra chihin ra cachicá noo chihin ra. Tyicuan ta ra ndahvi cha nduvaha cuan, cuanuhu ra nya ñuu ra. Ta ityi cuahan ra nacatyī ra chi

tandihī ñáyivi ñuu cuan yoso caa sanduvahā ra Jesús chi ra.

Nu nduvahā sehe ra Jairo ta ñaha sihi cha tiñ sahma ra Jesús

(Mt. 9.18-26; Mr. 5.21-43)

⁴⁰Quivi cha nachaa ra Jesús cha chahan ra inga chiyo miñi cuan, cuaha xaan ñáyivi nyatú ñu chi ra. Ta sii xaan cuñī ñu vatyī nachaa ra. ⁴¹Tyicuan ta chaq noo ra cha nañī Jairo, ra cuvī nuu vehe ñuhu, ta chicuñī chiti ra nuu ra. Ta quichaha chacu ndahvi ra nuu ra, na cuhun ra vehe ra. ⁴²Vatyī iyó noo tuhun ri sehe ra, ta iyó uchi uvi cuiya ña. Ta cha cuñī cúvi ña chihin cuehe. Ta cuahan ra Jesús vehe ra. Ta cuaha xaan ñáyivi cuahan chihin ra Jesús, ta tihin xaan cuahan ra mahñu ñu. ⁴³Ta chihin ñáyivi cuan cuahan noo ñaha cuhvī. Cha iyó uchi uvi cuiya ndoho ña noo cuehe niñi. Ta cha ndihī maa xuhun ña sanaq ña, ta ña nduvahā ña. ⁴⁴Soco chaq ña nu nyaá ra Jesús ityi chata ra. Ta tiñ ña sahma ra. Ta caa cuhva ri cuan, ta chicunyasi cha chati niñi ña.

⁴⁵Tyicuan ta quichaha catyī ra Jesús:

—¿Yóo cha tiñ sahme?

Ta tandihī ñu cuahan chihin ñu catyī ra:

—Yori.

Ta catyī ra Pedro ta ra tahan ra chi ra Jesús:

—Maestro, cuaha xaan ñáyivi cuahan chuhun, ta tihin xaan cuahun. Ta suri maa ñu tyandahā ñu chuun. Ta ndacá tuhun con “¿Yóo cha tiñ sahme?” —catyī ra.

⁴⁶Soco ra Jesús catyī ra:

—Chitó mai vatyí iyó noo cha tiñn sahme. Vatyí tuví iñi cuahan suhva tunyee iñi cha iyó chii —catyí ra.

⁴⁷Tyicuan ta ñaha sihi cuan nyehe ña vatyí cha chitó ra. Ta quichaha nihi ña chihin cha yuhví ña. Ta chicuiñi chiti ña nuu ra. Ta quichaha nacatyí ña chi ra ñáá tuhun cha tiñn ña sahma ra, ta yoso caa nduvahá ña caa cuhva ri cuan. Ta chiñi tandihi ñáyivi cuan cha nacatyí ña. ⁴⁸Yucuan ta catyí ra Jesús chi ña:

—Yoho sihi, cha nduvahun vatyí chinó iñun chii. Cuahan chihin cha vaha —catyí ra.

⁴⁹Ni cahán ca ra Jesús tuhun ihya, ta chaá noo ra quita vehe ra cuví nuu vehe ñuhu cuan. Ta quichaha catyí ra chi ra Jairo cuan:

—Sehun cha yahá chihi ña. Ma sayanga con chi Ra Sacuaha chiña —catyí ra.

⁵⁰Soco cha chiñi ra Jesús tuhun cuan. Ta quichaha catyí ra:

—Ma yuhvun. Chino iñun. Ta sehun cua nduvaha ña —catyí ra.

⁵¹Ta cuhva cha chaá ra Jesús vehe ra Jairo, ña chahá ra quihvi ñáyivi chichi vehe. Maa ri maa ra Pedro ta ra Jacobo ta ra Juan ta maa ra Jairo chihin ñasihi ra, quihvi ñu chichi vehe cuan nu catuví cuehe luhlu cha chihí cuan.

⁵²Ta tandihi ñu chacú chaa ñu cha cuenda vatyí chihí cue. Soco ra Jesús catyí ra chi ñu:

—Ma cuacu ca ndo. Vatyí ña chihí cue. Quixí cue —catyí ra.

⁵³Soco chacú nyaa ñu tuhun cahán ra. Ta ña chinó iñi ñu. Vatyí chitó ñu tyi cha chihí cue.

⁵⁴Tyicuan ta tiñn ra Jesús ndaha

cue. Ta ñihi cahan ra ta catyí ra chi cue:

—Nducuíta, cuehe luhlu —catyí ra.

⁵⁵Tyicuan ta nandoto cue. Ta caa cuhva ri cuan nducuitá cue. Ta quichaha catyí ra Jesús:

—Cuhva ndo cha cachi cue.

⁵⁶Ta sutu cue ta sihi cue, iyo xaan cuñi ñu. Soco catyí ra Jesús chi ñu vatyí yori maa chihin cahán ñu tuhun cha cuví cuan.

Nu tachí ra Jesús ndi uchi uvi tahan ra cachicá noo chihin ra vatyí cucahan ra tuhun Nyoo

(Mt. 10.5-15; Mr. 6.7-13)

9 Sandu iin ri ra Jesús ndi uchi uvi tahan ra cachicá noo chihin ra. Ta chahá ra tunyee iñi chi ra vatyí cuví tava ra tatyí ña vaha, ta cuví sanduvaha ra chi ñu cuhví.

²Ta tachí ra tyiño chi ra vatyí na sanduvaha ra chi ñu cuhví, ta cahan ra tuhun Nyoo yoso caa nyacá ñaha ra añima ñáyivi. ³Ta catyí ra chi tandihi ra cuan:

—Ñahri cha cuisón ndo ityi cuhun ndo, ni yutun ma tuvi ndo. Ni yitín, ta ni ri cha cachi ndo ta ma cuisón ndo. Ta ni ri xuhun ta ma cuisón ndo. Tacuhva ñihnó ri ndo cuhun ndo. ⁴Ta savaha ri vehe cha chaa ndo, cunya ndo yucuan nyacua nya cha chaa quivi cha cuhun ndo inga ñuu. ⁵Ta nu ña cuñi ñu cuiñi ñu tuhun cahan ndo, quita ndo ñuu cuan. Ta naquisi ndo ñiyaca chaha ndo. Tyehe caa sacuvi ndo na cuví chi tari minoo seña chi ñu, vatyí ña cuñi ñu tyasoho ñu tuhun Nyoo —catyí ra Jesús chi tandihi ra cuan.

⁶Tyicuan ta cuahan coyo ra tandihi cuii maa ñuu. Ta cahán ra tuhun vaha

Nyoo ta yoso caa cuñí chi ta cacu ñu. Ta sanduvahá ra chi ñu cuhvī.

Nu cuñí ra Herodes coto ra yóo ra chicá noo cahán tuhun Nyoo ta sanduvahá chi ñáyivi

(Mt. 14.1-12; Mr. 6.14-29)

⁷Ra Herodes ra cuví ra nyacá ñaha nicahnu ityi Galilea, ñihī ra tuhun cha sacuví ra Jesús. Ta ña ñihī vaha ra cuhva yóo ra cuví ra. Vatyí yihí ñu catyí ñu vatyí ra Juan, ican ra nandoto. ⁸Ta yihí ñu catyí ñu vatyí ra Elías, ican ra nandoto. Ta yihí ñu catyí ñu vatyí inga ra profeta Nyoo ta cha naha, ican nandoto. ⁹Soco catyí ra Herodes:

—Maa mai tyihī tyiño chichahnya sucun ra Juan. ¿Tu tyicuan caa, yóo ra chiñí xain tuhun ihya? —catyí ra.

Ta ra Herodes cuan nducú xaan ra cuhva yoso caa nyehe ra chi ra cha chicá noo cuan.

Nu chahá ra Jesús cha cachi ohon mil rayii

(Mt. 14.13-21; Mr. 6.30-44; Jn. 6.1-14)

¹⁰Ta cuhva cha nachahá coyo ra chicá tyiño nuu ra Jesús, canacatyí ra chi ra Jesús tandihi cuii maa cha cuví nu chahan coyo ra. Tyicuan ta tava siin ra Jesús chi ra ta cuahan coyo ra yatyin ri noo ñuu cha nañí Betsaida. ¹¹Soco cuhva cha ñihī ñáyivi tuhun vatyí cuahan ra Jesús nyicuan, ta cuahan coyo vavaha ñu nya nu nyaá ra. Tyicuan ta quichaha cahan ra chihin ñu tuhun yoso caa nyacá ñaha Nyoo añima ñáyivi. Ta sanduvahá ra chi ñu cuhvī.

¹²Ta cuhva cha cua iñi xaan, ndi uchi uvi tahan ra chicá noo chihin ra quichaha catyí ra chi ra:

—Catyí chi ñáyivi ihya na cunuhu ñu cunyitatu ñu, ta na cunducu ñu noo cha cachi ñu noo ñuu cha nyaá yatyin ri cuan. Vatyí ihya ñahri maa cha cachi yo iyó —catyí ra.

¹³Tyicuan ta quichaha catyí ra Jesús chi ndi uchi uvi tahan ra cuan: —Cuhva ndo cha cachi ñu —catyí ra.

Tyicuan ta quichaha catyí ra chicá noo chihin ra chi ra tahan ra: —Ñahri maa cha iyó ihya. Ohon tahan ri pan, ta uvi tahan ri tiyaca iyó. Soco ma ñihi cha cachi tandihi ñáyivi ihya. Ní ri cusata ndi soco ma ñihi —catyí ra.

¹⁴Vatyí ohon mil rayii nyicú yucuan. (Ta siin ri nyicú ñusihi chihin sehe ñu.) Yucuan ta ra Jesús catyí ra chi ra cachicá noo chihin ra: —Na cunyicu ñáyivi cha uvi xico uchi tahan ñu noo noo nu cunyicu ñu.

¹⁵Tyicuan ta chicunyicu tandihi ñu. ¹⁶Tyicuan ta quehen ra Jesús ohon tahan pan cuan chihin uvi tahan tiyaca cuan. Ta nanyehe ndaa ra andivi, ta nacuhvá ra tyahvi nyoo chi Nyoo. Tyicuan ta tahvī sava ra pan ta tiyaca cuan. Ta chahá ra chi ra cachicá noo chihin ra na casacha ra chi ñáyivi. ¹⁷Tyicuan ta tandihi ñu chachī ñu. Ta chitu chichi ñu. Yahá cuan ta ndoo ca yiquin ta sacutu ra uchi uvi tahan tica chihin yiquin cuan.

Nu catyí ra Pedro tyi ra Jesús cuví ra Cristo, ra sacacú chi yo

(Mt. 16.13-19; Mr. 8.27-29)

¹⁸Noo quivi quitá siin ra Jesús chihin ra cachicá noo chihin ra. Ta quichaha chicán tahvi ra chi Nyoo. Ta nu ndihi chicán tahvi ra, ta quichaha ndaca tuhun ra chi ra chicá noo chihin ra ta catyí ra:

—¿Ñáá catyí ñáyivi, yóó ra cuví yuhu?

¹⁹Tycuan ta nacahan ra cachicá noo chihin ra, ta catyí ra:

—Yihí ñu catyí ñu vatyí ra Juan ra sacondutya chi ñáyivi cuvún. Ta yihí ñu catyí ñu vatyí ra Elías cuvún. Ta yihí ñu catyí ñu vatyí inga ra profeta Nyoo ta cha naha cuvún —catyí ra.

²⁰Tycuan ta ndaca tuhun ra Jesús chi tandihi ra, ta catyí ra:

—Ta nyoho, zyóó ra cuví yuhu, cuhva cha cuñi nyoho?

Tycuan ta nacahan ra Pedro, ta catyí ra:

—Yoho cuví ra Cristo ra cha quita nu nyaá Nyoo.

Nu sacoto ra Jesús yoso caa cucahñi ñáyivi chi ra

(Mt. 16.20-28; Mr. 8.30—9.1)

²¹Ta catyí ra Jesús chi ra cachicá noo chihin ra vatyí yori maa chihin cahan ra tuhun cuan. ²²Tycuan ta catyí tucu ra chi ra:

—Yuhu Rayii cha quichi nya gloria cuví. Ta tahan chi vatyí cuaha xaan tundoho cunyehe. Ta ra cacuví mandoñi ta ra cacuví nuu chi tata sutu chihin ra casacuaha cuenda ley, ma chino iñi ra chii. Ta cucahñi ra chii. Soco nu cu uñi quivi cunandote —catyí ra.

²³Tycuan ta quichaha catyí tucu ra chi tandihi ra:

—Tatu nya nyoho cuñi ndo cunyicon ndo chii, cahnya iñi ndo cha cuñi maa ndo sacuvi ndo, tacuhva cuví sacuvi ndo cha cuñi Nyoo. Ma ndu uvi iñi ndo cha yihí ndo cuende vasi ndiquivi nyehe ndo tundoho. Vatyí yucuan cuví

cruzi cha tahan chi cuiso ndo. ²⁴Ta nya ndo ña cuñi ndo nyehe ndo tundoho cha catyí yuhu, cunyehe ndo tundoho anyaya. Soco nya ndo cuhva ndo ñáyivi ndo cha catyí yuhu, cucacu añima ndo.

²⁵¿Ñáá cuenda quita chi ndo cha saha ganaa ndo tandihi cha iyó ñáyivi, tatu cahun añima ndo anyaya? ²⁶Vatyí tatu cahan nuu ndo cha cahán ñáyivi chi ndo cha catyí yuhu, ta cha catyí tuhun cahín, cucahan tucu nuu mai nyehi chi ndo nachaa quivi quichi inga chaha. Vatyí cuquichi chihin cha cahnu cuví, ta cha cahnu cuví Sutu yo Nyoo ta ángel cuenda ra. Vatyí yuhu cuvi Rayii cha quichi nya gloria. ²⁷Ta catyí chi ndo vatyí yihí ndo cha nyicú ndo ihya vityin, ma cúvi ndo nyacua nya nyehe ndo yoso caa cuví nu nyacá ñaha Nyoo.

Uñi tahan ra cachicá noo chihin ra Jesús nyehé ra yoso caa cuví nu nyacá ñaha Nyoo

(Mt. 17.1-8; Mr. 9.2-8)

²⁸Uña quivi yaha cha catyí ra Jesús tuhun cuan. Ta ndaa ra noo yucu vatyí cua cacan tahvi ra chi Nyoo. Ta cuahan ra Pedro, ra Jacobo ta ra Juan chihin ra. ²⁹Ta cha ni ri ca cha chicán tahvi ra Jesús, nasama cuhva caá sahma ra ta nuu ra. Tyaqui xaan cuichin nanduvi sahma ra. Ta xiño xaan. ³⁰Tycuan ta tuvi uvi tahan ra candatuhún chihin ra, ra Moisés ta ra Elías. ³¹Ta ndichin xaan nu tayucú ra. Ta cacahán ra tuhun yoso caa cunyehe ra Jesús tundoho Jerusalén ta cúvi ra. ³²Ta vasi cuñi xaan ra Pedro chihin ra tahan ra

cacusu ra, soco ña quixí ra. Ta nyehé ra cha ndichin xaan cuan nu nanyaá ra Jesús chihin ra cha tayucú chihin ra. ³³Cuhva cha cuahan coyo ra tayucú chihin ra Jesús cuan, catyí ra Pedro:

—Maestro, vaha xaan cha nyicú ndi ihya. Na savaha ndi uñi tahan vehe, noo chuun, noo chi ra Moisés, ta noo chi ra Elías —catyí ra.

Soco ña chitó ra Pedro tuhun cahán ra. ³⁴Ta cha ni ri ca cha cahán ra ta quichí noo vico siqui ra. Ta yuhví xaan ra cacuví cha caquihví ra chichi vico cuan. ³⁵Tyicuan ta chichi vico cuan chiñi ra noo ndusu cha catyí:

—Ican ra ihya cuví Sehi, ta cuñi xain chi ra. Tyasoho ndo tuhun cahán ra —catyí ndusu cuan.

³⁶Ta cha yahá cahán ndusu cuan, nanyehe ra Pedro ta ra ndihi chihin ra vatyí noo ri ca maa ra Jesús nanyaá yucuan. Ta yori maa chihin cacahan ra tuhun cha nyehe ra.

Nu sanduvahá ra Jesús chi noo ra cuehe luhlu cha yihí tatyí ña vaha chii

(Mt. 17.14-21; Mr. 9.14-29)

³⁷Ta cha inga quivi cha noo ra Jesús yucu cuan, cuaha xaan ñáyivi chisatahan chi ra. ³⁸Tyicuan ta chichi cha cuaha ñáyivi cuan, noo ra cana chaa xaan ra, ta catyí ra:

—Maestro, sáha tumañi iñi chii. Nyehé ndahvi chi sehi. Vatyí noo tuhun maa ra iyó chii. ³⁹Ta yihí ndihi tatyí ña vaha chi ra. Ta sacanachaa chi chi ra. Ta tuchí chi chi ra nyasava. Ta quitá tiñi yuhu ra. Ta quiñi xaan nyacuví chi chihin ra. Ta ña cuñi maa tatyí ña

vaha cuan saña chi ra. ⁴⁰Cha cahin chihin ra cachicá noo chuhun na tava ra tatyí ña vaha cuan, soco ña cuví chi ra —catyí ra.

⁴¹Tyicuan ta nacahan ra Jesús ta catyí ra:

—Nyoho, ñu ña chinó iñi cuví ndo. Ta ni caa ni quiñi iyó ndo. ¿Yoso ca tahan quivi cunyai chihin ndo ta cunyeé iñi tisihi ndo nyacua nya cha cutuhva ndo ta chino iñi ndo chii?

Ta catyí ra chi ra cuan:

—Nyaca chi sehun.

⁴²Ta cuhva cha cua tuhva ra cuehe cuan nu nyaá ra Jesús, ta tuchi tatyí ña vaha cuan chi cue nya sava. Soco ra Jesús tava ra chi tatyí ña vaha cuan. Ta sanduvahá ra chi cue. Tyicuan ta nacuhva cuenda ra chi cue chi sutu cue. ⁴³Ta tandihi ñáyivi, iyo xaan cuñi ñu cha cahnu cha sacuví Nyoo chihin ñu.

Inga chaha tucu cahán ra Jesús tuhun yoso caa cucahñi ñáyivi chi ra

(Mt. 17.22-23; Mr. 9.30-32)

Cha ni ri ca cha iyo cuñi ñáyivi cha sacuví ra Jesús, ta quichaha catyí ra chi ra cachicá noo chihin ra:

⁴⁴—Tyasoho vaha ndo tuhun cahín. Ta ma naa iñi ndo. Vatyí yuhu Rayi cha quichí nya gloria, cucuhva cuenda ñu chii ndaha ra xaan iñi chii —catyí ra Jesús.

⁴⁵Soco ra cachicá noo chihin ra ña cutuñi iñi ra ñáá tuhun cahán ra. Vatyí Nyoo ña chahá ra cha cacutuñi iñi ra. Ta cayuhví ra ndaca tuhun ra chi ra Jesús ñáá cha cuví cuan.

**Nu sañaha ra Jesús yóo ra cha cahnu
ca cucuvi nu nyacá ñaha Nyoo**

(Mt. 18.1-5; Mr. 9.33-37)

⁴⁶Yucuan ta ra cachicá noo chihin ra quichaha cacuvi yuhu ra tuhun nya ra cahnu ca cuví chichi cha uchi uvi tahan ra. ⁴⁷Tyicuan ta chitó ra Jesús cha chicá xiñi ra, ta quehen ra chi noo ra cuehe luhlu. ⁴⁸Ta quichaha catyí ra chi tandihi ra cuan:

—Tatu chihin sivi natiín cuenda ndo chi noo ñáyivi ña cahnu sahá chi tari ra cuehe luhlu ihya, chi yuhu natiín cuenda ndo. Ta tatu natiín cuenda ndo chii, chi maa Nyoo cha saquichi chii, natiín cuenda ndo. Vatyí ra cha ñima ri tuhun sahá maa ndo tuhun, ican ra cuví ra cahnu nuu Nyoo —catyí ra Jesús.

**Ñu cha ña cahán chi yo, ican ñu
cuan tyinyee chi yo**

(Mr. 9.38-40)

⁴⁹Yucuan ta ra Juan catyí ra chi ra Jesús:

—Maestro, nyehe ndi chi noo ra cuan. Cahán ra sivun ta tavá ra tatyí ña vaha. Soco ña chaha ca ndi. Vatyí ñima chihin yo chicá noo ra —catyí ra.

⁵⁰Tyicuan ta catyí ra Jesús chi ra:

—Ma casi ndo nu cahan ra. Vatyí yóo ra ña cahán chi yo, tumañi iñi chi yo cuahan ra —catyí ra.

**Nu catyí ra Jesús chi ra Juan
ta chi ra Jacobo vatyí ña
vaha cha chicá xiñi ra**

⁵¹Tuvi iñi ra Jesús vatyí cha nyaña yatyin cha tahán chi

cunuhu ra gloria, ta sandunii ra iñi ra. Ta quehen ra ityi ta cuahan ra Jerusalén nu cucuví ra. ⁵²Ta tachí ra tyiño na cahun coyo ra cachicá noo chihin ra ityi nuu ca noo ñuu ityi Samaria. Vatyí canducu ra nu nyitatu ra. ⁵³Soco ñu Samaria cuan, ña cuñi ñu cha ndoo ra yucuan, vatyí tuví iñi ñu vatyí Jerusalén cuahan coyo ra, ta ñu Samaria ña cuví nyehe ñu chi ñu Jerusalén.

⁵⁴Cuhva cha chitó ra Jacobo ta ra Juan cha ña chahá ñu Samaria cuan cha ndoo ra yucuan, cuxaan ra. Ta quichaha catyí ra chi ra Jesús:

—Sutu Mañi yuhu, ¿atu cuñun cha sacuvi yo tari sacuvi ra Elías? cacan yo chi Nyoo na saquichi ra ñuhu andivi siqui ñáyivi Samaria cuan, vatyí cayu ñu vatyí ña cuñi ñu cha ndoo yo ñuu ñu —cacatyí ra.

⁵⁵Tyicuan ta nanyehe ra Jesús chi ra. Ta cahan ra chi ra ta catyí ra:

—Taxi ri ndo. Vatyí ña cutuñi iñi ndo ñáá tyiño vachi yuhu. ⁵⁶Vatyí yuhu Rayi cha quichi nya gloria, ña vachi vatyí sanai añima ñáyivi, Soco vachi vatyí sacaqui chi ñu —catyí ra.

Tyicuan ta cuahan coyo ra inga ñuu.

Ñu cha cuñi quihvi cuenda ra Jesús

(Mt. 8.19-22)

⁵⁷Ta cuhva cha cachica ityi ra, quita noo ra, ta catyí ra chi ra Jesús:

—Sutu Mañi yuhu, cuñi cunyiquen chuun. Ta chihin chuhun tandihi ri ityi cuahun —catyí ra.

⁵⁸Yucuan ta catyí ra Jesús chi ra: —¿Atu ndichon? Vatyí yuhu ñahri maa cha iyó chii. Ñaña iyó vehe ti.

Ta saa iyó taca tí. Soco yuhu Rayii cha quichí nya gloria ñahri maa nu cava xiñi iyó —catyí ra chi ra cuan.

⁵⁹Tyicuan ta catyí ra Jesús chi inga ra:

—Coho chihin.

Tyicuan ta nacahan ra cuan ta catyí ra:

—Tata, cuatu noo chii, na cuhun xihne cucuchi chi suti —catyí ra.

⁶⁰Tyicuan ta ra Jesús nacahan ra ta catyí ra chi ra:

—Sandoo chi ñu ña ñohó nuu chi Nyoo natyihí maa ñu chi tahan ndiyi ñu chichi ñuhu. Soco yoho cuahan cua cahan tuhun Nyoo chihin ñáyivi nacuhva cuenda ñu chi ñu chi Nyoo na cunyaca ñaha ra chi ñu —catyí ra.

⁶¹Tyicuan ta quichaha catyí inga ra chi ra Jesús:

—Tata, cuñi cunyiquen chuun.

Soco cuhva xihna na cuhin cucahin chihin ñu vehi —catyí ra.

⁶²Tyicuan ta ra Jesús catyí ra:

—Tari noo ra tahví ñuhú chihin arado, tatu nanyehe chata ra ña quita vaha yucun nu sahá tyiño ra. Ta tyicuan caa cuví noo ra nyicón chii, tatu yihí iñi ra cha sandoo ra, ña yihí vaha iñi ra cha cuví cunyaca ñaha Nyoo chi ra —catyí ra Jesús chi ra.

Nu tachí ra Jesús chi uñi xico uchi tahan ra cucahan tuhun Nyoo chihin ñáyivi

10 Cha yaha tuhun cuan ta nacachí Sutu Mañi yo Jesús chi inga uñi xico uchi tahan ca ra. Ta tachí ra chi uvi uvi ra noo noo ityi cuahan ra tandihí ñuu ta tandihí ityi nu tahan chi cuhun ra Jesús. ²Ta catyí ra chi ra:

—Tari noo itu cahnu vavaha, tyicuan caa nu tyiño sahí. Soco ña cuaha musu. Yucuan chaha çacan ndo chi Nyoo na saquichi ca ra musu. Vatyí tyinyee ra chi ndo cahan ndo tuhun ra chihin ñáyivi. ³Ta cuahan ndo ta nyehe ndo vatyí cua sacuhin chi ndo tari mbee mahñu lobo. Vatyí lobo tuhvá tí chachí tí chi mbee. Ta tyicuan caa cucuñi ñáyivi satasi iñi ñu chi ndo. ⁴Ta ma cuiso ndo ni yono ta ni cha quihí xuhun ndo, ni inga ityi ndichan ndo. Sanumi ndo. Ta ma cohon vaha ndo ityi ndatuhun ndo tuhun cha ñima ri tuhun. ⁵Cuhva cha quihvi ndo chichi vehe noo ñáyivi, çahan vaha ndo chihin ñu. Ta catyí ndo, na coo cha vaha aña ñu. ⁶Ta tyicuan caa tatu iyó ñáyivi vaha vehe cuan, ndoo cha vaha cuan chihin ñu. Soco tatu yori ñu vaha aña, ma ndoo cha vaha chihin ñu. ⁷Ta ndoo ndo suri maa vehe cuan. Tatu chaha ñu cha cachi ndo, çachi ndo. Tatu chaha ñu cha coho ndo, coho ndo yucuan. Vatyí ra sahá tyiño, iyó ityi chi ra cha cachi ra cha sahá ganaa ra. Hín ri maa vehe cuan cunyaa ndo nyacua nya cha chaa chi quiví cha cuhun ndo inga ñuu. ⁸Ta nu chaa ndo noo ñuu ta vaha cahan ñu chihin ndo, çachi ndo ta coho ndo tandihí cha cuhva ñu chi ndo. ⁹Ta sanduvaha ndo chi ñu cuhví ñuu cuan. Ta çatyí ndo chi ñu: “Cha nyaña yatyin Nyoo ra cunyaca ñaha aña ndo.” ¹⁰Soco tatu chaa ndo noo ñuu ta ña cuñí ñu tyasoho ñu tuhun cahan ndo, quita ndo ityi cahnu. Ta çatyí ndo chi ñu: ¹¹“Nyacua nya ñiyaca ñuu ndo cha iñi chaha ndi, ta

cunaquisi ndi. Vatyí tari noo seña vatyí ndoo cuatyí ndo síqui ndo. Vatyí Nyoo nyaña yatyin ra chi ndo ta ña tyasohó ndo tuhun cahán ra yoso caa cuñí ra cunyaca ñaha ra añima ndo.” Tyicuan caa catyí ndo chi ñu —catyí ra Jesús chi ra nyicón chi ra.

¹²Ta quichaha catyí tucu ra chi ra: —Quívi tachi tuñi Nyoo chi ñáyivi, yaha ca cuhva cunyehe ñáyivi ñuu cuan tundoho, ta ñima ca ñáyivi chiyó ta cha naha ñuu Sodoma, ñu chihí cha catyí cuatyí ñu —catyí ra Jesús.

Ñáyivi ña tyasohó tuhun cahán ra Jesús cunyehe ñu tundoho

(Mt. 11.20-24)

¹³Ta catyí ra: —iNdahvi nyoho, ñáyivi ñuu Corazín! Ta indahvi nyoho, ñáyivi ñuu Betsaida! Vatyí nyehé ndo nyatu cahnu, ta ña nasamá ndo cuhva iyó ndo. Soco ñáyivi ñuu Tiro ta ñuu Sidón cha sanaq Nyoo ta cha naha cha cuenda cuatyí ñu, ñahri nyatu cahnu nyehé ñu. Soco tyehe ta nyehé ñu quívi cuan cha nyehé nyoho vityin, tañi tyehe ri ndihvi noo ñu sahna tucuihya iñi ta cunyaa ñu nu ñiyaa. Tari cuhva costumbre iyó maa ñu, noo seña vatyí ndu uvi iñi ñu cuatyí ñu cuví cuan. ¹⁴Yucuan chaha, nyoho ñuu Corazín chihin ñuu Betsaida, ñihi ca cutachi tuñi Nyoo chi ndo ican saha ñáyivi Tiro ta ñáyivi Sidón cuan. ¹⁵Ta nyoho ñu ñuu Capernaum, cuñí maa ndo vatyí cundaa ndo nyacua nya andivi. Soco cunoo ndo nyacua nya anyaya, vatyí ña quichahá ndo tuhun Nyoo —catyí ra Jesús.

¹⁶Ta catyí ra chi ndi uñi xico uchi tahan ra cuan:

—Ñáyivi cha tyasohó tuhun cahán nyoho, tuhun cahán yuhu tyasohó ñu cuví cuan. Ta ñu ña quichahá tuhun cahán nyoho, tuhun cahán yuhu ña quichahá ñu cuví cuan. Ta ñu ña quichaha tuhun cahán yuhu, tuhun cahán ra cha saquichí chii, ña quichahá ñu cuví cuan —catyí ra Jesús chi tandihí ra.

Nu nachaa coyo ndi uñi xico uchi tahan ra cha chichahán tuhun Nyoo

¹⁷Yucuan cuví nu nachaa coyo ndi uñi xico uchi ra cha chichahán tuhun Nyoo chihin ñáyivi. Ta sii xaan cacuví chi ra. Ta cacatyí ra chi ra Jesús:

—Sutu Mañi yuhu, nyacua nya tatyí ña vaha ta quichahá tuhun cahán ndi tatu cahán ndi sivun —catyí ra.

¹⁸Tyicuan ta catyí ra Jesús chi ra: —Ay, yuhu nyehí andivi nu cana cava cuihna, ra nañi Satanás. Tari noo tacha, tyicuan caa cana cava ra. ¹⁹Ta yuhu, chahí fuerza chi ndo vatyí cuví chasaha ndo chi ra ña vaha cuan. Ta cuví cuaca chaha ndo síqui coo ta tisuhma, ta ñahri cha cuví chi ndo. ²⁰Soco ma sii xaan cuví chi ndo vatyí cuví tava ñehe ndo tatyí ña vaha cuan. Sii ca cuví chi ndo vatyí nyaá sivi ndo nu libru Nyoo —catyí ra Jesús.

Nu sacahnú ra Jesús chi Nyoo vatyí sii cuñí ra vatyí sañahá Nyoo tuhun vaha chi ñu ndahvi

(Mt. 11.25-27; 13.16-17)

²¹Cuhva cuan sii xaan cuñí ra Jesús sahá Tatyí Ii Nyoo, ta catyí ra: —Sacahní chuun, Sutu Mañi yuhu, vatyí nyacá ñahun andivi ta ñuhu

ñayiv̄i. Vatyí maun sañahún tuhun maun chi ñu ndahvi ihya. Ta ña sañahún chi ra chitó ta ra cha chiñi tuñi. Tyicuan caa Sutu Mañi yuhu vatyí tyicuan caa cuhva cuñún — catyí ra Jesús.

²²Ta catyí ra Jesús chi tandihi ra sacuví tyiño nuu ra:

—Tandihí maa tuhun cuan chah̄a Suti chii. Yori ñohó nuu chii, noo tuhun ri maa Suti ñohó nuu chii. Ta yori ñohó nuu chi Suti, noo tuhun ri mai ñohó nui chi ra. Ta chi ñáyiv̄i cuñí mai sacote tuhun ra, chi ñu cuan cusacote —catyí ra.

²³Tyicuan ta nanyeh̄e ra chi ra cacticá noo chihin ra. Ta catyí ra chi ra:

—Sii xaan cuñí nyoho ta ñáyiv̄i cha iyó vityin vatyí nyehé ndo cha sacuví. ²⁴Vatyí cuaha xaan rey ta ra profeta Nyoo ta cha naha cuñi ra nyeh̄e ra cha nyehé nyoho vityin. Soco ña nyeh̄e ra. Ta cuñí ra cuiñi ra tuhun cha chiñi nyoho vityin. Soco ña chiñi ra —catyí ra Jesús.

**Nu sañah̄a ra Jesús chi yo
vatyí tahán chi tyinyee yo
chi ñáyiv̄i savaha ri**

²⁵Tyicuan ta chāa noo ra sacuahá cuenda ley vehe ñuhu. Ta quichaha ndaca tuhun ra chi ra Jesús, Vatyí nducu nyeh̄e ra chi ra. Ta catyí ra:

—Maestro, ¿yoso caa cunyacuvi ta cuhin nu coi noo ñayiv̄i cha ma naa ca maa?

²⁶Tyicuan ta nacahan ra Jesús, ta catyí ra:

—¿Ñáá catyí nu ley? ¿Yoso caa tuhun cha sacuahún?

²⁷Tyicuan ta nacahan ra sacuah̄a cuenda ley cuan ta catyí ra:

—Catyí ley, cuñi yo chi Nyoo chihin tandihí añima yo ta chihin cha nii iñi yo, ta chihin tandihí fuerza yo, ta chihin cha tandihí cha chiñi tuñi xiñi yo. Ta cuñi yo chi ñáyiv̄i tahan yo tari cha cuñí yo chi maa yo. Tyicuan caa catyí chi —catyí ra cuan.

²⁸Tyicuan ta catyí ra Jesús chi ra:

—Ndicha cha cahún. Tyicuan caa sacuvun ta cacu añimon ta coun ñayiv̄i cha ma naa ca maa —catyí ra Jesús.

²⁹Soco ra sacuah̄a cuenda ley cuan cuñí ra savaha ra chi ra, ta quichaha catyí tucu ra chi ra Jesús: —¿Yóó cha cuví ñáyiv̄i tahin? —catyí ra.

³⁰Tyicuan ta nacahan ra Jesús, ta catyí ra:

—Noo ra quit̄a ra Jerusalén ta cuahan ra nya ñuu Jericó. Ta tahan ra chi ra suhu. Ta suhu ra tandihí cuii maa cha nyiso ra, nyacua nya sah̄ma ra. Ta cañi ra chi ra nyacua chacun taxin ra chi ra. Ta sandoo maa ra chi ra yucuan. ³¹Tyicuan ta yah̄a noo tata sutu ityi cuan. Soco cuhva cha nanyeh̄e ra chi ra catuví cuan nya sava ri yah̄a ra.

³²Tyicuan ta yah̄a tucu nonga ra cha yih̄i cuenda vehe ñuhu, cha nañi levita. Soco cha nanyeh̄e ra chi ra catuví cuan suri nya sava ri yah̄a ra. ³³Tyicuan ta quichi tucu noo ra Samaria. Ta cua yaha tucu ra suri ityi cuan. Ta nanyeh̄e ra chi ra catuví yucuan, ta quichi nundahvi cuñi ra nyeh̄e ra chi ra. ³⁴Ta tuhva ra nu catuví ra, ta quichaha saha ra tatan chi ra. Ta tyih̄i ra aceitye ta vinu nu cahvi chi ra. Ta sahvi ra noo sah̄ma chata ra.

Yahā cuan ta sandaa ra chi ra burru sana ra, ta naquehen ra chi ra, ta cuahan ra chihin ra nu nyaá noo vehe. Ta yucuan saha cuenda ra chi ra. ³⁵Ta cha inga quivi cha cuñí cuhun ra Samaria cuan. Ta tava ra uvi tahan xuhun. Ta chaha ra chi chitoho vehe cuan. Ta catyí ra chi ra: “Saha cuenda vahun chi ra ihya. Ta cūhvon cha cachi ra. Ta saton tatan chi ra na nduvaha ri ra. Tatu cuñí ca chi xuhun, tyiyahvi mai chuun nandichi”, catyí ra. Yucuan ta cuahan ra —catyí ra Jesús.

³⁶Nu ndihí nacatyí ra Jesús tuhun ihya, quichaha ndaca tuhun ra chi ra sacuahā cuan, ta catyí ra:

—Vaha. ¿Chichi cha uñi tahan ra cuan, nya ra cuví ra tahan ra ndahvi cuan? —catyí ra Jesús.

³⁷Tyicuan ta quichaha catyí ra sacuahā cuan:

—Ra cha cundahvi cuñi chi ra —catyí ra.

Tyicuan ta quichaha catyí ra Jesús:

—Cuahan ta saçuvi tucu yoho tyicuan caa chihin ñáyivi cha iyó tundoho chii —catyí ra.

**Nu chinyaā ra Jesús vehe cu
Marta chihin cu María**

³⁸Ta quehen ra Jesús ityi cuahan ra. Ta chaā ra noo ñuu. Ta yucuan iyó noo ñaha cha nañí Marta. Ta chaā ra vehe ña. ³⁹Ta cu Marta iyó noo cuhu ña cha nañí María. Ta cu María chicunyaā ña yatyin ri chaha ra Jesús, vatyí cuiñi ña tuhun cahán ra. ⁴⁰Soco cu Marta cuaha xaan tyiño nyaá sacuvi ña. Ta chaā ña nu nyaá ra Jesús, ta quichaha catyí ña chi ra:

—Tata. ¿Atu ña chicá xiñi yoho vatyí cuhi sandoó maa ña chii chihin tyiño? Catyí chi ña na tyinyee ña chii —catyí ña chi ra.

⁴¹Soco ra Jesús catyí ra chi ña:

—Marta, Marta, chicá xaan xiñun ta cutyiño xaan cuñun chihin tyiño chiña. ⁴²Soco iyó noo tuhun cha tahán chi caca xiñi yo. Ta cu María ihya nacachí ña tyiño vaha ca sacuvi ña cha tyasohó ña tuhun cahín. Ta yuhu ma cuvi tinyai chi ña —catyí ra Jesús chi cu Marta.

**Nu sañaha ra Jesús chi ra cachicá
noo chihin ra yoso caa cacān tahvi
ra chi Nyoo**

(Mt. 6.9-15; 7.7-11)

11 Cuví noo chaha cha chicán tahvi ra Jesús. Ta cuhva cha ndihí chican tahvi ra, ta quichaha catyí noo ra chicá noo chihin ra chi ra:

—Sañaha chi ndi yoso caa cacān tahvi ndi chi Nyoo. Tari sañaha ra Juan chi ra chicā noo chihin ra —catyí ra.

²Tyicuan ta catyí ra Jesús chi ra: —Cua cuhve cuhva chi ndo yoso caa. Tyehe caa caçān tahvi ndo:

Sutu Mañi yuhu, yoho cha nyaun andivi. Sacahnu xaan ndi chuun.

Na quichi quivi cha nyaca ñahun ihya siqui ñuhu ñayivi. Na sacuvi ñáyivi ihya siqui ñuhu ñayivi tandihí cuhva cuñí maun, tari cuhva cuví gloria.

³Cuhva cha cachi ndi tacuhva yoso cuhva yaha ndi noo noo quivi.

⁴Saha tucahnu iñi chi ndi. Tari maa ndi sahá ndi tucahnu iñi chi ñu tasi iñi chi ndi.

Ma cuhvon cha nducu nyehe ra ña vaha chi ndi, soco sacacu chi ndi tacuhva ma sacuvi ndi cuatyí nuun.

Tyicuan caa cacan tahvi ndo — catyí ra Jesús.

⁵Ta catyí tucu ra ñandihí:

—Saha yo tuhun tyi nyoho iyó noo amigon, ta chaa ra vehun cha ñuu ta catyí ra chuun: “Xaa, saha tumañi ñi chii, cuhva noo uñi tahan pan chii. ⁶Vatyí noo ra tahin nichaa ra vehi. Ta cañi xaan quichi ra. Ta ñahri maa cha iyó chii cuhve chi ra.” ⁷Ta yoho cunacahun ta catyun chi ra: “Ma sayangon chii, ndee. Vatyí nyasí yuvehi. Ta niquixi chihin sehi. Ta ña cuvi nducuite ta cuhve cha cuhve chuun cha vityin.” Tyicuan caa cucatyun chi ra. ⁸Ta catyí yuhu chuun. Vasi ra tahun cuví chi ra, ma nducuiton ta cuhvon chi ra cha numi ri. Soco tatu ndoo ra yucuan, ta ma cundihñi ra cacan ra chuun, sacachan ra yuehun ta cana chaa ra chuun tacuhva cha ma cuvi cusun, ta cundihñun cha sacachan ra yuehun, tyicuan ta nducuiton ta cuhvon chi ra, tacuhva cha ma sayanga ca ra chuun. ⁹Ta tyicuan caa tucu nyoho, caçan ndo chi Nyoo. Ta cuhva ra chi ndo. Nanducu ndo ta ñihi ndo. Sacachan ndo yuvehe ta nuña. ¹⁰Vatyí tatu chican ndo, ñihi ndo. Tatu nducu ndo, ñihi ndo. Ta tatu sacachan ndo yuvehe, nuña yuvehe.

¹¹Tyicuan caa tucu nyoho cha iyó sehe ndo. Chahá ndo cha vaha chi sehe ndo. Ña tuhvá ndo chahá noo yuu chi sehe ndo tatu chican ndotyin pan. Ta ña tuhvá ndo

chaha ndo noo coo chi sehe ndo, tatu chicán ndotyin tiyaca. ¹²Ta ña tuhvá ndo chaha ndo noo tisuhma chi sehe ndo tatu chicán ndotyin ndivi cachi ndotyin. ¹³Nyoho cha quiñi iyó ndo, soco chitó ndo yoso caa cuhva ndo cha vaha chi sehe ndo. Ta vihi ca Sutu Mañi yo cha nyaá andivi, cuaha ca cha vaha cuhva ra chi ndo tatu cacan ndo chi ra. Ta cuhva ra Tatyí Ii ra cunyaa añima ndo.

Ra xaan ñi chi ra Jesús catyí ra vatyí chihin fuerza cuihna sacuví ra milagru

(Mt. 12.22-30; Mr. 3.20-27)

¹⁴Ra Jesús tavá ra tatyí ña vaha cha yihí chi noo ra cha ñihi sahá cuihna. Ta cuhva cha quitá tatyí ña vaha cuan chi ra ñihi cuan, nacahān ra. Tyicuan ta ñáyivi, iyo xaan cuñi ñu. ¹⁵Ta yihí ñu catyí ñu: —Ra ihya, tavá ra tatyí ña vaha soco chihin fuerza ra Beelzebú ra cuví nuu chi cuihna —catyí ñu.

¹⁶Ta yihí ñu cuñi ñu nducu nyehe ñu chi ra, ta chicān ñu chi ra Jesús na savaha ra noo seña chi ñu chihin tunyee ñi Nyoo. ¹⁷Soco ra Jesús chitó ra tuhun chicá xiñi ñu. Ta quichaha catyí ra chi ñu:

—Tatu gobiernu ta cacusiin ra, cuaha ri ityi nanduvi ra, cuchañi tahan ra chihin tahan ra, ta cundihi tuhun cha cunyaca ñaha ra. Tatu noo vehe ta cacusiin ñu chihin tahan ñu, cutivi nu nyicú ñu. ¹⁸Ta tyicuan caa tucu cuihna. Tatu tandihí ra cacusiin ra chihin tahan ra cundihi fuerza cha iyó chi ra. Ta ihya catyí chi ndo tyehe caa vatyí nyoho catyí ndo vatyí chihin

fuerza ra Beelzebú tavé tatyí ña vaha. ¹⁹Soco tyehe ta tavé tatyí ña vaha tari cuhva catyí ndo, ndaca tuhun ndo chi ra nyicú chihin ndo yóo chi fuerza tavá maa ra tatyí ña vaha. Maa ra sacoto ra chi ndo cha ndicha vatyí nyoho tondo ri chicá xiñi ndo. ²⁰Soco catyí chi ndo vatyí yuhu tave tatyí ña vaha chihin fuerza Nyoo. Ta cuñí chi catyí cuan vatyí ndicha cuii Nyoo ra nyacá ñaha añima ñáyivi cha chaꝥ ra nu nyicú ndo.

Nu sañahá ra Jesús vatyí ñihi ca fuerza Nyoo ta ñima ca fuerza cuihna

²¹Tatu noo ra iyó vavaha fuerza chi ra ta nyisó ra mityi ra, ta sahá cumi ra vehe ra. Ñohó xehe vaha ndaha tyiño ra chichi vehe ra tacuhva cha ma cuvi tinyaa ra suhu. ²²Soco tatu quichi inga ra cha cuaha ca fuerza iyó chi, ta cañi tahan ra chihin ra, ta cuvi chasaha ra chi ra, tyicuan ta tinyaa ra ndaha tyiño ra, ta sacha ra chi ra tahan ra. ²³Ñáyivi ña sahá tyiño chihin, sativí ñu tyiño sahí. Ta ñu ña tyinyeé chii cha cahán ñu tuhun Nyoo chihin ñáyivi, cuñí chi catyí vatyí ña chahá ñu cha coto ñáyivi tuhun cahín.

Nu sañahá ra Jesús chi yo yoso caa ndichi tucu tatyí ña vaha inga chaha tatu naa iñi yo chi Nyoo

(Mt. 12.43-45)

²⁴Tatu noo tatyí ña vaha quita chi noo ñáyivi, chicá noo chi noo ñuhu ityi, nanducú chi noo nu nyitatu chi. Soco ña nañihi maa chi nu nyitatu chi, tyicuan

ta ndichi xiñi chi: “Cunuhu tiqui nya vehi nu quite.” ²⁵Yucuan ta nachaa chi añima nu quita chi. Ta nanyehe chi vatyí ndii xaan ta vii xaan. ²⁶Tyicuan ta cua naquehen chi ucha ca tahan tatyí ña vaha cha yaha ca cuhva ta ican saha maa chi. Tyicuan ta iin ri quihvi tandihi chi añima ñu cuan. Yucuan chaha yaha ca cuhva nanduvi ñu ican saha cha cuvi maa ñu —catyí ra Jesús.

Ñu cha ndicha iyó vaha ñáyivi

²⁷Cha ni ri ca cha cahán ra Jesús tuhun cuan, ta cana chaa noo ñaha cha ñohó mahñu ñáyivi cuan. Ta quichaha catyí ña:

—Ñana cha sii cuví chi ñaha cha sacacu chuun ñaha cha chaha caxun —catyí ña.

²⁸Soco ra Jesús catyí ra:
—Sii ca cuñí ñu cha chiñí tuhun cahán Nyoo ta quichahá ñu —catyí ra.

Ñáyivi ña vaha, maa ri maa nyatu cahnu cuñí ñu nyehe ñu

(Mt. 12.38-42; Mr. 8.12)

²⁹Tyicuan ta chaꝥ coyo ñáyivi nu nyaá ra Jesús. Ta quichaha catyí ra chi ñu:

—Ñáyivi cha iyó vityin quiñi xaan iyó ñu. Ta nyiyo iñi ñu. Cuñí ñu nyehe ñu seña ta cha iyo. Soco noo ri cunyehe ñu, tahan cha sacuvi Nyoo chihin ra Jonas. ³⁰Tari ra Jonás cuvi ra seña chi ñáyivi ñuu Nínive ta cha naha, tyicuan caa tucu yuhu Rayii cha quichi nya gloria, cuví tari noo seña chi ñáyivi cha iyó vityin. ³¹Quivi tachi tuñi Nyoo chi ñáyivi cunandoto ñaha cuví reina ityi sur ta cha naha, ta

cucatyí ña vatyí cuhun ndo anyaya, vatyí maa ña vasi cañi ñuu ña, soco quichí ña, quichí tyasoho ña tuhun cha chiñi tuñi cahān ra Salomón. Ta ihya cahnu ca cuví ra cha cahán chihin ndo vityin ta ñima ca ra Salomón. ³²Ta quívi cutuñi chi tandihí ñáyivi, cunducuita ñu chiyo ñuu Nínive ta cha naha, ta cucatyí ñu vatyí nyoho ñu cha iyó vityin cuhun ndo anyaya, vatyí maa ñu ñu Nínive, canasama ñu cuhva iyó ñu quívi cahān ra Jonás tuhun Nyoo chihin ñu. Ta vityin yuhu ra cahnu ca cahán chihin ndo ta ñima ca ra Jonás.

Nu sañaha ra Jesús vatyí na saha yo cuenda añima yo coto vaha ñahri cha ndichin Nyoo nyaá

(Mt. 5.15; 6.22-23)

³³Yori ndo tyaa ndo lámpara ta tyihi xehe ndo, o tyihi ndo chichi noo caja. Vatyí ñuhū cuan tahán chi coso minoo nu sucun. Tacuhva quihvi ñáyivi vehe ndo, soco ndichin. ³⁴Chiti nuu ndo noo cha sandichin chi ndo cuví. Ta tyicuan caa tucu añima ndo, tatu iyó cha ndichin Nyoo añima ndo, vaha ñáyivi cuví ndo. Tatu ñahri cha ndichin Nyoo nyaá tari noo ra cuaa cuví ndo, ña cuví nyehe ndo ityi vaha cha cuahan nu nyaá Nyoo. ³⁵Yucuan chaha saha ndo cuenda añima ndo. Tatu nyaá cha ndichin Nyoo chihin ndo, o nyaá cha ñaa iñi. ³⁶Tatu tyitu añima ndo chihin cha ndichin Nyoo ñahri ca maa noo nu ñaa iñi iyó chi ndo, vatyí sandichin chi tandihí ndo. Tari cha nyaá noo lámpara sacatá chi ñuhū chi ndo cuví cuan —catyí ra Jesús.

Cahán ra Jesús chi ra casacuaaha cuenda ley vehe ñuhu ta chi ra fariseo, ra caquichaha xaan ley cuan

(Mt. 23.1-36; Mr. 12.38-40; Lc. 20.45-47)

³⁷Cuhva cha ndihí cahān ra Jesús nuu ñáyivi, noo ra fariseo, ra quichaha xaan ley vehe ñuhu, catyí ra chi ra Jesús, vatyí na cuhun ra cucachi ra nya vehe ra. Ta chaq ra Jesús vehe ra. Ta quihvi ra chicunyaa ra mesa.

³⁸Tyicuan ta ra fariseo cuan iyo cuñí ra vatyí ña nacatya ra Jesús ndaha ra, tari cuhva costumbre maa ñu cha cumañi cachi ñu.

³⁹Soco ra Jesús catyí ra chi ra:

—Nyoho, ra cacuví fariseo, tari cha chata ri vaso ta coho sanduvii nyoho. Soco ityi chichi, quiñi caa. Vatyí ña nacatya ndo. Tyicuan caa nyoho. Vatyí cuñí ñáyivi vatyí vaha ñáyivi cuví ndo. Soco xehe ri suhu ndo ta ña sacuví ndo cha vaha. ⁴⁰Ndava xaan iñi ndo. ¿Atu ña chitó ndo vatyí ra cha savahá ityi chata vaso, suri maa ra savahá ityi chichi? Vatyí tari vaso cuví ndo. ⁴¹Tahán chi sahá ndo tumañi iñi chi ñáyivi, ta tyinyee ndo chi ñu. Sacuvi ndo cha vaha chihin ñu, tyicuan ta nduvii tucu ityi chichi ndo.

⁴²¡Ndahvi nyoho ra fariseo! Vatyí nyoho vasi vaha chaha ndo diesmo chi Nyoo cuenda yucu cha nañi menta ta ruda ta ñaa ndihí ca yucu cha tachí ndo, soco ña quichahá ndo cuhva cha vaha cha cuñí Nyoo sacuvi yo, ta cha cuñí yo chi ra. Ta ican ihya cuví cha tahán chi sacuvi ndo, soco ma sandihí ndo cha cuhva ndo diesmo ñandihí.

⁴³iNdahvi nyoho cha cuví ndo fariseo! vatyí cuñí ndo cunyaa ndo nu tyayu vaha ca chichi vehe ñuhu. Ta cuñí ndo cha saha ñáyivi ñáyivi chi ndo nuyahvi. ⁴⁴iNdahvi nyoho ra sacuahá cuenda ley, ta nyoho ra fariseo! Vaha sahá ndo chi ndo, soco cuví ndo tari noo ñaña ndíyi cha ña quetuví. Vatyí yahá ñáyivi síqui soco ña chitó ñu ñáá cha ñohó chichi ñaña cuan. Vatyí ñahri seña catuví nu yihí ndíyi cuan. Cuñí maa ñu vatyí vaha ndo, soco ña chitó ñu vatyí ña vaha añima ndo —catyí ra Jesús.

⁴⁵Tyicuan ta nacahan noo ra sacuahá cuenda ley vehe ñuhu, ta catyí ra:

—Maestro, cha catyún tyehe caa, nañi tucu chiin chi nyuhu —catyí ra.

⁴⁶Tyicuan ta quichaha catyí ra Jesús chi ra:

—iNdahvi tucu nyoho ra casacuaha cuenda ley vehe ñuhu! Vatyí sanducuaha ca ndo ley cha tachí Nyoo ta cha naha. Ta ña tahán chi. Ta yori ndoyó carga cuan, ta saniñi ndo na sacuvi ñu ta ni maa ndo ni chiin ña tyinyee ndo chi ñáyivi. ⁴⁷iNdahvi nyoho! Vatyí sanduvahá vaha ndo ñaña nu ñohó yiqui ra profeta Nyoo cha cachahñi sutu chahnu ndo ta cha naha. ⁴⁸Chihin cuan cuñí chi catyí vatyí ndoó ndo vaha cha sacuvi sutu chahnu ndo ta cha naha. Vatyí sutu ndo cachahñi ra chi ra profeta Nyoo. Ta nyoho sanduvahá ndo ñaña ra. ⁴⁹Yucuan chaha catyí Nyoo ta cha naha vatyí cutachi ra suhva ra profeta ta ra caca tyiño ra nu nyicú ndo. Ta cucahñi ndo suhva

ra ta inga ra cusacono ndo chi ra.

⁵⁰Ta ndicha tyicuan caa sacuví ndo. Nyoo cutachi tuñi ra chi ndo cha cuenda tandihi ra profeta ra cachahñi sutu chahnu ndo nyata chino ñuhu ñáyivi ta nyacua nya vityin. ⁵¹Nyacua nya niñi ra Abel cha chati cha chahñi ra Caín yañi ra, ta nyacua nya niñi ra Zacarías cha cachahñi ñu chichi vehe ñuhu vatyin nu nyaa arta. Yucuan chaha catyí Nyoo vatyí cutachi tuñi ra chi ñáyivi cha iyó vityin cha catyí cuatyí ñu chiyó ta cha naha.

⁵²iNdahvi nyoho ra casacuaha cuenda ley vehe ñuhu! Vatyí tari cha tyihí xehe ndo ndaha ticu cuenda yuvehe nu quihvi ñáyivi ityi Nyoo. Ta ni maa ndo ña quihvi ndo nu nyaá Nyoo. Ta ni ri ña chahá ndo cha quihvi inga ñáyivi cha cuñí quihvi —catyí ra Jesús.

⁵³⁻⁵⁴Ndihí cahan ra Jesús tuhun cuan, ta quita ra. Soco ra casacuaha ley vehe ñuhu chihin ra fariseo, nduxaan xaan ra ta quichaha cuquiñi cuñi ra nyehe ra chi ra Jesús. Ta canducu ra cuhva yoso caa cahan ra Jesús noo tuhun ña vaha, ta tyaa ra cuatyí síqui ra.

Nu sañahá ra Jesús vatyí ma cuví tixehe yo cuatyí yo

12 Cuenda mil ñáyivi ndu ñin ri nyacua nañi tahan ñu, vatyí cuaha xaan ñu. Tyicuan ta ra Jesús catyí xihna ca ra chi ra cacticá noo chihin ra:

—Saha ndo cuenda chi ndo chihin ra fariseo coto sandahvi ñaha ra chi ndo. Vatyí tari ndaa pan chihin yuchan iya, tyicuan caa cuví cuatyí ra tyi sahá ra tyi vaha ra. Soco

ma cuvi tixehe ra cuatyí ra. ²Vatyi ñahri noo cha ñohó xehe ta cuñún, tyi ma natuvi, ta ñahri cha xehe ta cuñun, vatyi ma coto ñáyivi. ³Yucuan chaha ñáá ndihi tuhun cha cahán ndo nu xehe, cuquita chi nu ndichin. Ta ñáá ndihi tuhun cha cahan ndo chichi vehe ndo, cucuiñi tandihi ñáyivi noo quivi.

¿Yóó chi tahán chi cuyuhvi yo, chi ñáyivi o chi Nyoo?

(Mt. 10.28-31)

⁴Ta catyí chi ndo cha cuví ndo ra tahin, vatyi ma yuhvi ndo chi ra chahñi coño ñuhu ri. Vatyi yaha tuhun cuan ta ñahri ca cha cuví sacuvi ra. ⁵Soco cua catyi chi ndo yóó chi tahán chi cuyuhvi ndo. Yuhvi ndo ta quichaha ndo, soco chi maa Nyoo ra cuví tinyaa ñáyivi ndo. Ta yaha cuan ta cuví tyihi ra añima ndo anyaya.

⁶Saa, ña yahvi nyaá ti. Cuví sata yo ohon tahan ti chihin uvi ri xuhun. Soco vasi nyihi ri ti, Nyoo ña naa iñi ra chi ni noo ti. ⁷Ta nyoho, yahvi ca nyaá ndo nu Nyoo ta ñima ca cuaha saa ta nyacua nya ixi xiñi ndo ta chitó Nyoo yoso tahan nyaá. Yucuan chaha ma yuhvi ndo.

Ma yuhvi yo cahán yo tuhun ra Jesucristo nuu ñáyivi

(Mt. 10.32-33; 12.32; 10.19-20)

⁸Catyí chi ndo vatyi nya ndo cahán ndo tuhun chihin ñáyivi, tyicuan caa tucu cucahin tuhun ndo nuu ángel Nyoo gloria. Vatyi yuhu Rayii cha quichi nya gloria cuví. ⁹Soco nya nyoho cha cahán nuu ndo cahán ndo tuhun chihin

ñáyivi, tyicuan caa tucu yuhu, ma cahin tuhun ndo nuu ángel cuenda Nyoo. ¹⁰Ta vasi cahán ñáyivi chi yuhu Rayii cha quichi nya gloria, Nyoo cusaha ra tucahnu iñi chi ñu. Soco yóó cha cahán ña vaha siqui Tatyí Ii Nyoo ma ñihi ñu tucahnu iñi cuenda cuan.

¹¹Cuhva cha cunyaca ñáyivi chi ndo chichi vehe ñuhu, o nu juez, o nuu ra cuví tyiño, ma caca xiñi ndo ñáá tuhun cunacahan ndo. ¹²Vatyi cuhva cha cua nacahan ndo, yucuan cuhva cuhva maa Tatyí Ii Nyoo ñáá tuhun tahán chi nacahan ndo —catyí ra Jesús.

Nu chahá ra Jesús cuhva vatyi ña tahán chi cunyicon yo cha tyayii

¹³Noo ra cha ndihi chihin ñáyivi cuaha cuan, catyí ra chi ra Jesús: —Maestro, catyi chi yañi vatyi natahvi sava ra cha tyayii cha sandoo sutu ndi chi ndi —catyí ra.

¹⁴Tyicuan ta catyí ra Jesús chi ra: —¿Yóó cha tyiso chi yuhu cha cuví juez ta catyi ndo vatyi tahvi sava yuhu cha chii ndo? —catyí ra.

¹⁵Tyicuan ta quichaha catyí tucu ra:

—Saha ndo cuenda ta ma nyiyo iñi ndo cha tyayii. Vatyi ña chiñuhú ri cha coo cuaha ndaha tyiño yo tacuhva coo vaha yo ñáyivi —catyí ra.

¹⁶Tyicuan ta chahá ra Jesús noo cuhva ihya chi ñu:

—Chiyó noo ra tyayii. Ta cuaha xaan tyiño sahá ra iyó. ¹⁷Tyicuan ta ndichi xiñi ra: “¿Yoso caa cusacuví? Ñahri nu naquehen vahi tandihi tyiño sahi. ¹⁸Soco cha chité yoso caa cunyacuvi. Cusatani yaca nyihi

nu yihí niñi, vatyí nyihi xaan. Ta cusavahi cha nahnu ca. Ta yucuan cunaquehen vahi tandihi maa niñi cha cuquita nu iyó tyiño sahi. ¹⁹Tyicuan ta cuaha cuiya ma saha tyiño que. Cunyatati ta cusii cuñi. Ta cachi vahi. Ta cucoho vahi”, ndichi xiñi ra. ²⁰Soco catyí Nyoo chi ra: “Tondo xaan iyón. Vatyí vityin cha cuaa cucúvun. Ta cha cumí vahun zyóó chi cua ndoo?” ²¹Tyicuan caa cuvi chi ñáyivi cha sacayá tandihi cha tyayii soco ñahri maa iyó chi ñu nuu Nyoo — catyí ra Jesús.

Ma caca xaan iñi yo ñáá ndihi cha chiñuhú chi yo

(Mt. 6.25-34)

²²Tyicuan ta quichaha catyí ra Jesús chi ra cachicá noo chihin ra: —Catyí chi ndo, vatyí ma caca xaan xiñi ndo yoso caa ñihi ndo cha cachi ndo, ta tuhun sahma cuihno ndo. ²³Vatyí yahvi ca nyaá ñáyivi yo ican saha cha cachi yo. Ta yahvi ca nyaá coño ñuhu yo ican saha cha cuihno yo. ²⁴Saha ndo cuenda saa vatyí ña sahá tyiño ti. Ta ni ri ña naquehén vaha ti cha cachi ti. Soco chachí ti, vatyí Nyoo chahá ra cha cachi ti. Ta nuu Nyoo yahvi ca nyaá nyoho ta ñima ca saa. ²⁵Ta vasi chicá xaan xiñi ndo soco ma cuvi sandusucun ca ndo ni chiin ca chi ndo. ²⁶Tatu ni chiin cuan ña cuví chi ndo, ñáá tuhun cha chicá xaan xiñi ndo tuhun tandihi ca cha chiñuhu chi ndo?

²⁷Saha ndo cuenda yoso caa iyó tu ita vatyí ña sahá tyiño tun. Soco catyí chi ndo vatyí ni rey Salomón chihin tandihi cha

tyayii ra ta ña tyaqui cha ñihno ra tari cha sacuihno Nyoo chi tu ita cuan. ²⁸Tatu tyicuan caa sacuihno Nyoo chi tun ita cha iyó nu chiqui vityin, ta tyaan cucayu tun chichi horno, ta nyaca cuví chi nyoho ta ma sacuihno ra. Soco maa ndo ña chinó vaha iñi ndo chi ra. ²⁹Ma caca xaan xiñi ndo tuhun cha cachi ndo ta cha coho ndo. ³⁰Vatyí ñáyivi cha ña chinó iñi chi Nyoo chicá xiñi ñu tuhun ihya. Soco nyoho chinó iñi ndo chi Sutu yo Nyoo ta maa ra chitó ra ñáá cha chiñuhú chi ndo. ³¹Vaha ca cha nanducu ndo yoso caa nacuhva cuenda ndo chi ndo chi Nyoo vatyí cunyaca ñaha ra aña ndo. Ta tyicuan caa ta ñihi ndo tandihi cha chiñuhú chi ndo.

Cha vaha cha iyó gloria

(Mt. 6.19-21)

³²Ma yuhvi nyoho, mbee sane. Vasi ña cuaha ndo soco Sutu yo Nyoo cuñi ra chi ndo. Yucuan chaha cucuhva ra quihvi ndo nu nyacá ñaha ra. ³³Xico ndo cha iyó chi ndo. Ta cuhva ndo chi ñu ndahvi. Tatu sacuví ndo tyehe caa, sacayá ndo cha vaha nuu Nyoo cuví cuan. Vatyí nuu Nyoo ña ndihí cha vaha cuan. Vatyí ni ri ra suhu, ni quití, yori cha sativi iyó yucuan. ³⁴Vatyí nuu cunyaa cha tyayii ndo, yucuan cuví nu nyaá xiñi ndo. Ta yucuan cucunyaa aña ndo —catyí ra.

Nu sañahá ra Jesús chi yo yoso caa cuatu tuhva yo chi ra quivi quichi ra inga chaha

³⁵Cuatu tuhva vaha ndo quivi quichi inga chaha. ³⁶Ta cuvi ndo

tari musu cha canyatú tuhva chi chitoho ñáá cuhva ndichi ra cha cuahan ra noo vico tandaha. Ta nyatú tuhva ra, vatyí tacuhva tañi tyehe ri nuña ra yuvehe cuhva cha sacachan chitoho ra cha nachaa ra. ³⁷⁻³⁸Ta caa cuhva ri cuan sii xaan cuñí ra nyehe ra chi ra. Vatyí nyatú tuhva ra chi ra nyacua nya nachaa ra, vasi cha cuaa, vasi ñaa ca. Ta cuatyaa ra chi musu cuan yuhu mesa ta cacachi ra. Tyicuan ta sii xaan cucuñi musu cuan. Vatyí tyicuan caa nyacuví chitoho ra chihin ra. ³⁹Ta coto ndo tuhun ihya vatyí tatu noo chitoho noo vehe, ta coto ra ñáá cuhva cuquihvi ra suhu vehe ra, saha ra cuenda vehe ra. Ta ma cuhva ra quihvi ra suhu cuan chichi vehe ra. Vatyí coto quehen ra tandihi cha iyó chi ra. ⁴⁰Ta tyicuan caa cuví tucu nyoho, cuatu tuhva ri ndo. Vatyí yuhu Rayii cha quichi nya gloria, sana ri iñi ndo ta cuquichi —catyí ra Jesús.

Musu vaha ta musu ña vaha

(Mt. 24.45-51)

⁴¹Tyicuan ta quichaha ndaca tuhun ra Pedro chi ra Jesús:
—¿Yóo chi cuenda cahun tuhun ihya? ¿Atu cha cuenda maa ri maa ndí, o cha cuenda tandihi ñáyivi?

⁴²Tyicuan ta nacahan ra Jesús, ta catyí ra chi ra:

—Musu cha tyasohó tuhun cahán chitoho, yucuan cuví musu vaha. Vatyí sahá cuenda ra vehe chitoho ra. Ta vaha ri cuhva chahá ra cha cachi tandihi ca musu cuan. ⁴³Ta sii xaan cuví chi musu cuan tatu cuhva cha sahá tyiño ra, ta nachaa chitoho ra. Vatyí quichaha ra

tandihi cha tahán chi sacuvi ra.

⁴⁴Ta catyí chi ndo vatyí cha ndicha cuví. Vatyí chitoho ra cunatyaa ra tandihi cuii cha cumí ra ndaha ra. Vatyí vaha quichahá ra chihin tyiño sahá ra. ⁴⁵Soco tatu chicá xiñi musu cuan vatyí naha xaan cuahan chitoho ra, ta quichaha nyacuvi ra cha ña vaha chihin ñu nyaá tyiño yoo, ta chihin ra canyicú tucu sahá tyiño cuan. Ta ña cuñí ra sahá tyiño ra. Tyiño chachí ta tyiño chihí ndixi iyó ra. ⁴⁶Tyicuan ta sana iñi ra ta ndichi chitoho ra quivi cha ña nyatú ra chi ra noo cuhva cha ña chito ra. Tyicuan ta cutachi tuñi chitoho ra chi ra, tari tuhva maa ra chihin musu cha ña quichahá tuhun cahán ra.

⁴⁷Ta noo musu cha chitó yoso caa iyó chitoho ta ña sacuvi tari cuhva cuñi chitoho ra, cuaha xaan tundoho cunyehe ra. ⁴⁸Soco tatu noo musu cha ña chitó ta sacuvi ra cha ña vaha, tachi tuñi chitoho ra chi ra. Soco chiin ri, vatyí ña chitó ra, ta chinyacuví ra. Tatu noo musu ta cuaha cha chaha chitoho ra chi ra, cuaha tahán chi nacuhva cuenda ra chi chitoho ra. Ta ra cha cuaha xaan nyaá ndaha, cuaha xaan tahán chi nacuhva cuenda ra chi chitoho ra.

Nu catyí ra Jesús vatyí cha catyí ra cucañi tahan ñáyivi chihin tahan ñu

(Mt. 10.34-36)

⁴⁹Tari cha sanatahín ñuhü siqui ñuhu ñáyivi, tyicuan caa cuví tyiño vachi. iÑana cha cuñí cha nacayu catyin ri ñuhü ihya! ⁵⁰Vatyí nyaá yahi noo tundoho cahnu, ta ñana cha nyehí tundoho nyacua nya

ndihi tyiño sahí. ⁵¹Cuñí maa ndo vatyí cha vachi cuhve cha taxi ri coo ndo siquí ñuhu ñáyiví ihya. Soco yuhu vachi vatyí sasiin chi ndo. ⁵²Vatyí cha vityin ta ityi nuu ca, ohon ñáyivi noo vehe cucusiin ñu. Uñi ñu cañi tahan chihin uvi ñu. Ta uvi ñu cucañi tahan chihin uñi ñu. ⁵³Ta ra cuví sutu, cucañi tahan ra chihin sehe ra. Ta ra cuví sehe cucañi tahan ra chihin sutu ra. Ta ñu cuví sihi cucañi tahan ñu chihin sehe ñu. Ta ñu cuvi sehe cucañi tahan ñu chihin sihi ñu. Ta ñu cuví tyiso cucañi tahan ñu chihin chono ñu. Ta ñu cuví chono cucañi tahan ñu chihin tyiso ñu —catyí ra Jesús.

Nu catyí ra Jesús chi ñáyivi vatyí ña nacotó ñu vatyí cha chaá quívi cha quichi Sehe Nyoo

(Mt. 16.1-4; Mr. 8.11-13)

⁵⁴Catyí tucu ra Jesús chi ñáyivi cuaha cha nyicú yucuan:

—Tatu cha nyehe ndo vatyí cha ndihví vico, catyí ndo vatyí cua coon savi. Ta tyicuan caa cuví.

⁵⁵Tatu cha nyehe ndo vatyí cha caá tatyí ityi tyañuhu, catyí ndo vatyí cha chaá quívi ihñi. Ta tyicuan caa cuví. ⁵⁶Nyoho sahá ndo tyi chitó ndo, ta nacotó ndo tandihí tuhun andívi, ta tandihí tuhun ñuhu ñáyiví. Soco ñááá tuhun cha ña nacotó ndo ñáá tyembu nyaá ndo vityin?

Nducu yo cuhva yoso caa coo vaha yo chihin ra chicán cuatyí chaha yo coto cahun yo vehe caa

(Mt. 5.25-26)

⁵⁷¿Ñáá tuhun ña sahá ndo cuenda nya cha vaha ta nya cha

ña vaha? ⁵⁸Tatu noo ra chicán cuatyí chahun ta cuahun chihin ra nu nyaá ra cuví tyiño, ityi cuahun nducun cuhva ni coo vahun chihin ra cha cumañi ca chaa ndo nu nyaá ra cuví tyiño. Coto nacuhva cuenda ra chuun chi juez. Ta juez cuan cunacuhva cuenda ra chuun chi policía. Ta policía cuan cutyihí ra chuun chichi vehe caa. ⁵⁹Tatu tyicuan caa cuvi, catyí chuun vatyí ma quiton nyacua nya tyiyahvun tandihí cha tahán chi tyiyahvun —catyí ra Jesús.

Cuñí chi cha nasama yo cuhva iyó yo o cunyehe yo tundoho

13 Tyicuan ta suri quívi cuan canyicu suhva ra. Ta quichaha canacatyí ra chi ra Jesús yoso caa cha nyacuví ra Pilato chihin suhva ra Galilea. Vatyí tyihí ra tyiño na cucahñi sindaro chi ra Galilea cha cachahá ofrenda chi Nyoo vehe ñuhu. Ta nasacá ra niñi ra cuan chihin niñi quiti cha cua cuvi ofrenda cuan. ²Ta nacahán ra Jesús ta catyí ra chi ra:

—¿Atu chicá xiñi nyoho vatyí cahnu xaan ca cuatyí ra Galilea cuan cha nuu tandihí ra ityi ñuu ra. Ta yucuan chaha cachihí ra? ³Ñima. Vatyí tatu nyoho ta ma nasama ndo cuhva iyó ndo, tyicuan caa tucu cunaa nyoho. ⁴Ta ndi chahun uñi ra cachihí cha canacavá torre Siloé cuan siquí ra. ¿Atu cuaha ca cuatyí ra ta ican saha inga ra cha iyó ñuu Jerusalén cuñí maa ndo? ⁵Ñima. Vatyí tatu nyoho ta ma nasama ndo cuhva iyó ndo, cunaa tucu nyoho.

**Nu catyí ra Jesús noo cuhva
yoso caa nyatú Nyoo cha
nasama yo cuhva iyó yo**

⁶Tyicuan ta chaha ra Jesús noo cuhva. Ta catyí ra:

—Noo ra iyó yutun cha nañí higo chi ra. Ta nanyaá tun nu ñuhú ra. Ta chahan ra chinyehe ra tatu iñi chiti tun. Ta nanyehe ra vatyí ñahri. ⁷Ta quichaha catyí ra chi ra sahá cuenda chi tun: “Cha uñi cuiya tyito ri quichi nyehi tatu iyó chiti tun. Ta ñahri maa chiti tun iñi. Na cahnya yo chi tun. Vatyí ñáá ri tuhun sayangá tun nu ñuhú ihya? Vatyí ñahri chiti chahá tun”, catyí ra. ⁸Soco ra cha sahá cuenda ñuhú cuan quichaha catyí ra: “Tata, ma cahnya yo chi tun vityin. Na cuinanyaa maa tun nonga cuiya ihya. Cusanduvite ñuhú chaha tun ta cutyihí ñuhú tyahyu. ⁹Vasi tyicuan caa ta cuhva tun chiti. Soco tatu ña chaha tun chiti, tyicuan ta cahnya yo chi tun”, catyí ra.

**Quivi nyitatú ñáyivi sanduvaha ra
Jesús chi noo ñaha tihí chata**

¹⁰Noo quivi cha nyitatú ñáyivi sañahá ra Jesús chi ñu chichi vehe ñuhu. ¹¹Ta yucuan nyaá noo ñaha cha yihí tatyí ña vaha chi. Ta cha chahun uñi cuiya cuhví ña cha ndutihí chata ña. Ta ña cuví ndundoo ña. ¹²Tyicuan ta nanyehe ra Jesús chi ña. Ta cana ra chi ña. Ta quichaha catyí ra chi ña:

—Cha nduvahun. Ñahri ca cuehe ndohún —catyí ra chi ña.

¹³Tyicuan ta tyiso ra ndaha ra siquí ña. Ta caa cuhva ri cuan ta ndundoo ña. Tyicuan ta quichaha

sacahnu ña chi Nyoo. ¹⁴Soco ra cuví nuu vehe ñuhu, cuxaan xaan ra. Vatyí quivi nyitatú ñáyivi sanduvaha ra Jesús chi ña. Ta quichaha catyí ra chi ñáyivi canyicú cuan:

—Iyó iñu tahan quivi tahan chi saha tyiño yo. Yucuan quivi quichando quichi cuvi tatan chi ndo. Ta ma quichi ndo quivi nyitatu yo —catyí ra.

¹⁵Tyicuan ta ra Jesús quichaha catyí ra chi ra:

—Nyoho cha sahá ndo tyi vaha ndo. ¿Atu ña ndachi tucu nyoho quiti sana ndo vatyí sacoho ndo ndutya chi ti quivi nyitatú yo?

¹⁶Ta tyicuan caa tucu ñaha ihya, vachi ña tata ra Abraham. Ta cha chahun uñi cuiya nuñí ña chihin cuehe ihya sahá ra ña vaha. Ta yori ndachi chi ña. ¿Atu ña tahan chi ndachi yo chi ña vasi quivi nyitatu yo? —catyí ra Jesús.

¹⁷Tyicuan ta cuhva cha catyí ra Jesús tuhun cuan, tandihí maa ra xaan iñi chi ra chahan cuvi nuu ra. Soco tandihí maa ñáyivi cusii cuñi ñu chihin cha cahnu cha sacuví ra Jesús.

**Nu catyí ra Jesús vatyí tari noo chiti
mostaza cuví cha nyacá ñaha Nyoo
añima yo**

(Mt. 13.31-32; Mr. 4.30-32)

¹⁸Tyicuan ta quichaha catyí ra Jesús:

—¿Ñáá chihin sandiqui tahin cha nyacá ñaha Nyoo añima yo? ¿Ñáá chihin sandu inuu ri yo? ¹⁹Tari noo chiti mostaza, tyicuan caa cuví. Vatyí noo ra tachí ra noo chiti nu ñuhú, ta chahnu tun. Ta cuví tun

noo yutun cahnu vavaha. Tyicuan ta chaá coyo saa nuu yutun cuan. Ta yucuan savahá ti taca ti.

Nu catyí ra Jesús vatyí tari yuchan iya tyicuan caa cuví cha nyacá ñaha Nyoo ańima yo

(Mt. 13.33)

²⁰Tyicuan ta quichaha catyí ra Jesús inga chaha:

—¿Ñáá ca chihin sandu inuu ri yo yoso caa nyacá ñaha Nyoo ańima yo? ²¹Cuví chi tari noo yuchan iya cha nasaca noo ñaha sihi chihin uńi cuhva yutyí pan. Vatyí tari ndaa pan cuan chihin yuchan iya cuan, tyicuan caa cuahan nducuaha ca ñu nyacá ñaha Nyoo ańima —catyí ra.

Yuvehe tihín ta ityí cuińi cha cuahan nu nyaá Nyoo

(Mt. 7.13-14, 21-23)

²²Ityí cuahan ra Jesús Jerusalén cahán ra tuhun Nyoo chihin ñáyivi tandihi ñuu nu yahá ra. ²³Ta quichaha ndaca tuhun noo ra chi ra:

—¿Atu ña cuaha maa ñáyivi cucacu ańima? —catyí ra.

Tyicuan ta nacahan ra Jesús, ta catyí ra:

²⁴—Nanducu ndo cuhva quihvi ndo yuvehe tihín. Vatyí yíi xaan quihvi ndo nu nyacá ñaha Nyoo. Vatyí cuaha xaan ndo cha cucuńi ndo quihvi ndo yucuan. Ta ma cuví. ²⁵Vatyí tari chitoho noo vehe tyicuan caa cuví Nyoo. Ta chitoho vehe cuan cunacasi ra yuvehe. Tyicuan ta nyoho cha nyicú ndo ityí chata cusacachan ndo yuvehe, ta cucatyí ndo: “Nuńa yuvehe.” Ta ra cuan cucatyí ra chi ndo: “Ña chité

nya ityí quichi nyoho.” ²⁶Tyicuan ta nyoho cucatyí ndo: “Nyuhu chachi ndi ta chihí ndi chuhun. Maun sańahun tuhun Nyoo chi ndi ityí nu nyaá vehe ndi”, cucatyí ndo chi ra cuan. ²⁷Soco ra cuan cunacahan ra chihin ndo ta cucatyí ra: “Cha catyí chi ndo vatyí ña chité nya ityí quichi nyoho. Canyaha ndo nu nyai, tandihi nyoho ñu nyacuví cha ña vaha”, cucatyí ra chi ndo. ²⁸Yucuan ta cuacu ndo ta sacahńi noho ndo cha nyehe ndo chi ra Abraham ta chi ra Isaac ta chi ra Jacob, ta chi tandihi ra profeta Nyoo cha chiyo ta cha naha. Vatyí canyicú ra nu nyacá ñaha Nyoo. Ta nyoho ndoo ndo ityí chata. ²⁹Ta cuquichi ñáyivi ityí tyańuhu, ta ityí norte, ta ityí nu cańa ñanyii, ta ityí nu quee ñanyii. Ta cunyicu ñu cachi ñu chihin Nyoo nu nyacá ñaha ra. ³⁰Ta yóo ñu cha cuńi cuhun ityí nuu, ican ñu cuhun nu ndihi. Ta ñu cuahan nu ndihi, ican ñu cuhun ityí nuu —catyí ra.

Nu nducuihya ińi ra Jesús nyehé ra chi ñáyivi ñuu Jerusalén

(Mt. 23.37-39)

³¹Suri maa quivi cuan chaá coyo suhva ra fariseo. Ta catyí ra chi ra Jesús:

—Quita ihya vatyí ra Herodes cuńi ra cahńi ra chuun —catyí ra.

³²Soco ra Jesús quichaha catyí ra chi ra:

—Cuahan ndo ta catyí ndo chi ra ñucuii quíni iyó cuan, vatyí nyacua nya nu chaa maa chi quivi cha ndihi tyińo sahí cha tave tatyí ña vaha ta cha sanduvahi chi ñu cuhví, tyicuan ta cundihí tyińo sahí. ³³Soco nya tahán chi cha ndihi maa

tyiño sahí, tyicuan ta cuhun mai cucúvi nya Jerusalén. Vatyí ma cuvi cha cúvi noo ra profeta Nyoo ityi chata Jerusalén.

³⁴iNdahvi nyoho ñáyivi

Jerusalén! vatyí chahñi ndo chi ra profeta ra cachahá cuenda tuhun cahán Nyoo chi ndo. Ta tuchi ndo yuu chi tandihí ra cha saquichi Nyoo nu nyicú ndo. Ta yuhu cuaha xaan chaha cuñi saha cuende chi ndo tari noo ndivi cha sahá cuenda ti chi sehe ti, ta naquehen vaha ti chi ti chichi ndichin ti. Soco maa ndo ña cuñi ndo. ³⁵Nyehe ndo vityin vatyí cha sandoi chi ndo. Ta catyí chi ndo vatyí ma nyehe ca ndo chii nyacua nya chaa chi quivi cuacatyí ndo vatyí cahnu xaan ra vachi chihin sivi Nyoo —catyí ra Jesús.

Nu sanduvaha ra Jesús chi noo ra cuhví cha yihí cuiño chi

14 Cuví chi noo quivi nyitatú ñáyivi. Ta ra Jesús cuahan ra cua cachi ra vehe noo ra cuví nuu chi ra fariseo. Ta suhva ca fariseo cuan cañañi ra chi ra Jesús tatu ñáá cha ña vaha cunyacuvi ra. ²Yucuan ta nuu ra Jesús nyaá noo ra cuhví cha yihí cuiño chii. ³Tyicuan ta quichaha catyí ra Jesús chi ra casacuaha ley vehe ñuhu ta chi ra fariseo:

—¿Atu vaha sanduvaha yo chi ñáyivi cuhví quivi nyitatú yo? —catyí ra.

⁴Tyicuan ta tandihí ra cuan, taxi taxi cacuvi ra. Yucuan cuví nu tyiso ra Jesús ndaha ra siqui ra cuhví cuan. Ta sanduvaha ra chi ra. Ta natachi ra chi ra na cunuhu ra.

⁵Tyicuan ta quichaha catyí ra Jesús chi ra fariseo:

—Tatu canacava noo burru sana ndo, o nonga quiti sana ndo chichi noo xahva, ¿atu ma cutava ndo chi ti tañi tyehe ri, vasi quivi nyitatú yo cuví? —catyí ra.

⁶Tyicuan ta inga chaha tucu taxi cuii ri nicunyicu ra fariseo. Vatyí ña ñihi ca ra tuhun nacahan ra.

Nu sañaha ra Jesús chi yo vatyí ma cahnu saha yo chi yo

⁷Cha nyehe ra Jesús vatyí tandihí ra canyicú vico cuan nacachí ra tyayu vaha ca cunyaa ra. Tyicuan ta quichaha chaha ra tuhun ihya chi ra:

⁸—Nya quivi cuhun ndo vico tandaha, ma nanducu ndo tyayu vaha ca cunyaa ndo. Vatyí coto quichi inga ra cha cahnu ca cuvi ican saha ndo, ⁹ta coto quichi ra cha nacatyí tuhun ta catyí ra chuun: “Cuhva tyayu chiña. Vatyí cunyaa ra ihya.” Tyicuan ta yoho chihin cha cahán nuun, ta cuhvon. Yucuan ta cunyaun nu ndihí. ¹⁰Soco catyí chi ndo, vatyí nya quivi nacatyí tuhun ra chi ndo, cunyaa ndo noo nu ñima ri tuhun. Vatyí quichi maa ra cha nacatyí tuhun chi ndo ta catyí ra chi ndo: “Ra tahin, ñaha, cunyaun nu tyayu vaha tyehe.” Ta tyicuan caa sacucahnu ra chuun nu ñáyivi nyicú yuhu mesa chuhun. ¹¹Vatyí yóo ra cha cahnu sahá chii, cuquehen ra ticahan nuu. Ta yóo ra cha ndahvi sahá chii, cahnu cucuvi ra —catyí ra Jesús.

¹²Tyicuan ta quichaha catyí tucu ra chi ra nacatyí tuhun chi ra:

—Nya quivi coo vico vehun, ma nacatyí tuhun chi ra tahun, ni chi yañun, ni ri chi ñáyivi chuun, niri chi ñu nyicú yuvehun ñu tyayii. Vatyí ñu cuan cuví nacatyí tuhun ñu chuun, na coo tucu vico vehe maa ñu. Tyicuan ta nacahnya ñu cuenda cha chahān ñu vico vehun. ¹³Soco cua catyí chuun vatyí nya quivi coo vico vehun, nacatyí tuhun chi ñu ndahvi, chi ñu cuhví, chi ñu coxo, ta chi ñu cuaa. ¹⁴Tyicuan ta sii cuví chuun, vatyí ñu cuan ma cuví natyiyahvi ñu chuun. Soco cuñihun yahvun quivi cunandoton chihin ñáyivi vaha.

Nu chahā ra Jesús noo cuhva yoso caa nacatyí tuhun ra chi yo vatyí quihvi yo nu nyacá ñaha Nyoo

(Mt. 22.1-10)

¹⁵Ta chiñi noo ra cha nyaá yuhu mesa cuan tuhun cahán ra Jesús. Ta quichaha catyí ra chi ra:

—Sii xaan cuvi chi ñu cachi nu nyacá ñaha Nyoo —catyí ra.

¹⁶Tyicuan ta catyí ra Jesús:

—Noo ra cuan savahā ra noo vico cahnu vavaha vehe ra. Ta nacatyí tuhun ra chi cuaha xaan ñáyivi.

¹⁷Tyicuan ta chaā cuhva cha cuxiñi ñu, ta tachí ra chi musu ra nacana ra chi ñu. Vatyí cha chaā cuhva cha cuxiñi ñu. ¹⁸Soco tandihi ñu cuan quichaha catyí ñu vatyí ma cuhun ñu. Ta noo ra cuan catyí ra: “Ni satē noo ñuhú. Ta cuñí chi cuhin cunyehe. Ican tuhun chiquén na saha ra tucahnu iñi chii vatyí ma cuhin.” ¹⁹Tyicuan ta inga tucu ra cuan catyí ra: “Ni sata cuiri ohon tahan yunta quiti. Ta cuhin cunyehe tatu vaha ti. Ican tuhun

chiquén tumañi iñi chi ra na saha ra tucahnu iñi chii, vatyí ma cuvi cuhin.” ²⁰Tyicuan ta inga tucu ra cuan catyí ra: “Ni ndihi tandahi, ta ma cuvi cuhin”, catyí ra. ²¹Tyicuan ta musu ra cuan cuanuhu ra. Ta nacatyí ra tandihi tuhun cuan chi ra cha tachí chi ra. Cha chiñi ra savaha vico cuan cha tyicuan caa, ta cuxaan xaan ra. Ta catyí ra chi musu ra: “Cuāhan tandihi maa ityi. Ta quichi nyacon chi ñu ndahvi, chi ñu cuhví, ta chi ñu coxó, ta chi ñu cuaa”, catyí ra. ²²Ta cha yahā nachaā musu cuan ta catyí ra chi ra cha tachí chi ra: “Cha sacuvi tandihi maa cha catyún. Ta nuñá ca chichi vehe”, catyí ra. ²³Tyicuan ta chitoho ra catyí ra chi ra: “Cuāhan cua nducu ca chi ñu tandihi maa ityi. Ta sanñun chi ñu na quichi coyo ñu, vatyí na cutu chichi vehi. ²⁴Vatyí catyí chuun vatyí ni minoo ñu cha nacatyí tuhun cha xihna ri, ma cachi ñu chihin” —catyí ra Jesús.

Cuaha xaan tundoho nyehe yo tatu cuenda ra Jesús yihí yo

(Mt. 10.37-38)

²⁵Cuaha xaan ñáyivi nyicón chi ra Jesús. Tyicuan ta nanyehe ra chi ñu, ta quichaha catyí ra:

²⁶—Tandihi nyoho cha nyicón ndo chii, tatu cuñí ca ndo chi ñáyivi chi ndo ican saha chi yuhu, ñima cuende yihí ndo. Ta tatu cuñí ca ndo chi maa ndo ican saha chi yuhu, ñima cuende yihí ndo. ²⁷Vatyí nya nyoho cha ña cuñí ndo nyehe ndo tundoho cha cunyicon ndo chii, ña tahán chi cuví ndo ñu cuende, vatyí cha nyehe ndo tindoho yucuan cuví cruzi cha

tahán chi cuiso ndo. ²⁸Vatyi tatu nya nyoho cuñí ndo savaha ndo noo vehe cahnu, xihna ca cunyaa ndo ta ndichi xiñi ndo tatu caña xuhun ndo cha cananyaa ndo vehe cuan. ²⁹Vatyi tatu quichaha sacacu ndo vehe cuan, ta quichaha ña cuví sandíhi ndo vatyi ñahri ca xuhun ndo, cuacu nyaa ñáyivi chi ndo. ³⁰Ta cuacatyí ñu: “Ra cuan quichaha savaha ra vehe ra, ta ni ña cuví sandíhi ra”, cucatyí ñu. ³¹O tatu noo rey cha cuñí cañi tahan chihin inga rey ¿atu ña chicunyaa xihna ra ta ndichi xiñi ra tatu ñihi uchi mil sindaro cha cuahan chihin ra cua cañi tahan chihin inga rey cha vachi chihin oco mil sindaro cuan? ³²Tatu chitó ra vatyi ma cuví chasaha ra chi inga rey cuan, tyicuan ta cañi ca vachi rey cuan, ta tachi ra chi noo musu ra vatyi cucatyí ra chi rey cuan na ndíhi tuhun yucuan ri. ³³Ta tyicuan caa cuví chi nyoho. Tatu ma cahnya iñi ndo tandíhi maa cha cuñi ndo ta cha cumi ndo, ma cuví cunyicon ndo chii.

Nu sañahá ra Jesús vatyi tari ñhi cha ndíhi cha uhva, tyicuan caa cuví yo tatu ndu uvi iñi yo cha chino iñi yo chi ra

(Mt. 5.13; Mr. 9.50)

³⁴Vaha ñhi vatyi sacu uhva chi cha cachi yo. Soco tatu ndíhi cha uhva chi, ña vaha ca chi. ³⁵Ñahri ca tyiño cuví saha chi. Ta sacuita yo vatyi ña vaha ca. Nya nyoho cha cutuñí iñi ndo, tyasoho ndo tuhun cahín —catyí ra Jesús.

Nu sañahá ra Jesús vatyi tari mbee cha cuanaa tyicuan caa cuví yo

(Mt. 18.10-14)

15 Tandíhi ra tavá xuhun cuenda gobiernu ñuu Roma,

ta ra iyó cuatyí, tuhva ra nu nyaá ra Jesús, tacuhva cuiñi ra tuhun cahán ra. ²Tyicuan ta ra fariseo ta ra casacuaha ley vehe ñuhu quichaha cacahan nyaa ra, ta cacatyí ra:

—Ra ihya, cahán ra chihin ra iyó cuatyí. Ta chachí ra chihin ra —cacatyí ra.

³Tyicuan ta ra Jesús cahán ra noo cuhva ihya, ta catyí ra:

⁴—Ta nya nyoho cha iyó noo cientu mbee sana ndo, tatu cuanaa noo ti, ¿atu ma sandoo ndo chi tandíhi ca ti cuan nu chiqui. Ta cunanducu ndo chi quití cha cuanaa cuan, nyacua nya cha nañihi ndo chi ti? ⁵Ta cuhva cha nañihi ndo chi ti, ta natyiso soco ndo chi ti. Ta sii vavaha cuví chi ndo. ⁶Ta cuhva cha nachaa ndo vehe ndo, ta ndu iin ri ndo chihin ra tahan ndo ta chihin ñu nyicú yatyin yuvehe ndo, yucuan ta catyí ndo chi ñu vatyi na cusii cuñi ñu chihin ndo vatyi nañihí ndo chi mbee sana ndo cha chinaa. ⁷Ta ihya catyí chi ndo, vatyi sii xaan ca cuví chi ángel Nyoo andívi cha catyí noo ra cha iyó cuatyí ta nasama cuhva iyó ra, ta ñima ca cha catyí ndi cumi xico chahun cumi tahan ñáyivi cha ñahri cuatyí.

Ñaha sihi cha cuanaa xuhun ta nañihí ña

⁸Ta catyí chi ndo, tatu iyó noo ñaha cha iyó uchi tahan xuhun ña, ta tatu cuanaa noo xuhun ña, tyaa ña noo candil. Ta tihvi ña tandíhi cuii maa chichi vehe ña. Ta nanducu ña tandíhi cuii nyacua nya cha nañihi ña xuhun cuan. ⁹Ta cuhva cha yahá nañihí ña, cuahan

ña cua nanducu ña chi ñaha tahan ña, ta ñáyivi cha nyicú yuvehe ña, ta catyi ña chi ñu: “Cusiñi cuñi ndo chihin vatyí cha ñañihí xuhin cha chinaa”, catyí ña. ¹⁰Ta catyí chi ndo vatyí tyicuan caa siñi cuví chi ángel Nyoo cha catyi noo ra iyó cuatyí ta ndu uvi iñi ra cuatyí ra —catyí ra Jesús.

Nu sañahá ra Jesús yoso caa cuñí Nyoo chi noo ra ndu uvi iñi cuatyí

¹¹Tyicuan ta quichaha catyí tucu ra Jesús cuhva ihya:

—Noo ra, chiyó uvi tahan sehe ra.

¹²Ta noo chaha, ra luhlu ca cuan catyí ra chi sutu ra vatyí nacuhva ra cha tahán chi chi ra. Tyicuan ta sutu ra chaha ra chi ñanduvi sehe ra. ¹³Ta ña cuaha ri quívi cuan ta ra luhlu ca cuan xicó ra tandíhi cuii maa cha chahá sutu ra chi ra. Ta sandu iñi ri ra xuhun ra, ta quehen ra ityi ta cuahan ra noo ñuu cañi. Ta yucuan chiyó ra, sanaa ra tandíhi maa xuhun ra chihin tusii iñi. Ta quiñi xaan chicá noo ra.

¹⁴Tyicuan ta chaq noo tama ityi nu iyó ra. Ta quichaha chisoco ra vatyí ndíhi xuhun ra sanaa ra. ¹⁵Tyicuan ta chahan ra chicacán ra tyiño chi noo ra ñuu cuan. Ta ra cuan tachí ra chi ra noo nu iyó quini sana ra, vatyí cusaha cuenda ra chi ti. ¹⁶Ta cuví noo chaha cuan chisoco xaan ra. Ta ñahri maa cha cachi ra iyó, nyacua quichi cuvi iñi ra cachi ra cha cachachí quini cuan soco yori maa chaha cha cachi ra. ¹⁷Tyicuan ta nichon iñi ra tuhun sutu ra. Ta ndichi xiñi ra: “¿Atu chiin cuaha ra casahá tyiño chihin suti? Soco ñahri maa cha cumañi chi ra. Ta

yuhu cuñí cúvi soco ihya. ¹⁸Vityin cunuhin nu nyaá suti. Ta catyi chi ra tyi chicoo cuatyí nuu Nyoo ta nuu maa ra. ¹⁹Ta ña ñaña que cha cuvi sehe ra chii, ta na saha ra tuhun vatyí noo musu ri ra cuví chii.” Tyicuan caa ndichi xiñi ra.

²⁰Tyicuan ta quehen ra ityi cuanuhu ra nya vehe sutu ra. Cañi ca vachi ra ta nanyehé sutu ra chi ra, ta cundahvi cuñi ra nyehe ra chi ra. Ta chinó ra chisatahan ra chi sehe ra. Ta nanumi ra chi ra. ²¹Tyicuan ta quichaha catyí ra chi sutu ra: “Tata, chicoo cuatyí nuu Nyoo ta chicoo cuatyí nu maun. Ta yucuan chaha ña ñaña que cha cuví sehun chii”, catyí ra chi sutu ra. ²²Soco sutu ra tyihi ra tyiño, ta catyí ra chi musu ra: “Tava ndo sahma vaha ca ta sacuihno ndo chi ra. Ta tyihi ndo noo xehe nundaha ra. Ta nyaca ndo zapato quihi chaha ra ñandíhi. ²³Ta siin ri cahñi ndo noo becerru cha xahan ca, vatyí cachi yo chi ti. Vatyí vityin cucoo yo noo vico. ²⁴Vatyí ra sehi ihya cha chihí ra sahá mai tuhun. Cuñí mai vatyí ma nyehe que chi ra, soco natuvi ra”, catyí sutu ra. Tyicuan ta quichaha chicoo ñu vico. Ta siñi xaan cacuñí ñu vatyí natuvi ra cuan.

²⁵Tyicuan ta inga sehe ra, ra cha chahnu ca, ñohó ra nu chiqui. Ta cuhva cha cuanachaa ra nya vehe ra, ta quichaha chiñí ra yaa. Ta chiñí ra vatyí siñi xaan cachitá chaha ñu. ²⁶Tyicuan ta cuhva cha cuyatyin ra nya vehe ra ta cana ra chi noo musu ra. Ta ndaca tuhun ra ñáá cha cuví cuan. ²⁷Tyicuan ta musu ra quichaha catyí ra: “Yañun,

ican nachaa. Ta yucuan chaha tachi sutun vatyí na cahñi ra chi noo becerru xahan ca. Vatyí vaha ri nachaa yañun, ta ñahri cha cuví chi ra”, catyí ra. ²⁸Tyicuan ta cuxaan xaan cuñi ra. Ta ña cuñi ra ndihvi ra chichi vehe. Soco sutu ra chahan ra chichan ndahvi ra chihin ra, vatyí na ndihvi ra chichi vehe.

²⁹Tyicuan ta nacahan ra ta catyí ra chi sutu ra: “¿Atu chiin cuiya sahá tyiñe chuhun? Ta tyasohí tuhun cahún. Ta ni noo chaha ta ta nacahnu que nu cahún. Soco ni noo ndixihyu lee ta cuhva con chii vatyí coi vico chihin ra tahn. ³⁰Soco vityin cha nachaa sehun ihya, ra cha sanaa xuhun chihin ñu cata iñi. Ta vityin chahun noo becerro quití xahan ca chi ra”, catyí ra chi sutu ra. ³¹Tyicuan ta nacahan sutu ra ta catyí ra chi ra: “Sehi, yoho tyicuan ri nyaún chihin. Ta tandihi cha cumi, chuun cuví. ³²Soco vityin tahán chi sacuvi yo vico ihya. Ta cusii cuñi yo. Vatyí nachaa yañun, ra cha saha mai tuhun vatyí chihí. Tari quivi nandoto ra cuví ihya. Ta chinaa ra, ta nañihí tucu yo chi ra inga chaha”, catyí ra chi sehe ra — catyí ra Jesús.

Nu sañahá ra Jesús chi yo
yoso caa saha yo tumañi iñi
chihin cha iyó chi yo

16 Tyicuan ta quichaha catyí ra Jesús chi ra cachicá noo chihin ra:

—Iyó noo ra tyayii vavaha ra. Ta iyó noo ra yindaha tandihi tyiño sahá ra. Ta chahan coyo musu ra canacatyí ra chi ra tyayii cuan, vatyí ra yihí ndaha tyiño cuan,

sanaa ra tandihi cha iyó chi ra.

²Tyicuan ta cana ra tyayii cuan chi ra yindaha tyiño cuan, ta catyí ra chi ra: “Cha cuaha xaan cuatyí chahún quichi nu nyaí. Nacuhva cuendon tandihi tyiño cha sacuvun chii. Vatyí ma saha tyiño con chihin”, catyí ra chi ra. ³Tyicuan ta ra yindaha tyiño cuan ndichi xiñi ra: “¿Yoso caa cunyacuvi vityin? Chitohi ña cuñi ca ra cha sahá tyiñe chihin ra. Ta ñahri fuerza iyó chii cha saha tyiñe nu ñuhú. Ta cahán nui caye chichi ñuu. ⁴Soco cha chité yoso caa cunyacuvi vityin, ta vaha coo ñáyivi chihin quivi cha ma coo ca tyiño sahi, ta vaha chai vehe ñu”, ndichi xiñi ra. ⁵Tyicuan ta cana ra chi noo noo ra yosoyicá chi chitoho ra. Ta quichaha catyí ra chi noo ra cuan: “¿Yoso yosoyicón chi chitohi?” catyí ra. ⁶Tyicuan ta nacahan ra cuan ta catyí ra: “Yuhu yosoyiqué noo cumi mil litru aceitye.” Tyicuan ta ra yindaha tyiño cuan catyí ra chi ra: “Quehen nonga tutu ihya. Ta natyaa uvi mil ri. Ta sacuiton tutu chahnu cuan”, catyí ra. Tyicuan caa sacuvi ra. Ta cuahan ra. ⁷Tyicuan ta cha inga ra. Ta quichaha ndaca tuhun tucu ra chi ra cuan ta catyí ra: “¿Yoso yosoyicá yoho chi chitohi?” Ta nacahan ra cuan ta catyí ra: “Yosoyiqué noo mil arroba trigu”, catyí ra. Tyicuan ta quichaha catyí ra yindaha tyiño cuan: “Quehen inga tutu, ta natyaun uña cientu ri arroba. Ta sacuita tutu chahnu chiña”, catyí ra. ⁸Tyicuan ta chitó chitoho ra cha ña vaha cha chinyacuví ra. Ta iyo xaan cuñi ra vatyí yatyí xaan saha ra cuan chi ra —catyí ra Jesús.

Ta quichaha catyi tucu ra chi ra cachicá noo chihin ra:

—Ñáyivi ña vaha añima yatyí xaan ca sahá ñu chi ñu ican saha ñáyivi vaha añima.

⁹Ta catyí chi ndo, vatyí cotyiño ndo cha tyayii cha iyó siqui ñuhu ñayivi ihya, ta saha ganaa ndo amigo. Ta quivi cha ndihi cha tyayii cuan, cuñihi ndo nu cunyicu ndo nya nu nyaá Nyoo tyicuan ri maa.

¹⁰Tatu chitó ndo cotyiño ndo chiin cha iyó chi ndo cha cuenda cha vaha, tyicuan caa coto tucu ndo cotyiño ndo tatu cuaha iyó chi ndo. Soco tatu ña chitó ndo cotyiño ndo chiin cha iyó chi ndo, tyicuan caa ma coto tucu ndo cotyiño ndo tatu cuaha coo chi ndo. ¹¹Ta catyí chi ndo, tatu ña sahá ndo tumañi iñi chihin cha iyó chi ndo siqui ñuhu ñayivi ihya, Nyoo ma cuhva ra noo cha tyayii cha ndicha chi ndo. ¹²Tandihí cha iyó chi ndo maa Nyoo chahá noo chi ndo. Soco tatu ña sahá ndo tumañi iñi chihin cuan, ma cuhva ra cha tahán chi chi ndo.

¹³Noo musu ma cuvi coo uvi tahan chitoho ra. Vatyí musu cuan cuñi ca ra chi noo ra, ta ñima ca chi inga ra. O chi noo ra, vaha quichahá ra tuhun cahán ra, ta chi inga ra, ma quichaha ra cha cahán ra. Ma cuvi cuñi ndo chi Nyoo ta suri cuhva cuan cuñi tucu ndo cha tyayii —catyí ra Jesús.

¹⁴Tyicuan ta cha chiñi ra fariseo tandihí tuhun cahán ra Jesús. Tyicuan ta quichaha chacu cuehe ra nyehe ra chi ra. Vatyí maa ra fariseo cuan cuñi xaan ra chi xuhun. ¹⁵Tyicuan ta quichaha catyí ra Jesús chí ra:

—Vaha xaan sahá ndo chi ndo nuu ñáyivi. Soco chitó Nyoo vatyí añima ndo ña vaha. Ta tandihí cha catyí ñáyivi vatyí cahnu xaan ihya siqui ñuhu ñayivi, Nyoo ña cuñi nyehe ra.

Nu sañahá ra Jesús tuhun ley ra Moisés, ta tuhun yoso caa cunyaca ñaha Nyoo añima yo chi yo

¹⁶Ley cha tachí Nyoo chi ra Moisés vatyí tyaá ra, ta tuhun cha tyaá ra profeta Nyoo ta cha naha, ican chi cuvi cha saquehen ityi chi ñáyivi nyacua nya quivi chaá ra Juan. Ta maa ra Juan quichaha cahan ra tuhun vaha vatyí cha cuñi quichi Nyoo vatyí cunyaca ñaha ra. Ta tandihí ñáyivi cha nducú cuhva yoso caa cunyaca ñaha Nyoo añima ñu, ican ñu quihvi ndaha ra.

¹⁷Soco catyí chi ndo, vasi cunaa andivi ta ñuhu ñayivi, soco cha cuvi ley Nyoo cha tyaá ra Moisés, ma naa nyacua nya cha yahá cuvi tandihí.

Sañahá ra Jesús vatyí ña vaha cha sandoo rayii chi ñasihi ra

(Mt. 19.1-12; Mr. 10.1-12)

¹⁸Tatu noo rayii iyó ñasihi ra, ta sanandoo ra chi ña, ta tandaha ra chihin inga ña, iyó cuatyí ra nuu Nyoo. Ta tatu tandaha noo rayii chihin noo ñaha cha sandoo yii chii, coo tucu cuatyí ra nuu Nyoo.

Nu sañahá ra Jesús tuhun noo ra tyayii chihin ra Lázaro

¹⁹Chiyó noo ra tyayii. Ta vaha ñihnó ra. Ta tandihí quivi iyó ra vico ta chachí vaha ra. ²⁰Ta chiyó tucu noo ra ndahvi cha nañi

Lázaro. Ta cuaha xaan ndihyi iñi ra. Ta nyaá ra yuvehe ra tyayii cuan. ²¹Ta ra ndahvi cuan, cuñi ra cachi ra, vasi cha canaco yo nu mesa ra tyayii cuan. Ta nyacua nya ina ta chaá ti nu nyaá ra, ta yuyaá ti nu cahvi chi ra. ²²Ta noo quivi cuan chihí ra ndahvi cuan. Ta ángel Nyoo quehen ra chi ra ta cua nyaca ra chi ra nya nu nyaá ra Abraham gloria. Tyicuan ta chihí tucu ra tyayii cuan. Ta chicuchi ñu chi ra. ²³Tyicuan ta ra tyayii cuan nyehé xaan ra tundoho nu ñohó ra anyaya. Ta nanyehe ra nu cañi. Ta nanyehe ra chi ra Abraham chihin ra Lázaro, nyaá ra chihin ra yucuan. ²⁴Tyicuan ta canachaá ra ta catyí ra: “Tata Abraham, cundahvi cuñi chii. Tachi chi ra Lázaro na satyí ra chiin nundaha ra. Ta na satoo ra iin titi ndutya nu yai. Vatyí nyehé xain tundoho nu cayú ñuhu ihya”, catyí ra. ²⁵Soco ra Abraham catyí ra chi ra: “Ñicohon iñun vatyí vaha chiyon ñuhu ñayivi. Ta ra Lázaro, ña vaha chiyó ra. Vityin vaha iyó ra ihya, ta yoho nyehún tundoho. ²⁶Ta siin ri, mahñu ihya cono xaan. Ta ma cuvi yaha ra iyó tyehé cuhun ra chiña. Ta ma cuvi yaha ra iyó chiña, quichi ra tyehé”, catyí ra Abraham chi ra. ²⁷Tyicuan ta quichaha catyí ra tyayii cuan: “Tata Abraham, sahun tumañi iñi chii. Ta tachun chi ra Lázaro nya vehe suti. ²⁸Vatyí iyó ohon tahan yañi. Ta cuñi vatyí nacatyí ra chi ra yoso caa iyé ihya nu nyehí tundoho, coto quichi coyo tucu ra cuan ihya”, catyí ra. ²⁹Tyicuan ta quichaha catyí ra Abraham: “Iyó ley cha tyaá ra Moisés. Ta iyó

tuhun cha tyaá ra profeta Nyoo ta cha naha. Na quichaha ra tu cuñi ra”, catyí ra Abraham. ³⁰Tyicuan ta quichaha catyí ra tyayii cuan: “Tata Abraham. Ma quichaha ra. Soco tatu yóo cha nandoto, ta cuhun cucahan chihin ra, yucuan ta tyasoho ra ta nasama ra cuhva iyó ra”, catyí ra cuan. ³¹Soco ra Abraham catyí ra: “Tatu ña cuñi ra quichaha ra tuhun tyaá ra Moisés ta tuhun cha tyaá ra profeta Nyoo ta cha naha, ma chino iñi ra tuhun cahan noo ndiyi tatu nandoto ra ta cahan ra chihin ra.”

Nu sañahá ra Jesús chi yo yoso caa saha cuenda yo chi yo coto sacuvi yo cha ña vaha

(Mt. 18.6-7, 21-22; Mr. 9.42)

17 Tyehé caa catyí ra Jesús chi ra cachicá noo chihin ra:

—Tyicuan ri iyó cha quiñi caa cha sativí chi ñáyivi. Soco ndahvi ra ndahvi ra sativí chi ñáyivi. ²Vaha taxin ca cuhñi ra noo yuu sucun ra. Ta cutuchi ra chi ra nu tyañuhu. Coto sativí ra chi ñu ni nasama cuhva iyó ihya.

³Saha ndo cuenda chi ndo. Tatu noo ra tahan ndo ta sacuvi ra noo cha ña vaha chihin ndo. Catyí ndo chi ra vatyí ña vaha cha sacuvi ra. Tatu nasama ra cuhva iyó ra, saha ndo tucahnu iñi chi ra. ⁴Ta ni ri maa sacuvi ra cha ña vaha chihin ndo ucha tahan chaha cha noo quivi. Tatu ndi ucha tahan chaha ta catyí ra chi ndo vatyí ndu uvi iñi ra cha sacuví ra chi ndo, ndi ucha tahan chaha saha ndo tucahnu iñi chi ra.

**Nu sañahá ra Jesús chi yo vatyí
tatu chinó iñi yo chi ra, cuví
sacuví yo cuaha cha vaha**

⁵Tyicuan ta quichaha catyí ra cachicá tyiño nuu ra Jesús chi ra: —Cuhva cha chinó ca iñi ndi chuun —catyí ra.

⁶Tyicuan ta catyí ra Jesús chi ra: —Tatu chinó iñi ndo chi yuhu vasi chiin ri tari cuhva noo chiti mostaza luhlu, cuví catyí ndo chi yutun sicómoro cha nanyaá ihya nacoyo tun, ta cucuinanyaa tun nu tyañuhu. Ta cucuvi nu cahan ndo — catyí ra Jesús.

**Yoso caa tahán chi
quichaha yo chi Nyoo**

⁷Ta catyí ra Jesús: —Tatu noo nyoho ta iyó noo musu ndo. Ta nachaa ra cha chahan ra nu chiqui chi sahatyiño ra, o chi saha cumi ra quití sana ndo, ¿atu catyí ndo chi ra: “Cunyaa ta cachun”? Ña catyí ndo chi ra tyicuan caa. ⁸Soco tyehe caa catyí ndo chi ra: “Sanduvaha cha cuxiñi. Ta tyihun cha cachi. Cha yaha cha cachi tyicuan ta cachi tucu maun”, catyí ndo chi ra. ⁹Ni ña tuhvá ndo nacuhva ndo tyahvi nyoo chi ra vatyí sacuví ra ñáá noo tyiño tava ndo chi ra. ¹⁰Tyicuan caa tucu nyoho chihin Nyoo. Quivi ndihi sacuvi ndo cha catyí Nyoo chi ndo, tahán chi catyí ndo: “Nyuhu chiin ri cha tachun chi ndi, yucuan ri sacuví ndi. Ta ña yaha ca.”

**Nu sanduvahá ra Jesús chi
uchi tahan ra tyahyu coño**

¹¹Itiyi cuahan ra Jesús itiyi ñuu Jerusalén yahá ra nu cuví xahñi

Samaria chihin Galilea. ¹²Nu chaa ra noo ñuu, quita coyo uchi tahan ra cuhví chihin cha tyahyu coño ra. Ta chicuitayucu ra nyasava ri. ¹³Ta quichaha cacanachaa ra chi ra Jesús, ta catyí ra:

—Yoho, Maestro Jesús, cundahvi cuñi chi ndi —catyí ra.

¹⁴Tyicuan ta nanyehe ra Jesús chi ra ta catyí ra chi ra:

—Cuahan ndo. Ta cua sañaha ndo chi ndo chi tata sutu vatyí cha nduvahá ndo.

Tyicuan ta cuahan coyo ra cuan. Ta itiyi cuahan coyo ra ta cananyehe ra vatyí nduvahá ra. ¹⁵Tyicuan ta cuhva cha nanyehe noo ra cuan vatyí nduvahá ra, cuanuhu chata ra nu nyaá ra Jesús. Ta caná chaa ra, ta sacahnu ra chi Nyoo. ¹⁶Ta chicuñi chiti ra. Ta nacañi noo ra xiñi ra nya nu ñuhu nuu ra Jesús. Ta nacuhvá ra tyahvi nyoo chi ra. Ta ra cuan, ra Samaria cuví ra.

¹⁷Tyicuan ta catyí ra Jesús chi ra: —¿Atu ñima uchi tahan ndo nduvahá? ¿Nya nyaá inga iin tahan ca ra?

¹⁸¿Ñáá tuhun cha noo tuhun ri maa ra inga ñuu nandichi chata ra ta sacahnu ra chi Nyoo? —catyí ra Jesús.

¹⁹Tyicuan ta quichaha catyí ra chi ra cuan:

—Nducuíta ta cuahan. Nduvahun vatyí chinó iñun —catyí ra Jesús chi ra.

**Yoso caa cuquichi Nyoo cunyaca
ñaha ra nu iyó yo ihya**

(Mt. 24.23-28, 36-41)

²⁰Candacá tuhun ra fariseo chi ra Jesús, ta catyí ra:

—¿Ama quichi Nyoo cunyaca ñaha ra?

Tyicuan ta ra Jesús quichaha catyí ra:

—Cha cunyaca ñaha Nyoo ihya siqui ñuhu ñayivi, ñima cha nyehé yo cuví. ²¹Ma cuvi catyí ñáyivi: “Ma ra nyaá ihya, o ma ra nyaá ityi cuan.” Vatyí Nyoo cha chaa ra mahñu ndo, ta nyacá ñaha ra añima ñáyivi cuenda ra —catyí ra chi ra.

²²Yaha cuan ta catyí ra chi ra cacticá noo chihin ra:

—Cuchaa chi quivi vatyí cucuñi ndo nyehe ndo chi yuhu Rayii cha quichi nya gloria. Soco ma nyehe ndo chii. ²³Cuchaa tucu chi quivi ta cucatyí ñáyivi chi ndo: “Ihya nyaá ra”, o “Yucuan nyaá ra.” Soco ma cahun ndo cunyehe ndo. Ta ma cunyicon ndo chi ra cuan vatyí ñime cuví. ²⁴Vatyí tandihi ñáyivi cunyehe chi yuhu Rayii cha quichi nya gloria quivi quichi inga chaha. Tari nyehé tandihi ñáyivi nu quihvi tacha nicahnu andivi, tyicuan caa cucuvi. ²⁵Soco cunyehe xihne tundoho. Vatyí ñáyivi cha iyó cha vityin cua cutasi cuñi nyehe ñu chii. ²⁶Tari cuví quivi ra Noé, tyicuan caa cucuvi quivi quichi yuhu Rayii cha quichi nya gloria inga chaha. ²⁷Quivi ra Noé, chachí ñu. Chihí ñu. Tandahá ñu. Ta chahá ñu sehe ñu tandaha. Nya quivi quihvi ra Noé chichi barcu ra, ta coon savi xaan. Ta tandihi ñu cachihí ñu. ²⁸Tyicuan caa tucu cuví quivi ra Lot. Chachí ñu. Chihí ñu. Satá ñu. Xicó ñu. Tachí ñu. Ta savahá ñu vehe ñu. ²⁹Soco quivi cha quitá ra Lot ñuu Sodoma cuan, coon ñuhu chihin

azufre andivi. Ta chihí tandihi ñáyivi Sodoma. ³⁰Ta tyicuan caa cucuvi quivi cha quichi tucu yuhu Rayii cha quichi nya gloria inga chaha.

³¹Ta quivi cuan tatu nyicú ndo nuquehe ndo, ma ndihvi ndo chichi vehe ndo vatyí tava ndo ndaha tyiño ndo. O tatu chicá noo ndo nu chiqui, ma cunuhu ndo nya vehe ndo. ³²Ñicohon iñi ndo ñasihi ra Lot, ñáa cha cuví chi ña. ³³Tandihi ndo cha cuñi ca ndo cha iyó siqui ñuhu ñayivi ihya, cucunaa ndo. Ta tandihi ndo cha ña quichaha ndo cha iyó ñáyivi ihya, cucacu ndo.

³⁴Ta catyí chi ndo vatyí cha cuaa cuan uvi tahan ra cucava noo nu chito. Noo ri ra cunaquehin. Ta nonga ra cundoo ra. ³⁵Ta uvi tahan ñusihi iin ri cu nyicó ñu quivi cuan. Noo ri ña, cunaquehin. Ta nonga ña cundoo ña. ³⁶Ta catyí chi ndo vatyí uvi tahan ra cohon nu chiqui. Noo ra cunaquehin, ta nonga ra cundoo ra —catyí ra Jesús.

³⁷Cuhva cha chiñi ñu tuhun ihya, quichaha ndaca tuhun ñu chi ra Jesús.

—¿Nya maa maa cucuvi ihya Tata? —catyí ñu.

Tyicuan ta nacahan ra Jesús ta catyí ra:

—Nu catuví coño ñuhu chihí, yucuan cundu iin ri chii.

Nu sañahá ra Jesús vatyí tari chicán noo ñaha chihí yii chi juez, tyicuan caa tahán chi cacan yo chi Nyoo

18 Tyicuan ta chaha ra Jesús noo cuhva ihya. Vatyí na cacan tahvi ñu tyicuan ri maa, ta ma cundihñi ñu. ²Ta catyí ra:

—Iyó noo ñuu cha nyaá noo juez. Ta juez cuan ña sahá maa ra ñáyivi chi Nyoo. Ta ni ri ña quichaha maa ra chi ñáyivi. ³Ta suri ñuu cuan iyó tucu noo ñaha ndahvi cha chih̄i yii. Ta chah̄an ña chicahan ña chihin ra, vatyí chicá ña cuatyí chaha noo ra xaan iñi chi ña. ⁴Ta juez cuan ña quichah̄a maa ra chi ña. Ña sandaḡ maa ra tyiño chicá ña. Ta cha naha xaan chicán ña. Tyicuan ta quichaha ndichi xiñi juez cuan: “Vasi ña yuhví chi Nyoo, ta ñahri cuende chi ñáyivi, ⁵soco ñaha ihya sayangá xaan ña chii. Ta yucuan chaha cua sacaqui chi ña. Vatyí coto quichi ca ña, ta sanaquiqui ña tisihi”, ndichi xiñi ra.

⁶Tyicuan ta catyí ra Jesús:

—Tyicuan caa catyí juez ña vaha cuan. Tu juez cuan cha quiñi iyó ra ta tyinyee ra chi ñaha ndahvi cuan, ⁷ta nyaca cuví Nyoo, ¿atu ma tyinyee ra chi ñáyivi cha chicán ndiyaca ta ndiquivi chi ra? ¿Atu cuatu xaan ra cha tyinyee ra chi ñu? ⁸Catyí chi ndo, vatyí numi ri cutyinyee ra chi ñu. Soco quivi quichi yuhu, Rayii cha quich̄i nya gloria, inga chaha, chitó Nyoo tatu nañihi que chi ñu cha ndicha chinó iñi chii —catyí ra Jesús.

**Noo cuhva cuenda ra tavá
xuhun cuenda gobiernu ñuu
Roma ta cuenda ra fariseo**

⁹Tyicuan ta chah̄a ra Jesús nonga cuhva cuenda ra savahá chii, ta ña cuñi nyehe ra chi inga ra. Ta quichaha catyí ra:

¹⁰—Iyó uvi tahan ra chah̄an chichi vehe ñuhu chicac̄an tahvi ra chi Nyoo. Noo ra cuan ra

fariseo cuví ra. Ta inga ra cuan ra tavá xuhun cuenda gobiernu ñuu Roma cuví ra. ¹¹Ta ra fariseo cuan chicuinyaa ra, ta quichaha cahan ra chihin Nyoo. Ta cahnu saha ra chi ra. Ta catyí ra: “Sutu Mañi yuhu, nacuhve tyahvi nyoo chuun vatyí yuhu ñima tari inga ñáyivi cuví. Vatyí suhu ñu. Quiñi iyó ñu. Iyó ñasihi ra ta iyó inga ñusihi chi ra. Ta ni ri ñima tari ra tavá xuhun cuan cuví. ¹²Vaha ca quichah̄i tuhun maun ta ñima ca inga ñáyivi. Vatyí uvi chaha cha noo vitya ña chachí. Ta chah̄i uchi siqui noo noo cientu cha sahá ganai chuun”, catyí ra. ¹³Soco ra tavá xuhun cuenda gobiernu Roma cuan cha cañi ri chiin nanyaá ra. Ta ña caña iñi ra nanyehe ndaa ra. Ta cañi ra ndaha ra añima ra vatyí ndu uvi iñi ra cuatyí ra. Ta catyí ra: “Sutu Mañi yuhu. Nyeh̄e ndahvi chii vatyí iyó xaan cuatyí”, catyí ra —catyí ra Jesús.

¹⁴Ta catyí tucu ra Jesús tyehe caa:

—Catyí chi ndo vatyí Nyoo sahá ra tucahnu iñi chi ra tavá xuhun cuan. Sanaḡ Nyoo cuatyí ra ta cuanuhu ra nya vehe ra. Soco ra fariseo cuan, ñahri tucahnu iñi ñihi ra, vatyí yóó ñáyivi cha savahá xaan chi nuu Nyoo, cusanocuee Nyoo chi ñu, ta ñu sanocuee chi, Nyoo cusanducahnu ra chi ñu —catyí ra Jesús.

Nu nasocó ra Jesús chi ra cuatyaa

(Mt. 19.13-15; Mr. 10.13-16)

¹⁵Tyicuan ta quichi nyaca ñáyivi chi ra cuatyaa chi ra Jesús vatyí na tyiso ra ndaha ra xiñi ndotyin. Soco cuhva cha nanyehe ra cachicá

noo chihin ra vatyí tyicuan caa, ña chaha ca ra. ¹⁶Tyicuan ta cana ra Jesús chi ra cachicá noo chihin ra, ta catyí ra chi ra:

—Saña ndo chi ra cuatyaa na quichi maa ndotyín nu nyai. Ta ma casi ndo, vatyí ñu nyacá ñaha Nyoo aña, cuví ñu tari ra cuatyaa ihya. ¹⁷Ta catyí chi ndo vatyí tatu ña ita iñi ndo chi Nyoo, tari noo ra cuatyaa ita iñi ndotyín chi sutu ndotyín, ma cuvi quihvi ndo nu nyacá ñaha Nyoo.

**Nu chahá ra Jesús tuhun vatyí yíi
xaan nacuhva cuenda noo ra tyayíi
chi ra chi Nyoo**

(Mt. 19.16-30; Mr. 10.17-31)

¹⁸Tyicuan ta noo ra cha cuví nuu cuenda vehe ñuhu ndacá tuhun ra chi ra Jesús, ta catyí ra:

—Maestro, ra vaha cuvín. ¿Yoso caa cunyacuvi ta ñihi ñayiví cha ma naa ca maa coi? —catyí ra.

¹⁹Tyicuan ta catyí ra Jesús chi ra:

—¿Ñáá tuhun catyún vatyí ra vaha cuví? Noo ri maa Nyoo cuví ra ra vaha. (Ta cha catyún tyi vahi, nacotón tyi Nyoo cuví.)

²⁰Yoho chitón tandihí tuhun cha tachí Nyoo tyi sacuvi yo: “Cha ma coo inga ñusihí chuun. Ma cahñun chi ñáyiví. Ma suhun. Ma cahun cuendu siqui ñáyiví. Ta sahun ñáyiví chi sutun ta chi sihun” —catyí ra Jesús.

²¹Tyicuan ta ra cuan catyí ra:

—Tandihí ihya ta quichahí nyata luhlí ta nyacua nya vityín —catyí ra.

²²Nu chíñi ra Jesús cha catyí ra cuan, tyicuan ta catyí ra chi ra:

—Soco cumañi sacuvun nonga cha sacuvun. Xico tandihí cha iyó chuun.

Ta cuhva chi ñu ndahvi. Ta quichun chate. Tyicuan ta coo cha tyayíi chuun nya gloria —catyí ra.

²³Soco ra cuan nu chíñi ra tuhun cuan, nducuihya xaan iñi ra, vatyí tyayíi xaan ra. ²⁴Cha nanyehé ra Jesús vatyí nducuihya iñi ra, ta quichaha catyí ra:

—Yíi xaan ta cuvi nacuhva cuenda ñu tyayíi chi ñu na cunyaca ñaha Nyoo aña ñu. ²⁵Tañi tyehe yaha noo camello xiu noo yiqui ticu, ta ñima ca cha quihvi noo ñu tyayíi nu nyacá ñaha Nyoo —catyí ra.

²⁶Ta ñu cha cachíñi tuhun ihya catyí ñu:

—Tatu tyicuan caa, ¿yóó cha cuví cacu vii? —catyí ñu.

²⁷Tyicuan ta ra Jesús catyí ra:

—Tandihí cha ña cuví sacuvi rayíi, Nyoo cuví sacuvi ra —catyí ra.

²⁸Tyicuan ta ra Pedro catyí ra:

—Sutu Mañi yuhu, nyuhu tandihí maa cha iyó chi ndi sandoq ndi, ta nyicón ndi chuun —catyí ra.

²⁹Tyicuan ta catyí ra Jesús chi ra:

—Cha ndicha catyí chi ndo. Vatyí tandihí ndo cha sandoq ndo vehe ndo, o ñasihí ndo, o yañi ndo, o sutu ndo, o sehe ndo cha catyí cha chaha ndo cha cunyaca ñaha Nyoo aña ndo, ³⁰cuaha xaan cha vaha cunañihi ndo ihya ñayiví ta cunañihi ndo inga ñayiví cha ma naa ca maa —catyí ra Jesús.

**Inga chaha sacotó ra Jesús yoso caa
cucahñi ñáyiví chi ra**

(Mt. 20.17-19; Mr. 10.32-34)

³¹Ta cana siin ra Jesús chi ndi uchi uvi ra cachicá noo chihin ra, ta catyí ra chi ra:

—Vityín cahun yo nya Jerusalén. Vatyí yucuan cuchino cava tandihí

tuhin cha tyaa ra profeta Nyoo ta cha naha. Vatyí yuhu Rayii cha quichí nya gloria cuví. ³²Vatyí cucuhva cuenda ra chii chi ra inga ñuu, ra cha ñima ra ñuu Israel cuví. Ta cucuacu nyaa ra chii. Ta cucahan ra chii. Ta cutyicusii ra nui. ³³Ta cucañi ra chii, ta cucahñi ra chii, soco nu cu uñi quivi ta cunandote —catyí ra Jesús.

³⁴Ta ra cachicá noo chihin ra ña cutuñi iñi ra tuhun cuan ni ña cachitó ra ñáa tuhun cahán ra Jesús chihin ra. Vatyí ña chaha Nyoo vatyí cacutuñi iñi ra.

Nu sananyehé ra Jesús chi noo ra cuaa ñuu Jericó

(Mt. 20.29-34; Mr. 10.46-52)

³⁵Cuhva cha cua chaa ra Jesús ñuu Jericó. Ta yuhu ityi cuan nyaá noo ra cuaa. Ta chicán ra limuxtan.

³⁶Tyicuan ta chiñi ra vatyí cuaha xaan ñáyivi cua yaha. Ta ndaca tuhun ra ñáa cha cuví cuan. ³⁷Ta ñáyivi nacatyí ñu chi ra vatyí ra Jesús, ra ñuu Nazaret, ican cua yaha cuan. ³⁸Tyicuan ta quichaha cana chaa ra:

—iYoho Jesús, ra vachi tata rey David! iCundahvi cuñi nyehun chii! —catyí ra.

³⁹Ta ra cha cuahan coyo ityi nuu cuan, quichaha cacatyí ra chi ra, nacasi ra yuhu ra. Soco chaa ca caná chaa ra, ta catyí ra:

—iYoho, ra vachi tata ra David! iCundahvi cuñi nyehun chii! —catyí ra.

⁴⁰Tyicuan ta chicuñi ra Jesús yucuan. Ta tachi ra tyiño na cuquehen chi ra cuaa cuan. Ta cuhva cha chaá ra cuaa cuan

nu nanyaá ra Jesús, ta ra Jesús quichaha ndaca tuhun ra chi ra, ta catyí ra:

⁴¹—¿Ñáa cha cuñún vatyí sacuvi chuun?

Tyicuan ta ra cuaa cuan nacahan ra, ta catyí ra:

—Sutu Mañi yuhu, cuñi nanyehi —catyí ra.

⁴²Tyicuan ta catyí ra Jesús chi ra: —Nanyehe. Cha nduvaha chiti nuun, vatyí chinó iñun chii —catyí ra.

⁴³Ta caa cuhva ri cuan, ra cuaa cuan nanyehé ra. Ta cuahan ra chata ra Jesús. Ta sacahnú ra chi Nyoo. Ta tandihi ñáyivi cha nyehe ñu tyicuan caa, sacahnú ñu chi Nyoo.

Nu cuahan ra Jesús vehe ra Zaqueo

19 Yucuan ta quihvi ra Jesús ñuu Jericó cuan. Ta cua yaha ra chichi ñuu cuan. ²Ta yucuan iyó noo ra tyayii vavaha. Nañi ra Zaqueo. Ta ra cuví nuu cuenda ra catava xuhun cuenda gobiernu ñuu Roma cuví ra. ³Ta cuñi xaan ra cohon nuu ra chi ra Jesús. Ta ña cuví nyehe ra chi ra vatyí cuaha xaan ñáyivi. Ta maa ra tyaha xaan ra. ⁴Yucuan ta chino vavaha ra cuahan ra ityi nuu, ta ndaa ra nu noo yutun cha nañi sicómoro cha nanyaá yuhu ityi nu cua yaha ra Jesús, tacuhva cuvi nyehe ra chi ra. ⁵Ta cuhva cha yaha ra Jesús nanyehé ndaa ra ityi siqui ta nanyehé ra chi ra Zaqueo. Ta quichaha catyí ra chi ra:

—Zaqueo, sanumi ta noun nu yutun chiña. Vatyí vityin cuhin vehun —catyí ra chi ra.

⁶Tyicuan ta numi ri noo ra Zaqueo nuu yutun cuan. Ta sii vavaha cuví chi ra. Ta quehen cuenda ra chi ra Jesús. Ta cuahan ra chihin ra nya vehe ra. ⁷Ta cha nyehe ñáyivi cha tyicuan caa, ta tandihi ñu quichaha cahán nyaa ñu chi ra Jesús. Ta catyí ñu vatyí ndoo ra vehe noo ra iyó cuatyí.

⁸Nu canyicú ra chichi vehe cuan, ra Zaqueo nicuinanyaá ra. Ta quichaha catyí ra chi ra Jesús: —Sutu Mañi yuhu, yuhu cua cuhve sava cha iyó chii chi ñu ndahvi. O tatu suhi chi ñáyivi chihin cha sandavi ñahi chi ñu, vityin cunacuhva cuende nya cumi ca tahan chaha chi ñu —catyí ra chi ra.

⁹Tyicuan ta catyí ra Jesús: —Vityin cacu añimon, ta ñáyivi chi ra Abraham cuvún. Vatyí nacuhva cuendon chuun chi Nyoo tari nacuhva cuenda ra Abraham chi ra chi Nyoo. ¹⁰Vatyí yuhu Rayii cha quichi nya gloria vachi nanduqui ta vachi sacaqui chi ñáyivi cha cua naa —catyí ra Jesús.

Nu sañahá ra Jesús na saha tyiño yo chihin cha chahá Nyoo chi yo

(Mt. 25.14-30)

¹¹Ta cha ni ri ca cha chiñi ñáyivi tuhun cahán ra Jesús, quichaha cahan tucu ra inga cuhva ihya. Vatyí cha cuyatyin chaa ra Jerusalén. Ta ñáyivi cuñi maa ñu vatyí cha cua quichaha ra cunyaca ñaha ra yucuan. ¹²Tyicuan ta catyí ra:

—Chiyo noo ra vaha ta cuñi cuhun ra noo ñuu cañi. Vatyí yucuan cunanduvi ra rey tacuhva vatyí

ndichi ra ñuu ra, soco cha cuví ra rey. ¹³Ta cuhva cha cumañi cuhun ra, cana ra chi uchi tahan musu ra. Ta chaha cuenda ra noo xuhun chi noo noo ra. Ta catyí ra chi ra: “Saha tyiño ndo chihin xuhun chiña nyacua nya ndichi mai”, catyí ra. ¹⁴Soco suhva ñáyivi ñuu ra, tasi cuñi ñu nyehe ñu chi ra ta ña cuñi ñu cha cuví ra rey chi ñu. Ta tachí ñu chi suhva ra cuhun chata ra, vatyí catyí ra vatyí ña cuñi ñu cha cuví ra rey chi ñu. ¹⁵Soco ra cuan nduvi ra rey. Tyicuan ta nachaa ra nya ñuu ra. Ta quivi cha nachaa ra, cana ra chi musu ra, ra cha sandoo ra xuhun chii. Vatyí coto ra yoso saha ganaa xuhun ra cha ni ri ca cha chahan ra. ¹⁶Ta chaá noo ra cuan. Ta catyí ra: “Tata, saha ganai uchi ca tahan chaha siqui xuhun cha sandoun chii”, catyí ra. ¹⁷Tyicuan ta quichaha catyí rey cuan chi ra: “Vaha xaan. Yoho vaha musu cuvún. Vatyí vaha saha tyiñon chihin chiin xuhun cha chahí chuun. Ta vityin cunyaca ñahun uchi tahan ñuu”, catyí rey cuan chi ra. ¹⁸Tyicuan ta chaá tucu inga ra cha chahá ra xuhun chii. Ta quichaha catyí ra: “Ma xuhun ihya. Saha ganai ohon tahan ca chaha siqui xuhun cha sandoun chii”, catyí ra. ¹⁹Tyicuan ta catyí rey chi ra: “Yoho cunyaca ñahun ohon tahan ñuu”, catyí ra. ²⁰Tyicuan ta chaá tucu inga ra cuan. Ta quichaha catyí ra: “Ma xuhun ihya cha chahun chii. Yuhu chicumí vahi chichi noo pañitu. ²¹Vatyí yuhví xain chuun, vatyí yoho cuvún noo ra xaan. Vatyí naquehun cha ñima chuun cuví. Ta naquehun tyiño saha inga ñáyivi”, catyí ra cuan. ²²Tyicuan ta rey cuan

catyí ra chi ra: “Yoho musu ña vaha cuvún. Vityin suri chihin tuhun cha catyun chii, cucatyí tucu yuhu chuun. Tatu chitón vatyí yuhu, xain, ta chitón vatyí naquehin cha ñima chii cuví, ta naquehín cha ña saha tyiñe, ²³ ñáá tuhun ña chahun ta chityihun xuhin banco vatyí nachai soco cha nducuaha ca xuhin?” catyí rey cuan. ²⁴ Ta quichaha catyí ra chi ra canyicú cuan: “Tĩnyaa ndo xuhun cha chahí chi ra, ta cuhva ndo chi ra cha saha ganaa uchi ca tahan cuan”, catyí ra. ²⁵ Tyicuan ta quichaha catyí ra chi rey cuan: “Tata, soco ra cuan, cha iyó uchi tahan chi ra”, catyí ra. ²⁶ Tyicuan ta rey cuan catyí ra: “Soco catyí yuhu chi ndo. Vatyí ra cha vaha ca sahá tyiño chihin cha chahí chi, cucuhva que chi ra. Ta ra cha chahí chiin ri, ta ña cuñí ra sahá tyiño ra chihin cuan, cutinyaa ndihi chi ra. ²⁷ Ta tandíhi ñu xaan iñi chii, ñu ña cuñí vatyí cunyaca ñahi chi ñu, nyaca ndo chi ñu tyehe vatyí cahñi ndo chi ñu nui”, catyí rey cuan —catyí ra Jesús.

Nu cua chaa ra Jesús Jerusalén

(Mt. 21.1-11; Mr. 11.1-11; Jn. 12.12-19)

²⁸ Cha yahá cahan ra Jesús cuhva cuan, ta sañihi ra cuahan ra ityi Jerusalén. ²⁹ Yucuan ta cua chaa ra ñuu Betfagé chihin ñuu Betania, yatyin ri noo yucu cha nañi Olivo, vatyí maa maa ri maa tun Olivo iyó yucuan. Ta tava ra tyiño chi uvi tahan ra cachicá noo chihin ra. ³⁰ Ta catyí ra chi ra:

—Cuahan ndo ñuu cha nyaá yatyin ri cuan. Ta yucuan cunañihi ndo noo burru luhlu, quití ta coto ca tyayu, nuhñí ti. Ndachi ndo chi

ti. Ta nyaca ndo chi ti tyehe. ³¹ Tatu yóo cha catyí chi ndo: “¿Ñáá tuhun cha ndachi ndo chi ti?” catyí ndo chi ñu: “Vatyí chiñuhú ti chi maa ra nyaca ñaha chi yo.”

³² Tyicuan ta ra cachicá noo chihin ra, cuahan coyo ra. Ta nañihí ra chi ti tari cuhva catyí maa ra Jesús. ³³ Ta cuhva cha candachi ra chi ti, cha coyo chitoho ti. Ta candaca tuhun ra chi ra: —¿Ñáá tuhun cha ndachi ndo chi burru chiña? —catyí ra.

³⁴ Tyicuan ta canacahan ra cuan ta cacatyí ra:

—Ndachí ndi chi ti vatyí chiñuhú ti chi maa ra nyacá ñaha —catyí ra.

³⁵ Tyicuan ta quehen ra chi ti. Ta chinyaca ra chi ti nu nyaá ra Jesús. Ta tyiso ra sahma ra siqui ti. Tyicuan ta casandaa ra chi ra Jesús siqui ti.

³⁶ Tyicuan ta cuahan ra Jesús. Ta cuaha vavaha ñáyivi cachacun ñu sahma ñu ityi nu cua yaha ra, yosó ra burru cuan.

³⁷ Tyicuan ta cha cua cuyatyin tandíhi ñu chihin ra Jesús nu iñi noo yucu Olivo cuan. Ta quichaha cana chaa tandíhi ñu chinó iñi chi ra chihin cha sií cuví chi ñu. Ta sacahnú ñu chi Nyoo vatyí cuaha xaan cha vaha nyehe ñu cha sacuví ra. ³⁸ Yucuan chaha catyí ñu:

—iNa sacahnu yo chi Rey ihya vatyí vachi ra chihin sivi Nyoo! iNa coo cha taxi ri andivi! iTa na sacahnu yo chi Nyoo! —catyí ñu.

³⁹ Tyicuan ta suhva ra fariseo cha cuahan coyo chihin ñáyivi cuan quichaha cacatyí ra:

—Maestro, sacutaxin chi ñu nyicón chuun —cacatyí ra.

⁴⁰ Nacahan ra Jesús ta catyí ra: —Tatu ñáyivi ihya ta cu taxin ñu, nyacua nya yuu ta nacana chaa chi, ta sacahnu chi chii —catyí ra Jesús.

⁴¹Yucuan ta cha cua chaa ra vatyin ri Jerusalén cuan. Ta nanyehe ra Jesús chi ñuu cuan ta quichaha chacu chaa ra vatyí cuihya iñi ra. ⁴²Ta catyí ra: —Tyehe ta chitó nyoho, ta cutuñi iñi ndo yoso caa cha vaha cha vachi nyaque chi ndo quivi ihya. Soco xehe xaan ñohó cha chiñi tuñi cuan, ta ña nañihí maa ndo. ⁴³Soco cuchaa quivi ña vaha vatyí ra xaan iñi chi ndo cutyíhi chacu ra chi ndo. Vatyí tandíhi ri ityí cuquichi coyo ra siquí ndo. Ta cucañi tahan ra chihin ndo. ⁴⁴Ta cucacun ñuhú ra chi ndo ta cucañi ra chi ndo. Ta ni noo yuu yoso nyitahan ta ma sandoo ra. Tyicuan caa cucuví vatyí ña cuñí ndo nacoto ndo cha quichi Nyoo quichi sacacu ra chi ndo.

Nu tavá ñehe ra Jesús chi ra caxico chichi vehe ñuhu cahnu

(Mt. 21.12-17; Mr. 11.15-19; Jn. 2.13-22)

⁴⁵Tyicuan ta ra Jesús quihví ra chichi nuquehe vehe ñuhu cahnu. Ta quichaha tava ñehe ra tandíhi ra caxicó ta casatá yucuan. ⁴⁶Ta catyí ra chi ra:

—Nu tutu Nyoo catyí chi vatyí vehe Nyoo, nu chicán tahvi yo chi ra cuví. Soco nyoho sananduví ndo vehe nu nyicú ra suhu —catyí ra.

⁴⁷Ta tandíhi quivi chahán ra Jesús chisañaha ra chi ñáyivi chichi vehe ñuhu cuan. Soco ra cacuví nuu chi tata sutu, ta ra casacuahá cuenda ley vehe ñuhu, ta ra cacuví nuu chi ñuu cuan, canducú ra cuhva yoso caa ta cahñi ra chi ra. ⁴⁸Soco ña ñihí maa ra cuhva yoso caa sacuvi

ra. Vatyí tandíhi ñáyivi ta vaha tyasohó ñu tuhun cahán ra Jesús.

Nu ndaca tuhun ra fariseo chi ra Jesús yóo cha tachí chi ra vatyí cahán ra nuu ñáyivi

(Mt. 21.23-27; Mr. 11.27-33)

20 Noo quivi cuan cha ni ri ca cha sañahá ra Jesús chi ñáyivi chichi vehe ñuhu cahnu, ta cahán ra tuhun yoso caa sacacú Nyoo chi ñu. Ta chaq coyo ra cuví nuu chi tata sutu chihin ra casacuahá cuenda ley vehe ñuhu, iñ ri chihin ra cacuví mandoñi. ²Ta cacatyí ra chi ra:

—Catyí chi ndi ¿yóo cha tyaa tyiño chuun vatyí sacuvun tyehe caa? —catyí ra.

³Tyicuan ta ra Jesús quichaha catyí ra chi ra:

—Yuhu tucu cua ndaca tuhin noo tuhun chi ndo. ⁴¿Yóo cha tachí chi ra Juan vatyí sacondutya ra chi ñáyivi? ¿Atu Nyoo tachí chi ra, o ñáyivi?

⁵Tyicuan ta cacatyí ra cuan chi ra tahan ra:

—Tatu catyí yo vatyí Nyoo tachí chi ra Juan cuan, cucatyí ra chi yo “Ñáá tuhun ña chinó iñi ndo tuhun cahán ra.” ⁶Ta tatu catyí yo vatyí ñáyivi tachí chi ra, ñáyivi cahñi ñu chi yo chihin yuu. Vatyí tandíhi ñu, ta cuñí ñu vatyí Nyoo tachí chi ra —cacatyí ra.

⁷Tyicuan ta cacatyí ra chi ra Jesús vatyí ña cachitó ra yóo cha tachí chi ra Juan vatyí na sacondutya ra chi ñáyivi.

⁸Tyicuan ta ra Jesús catyí ra chi ra:

—Ñi ri yuhu, ta ma catyi chi ndo yóo cha tachí chii, cha sacuvi tyehe caa.

Nu sañahá ra Jesús vatyí tari ra sahá tyiño ña vaha tyicuan caa cuví ra cha cacahñi chi ra

(Mt. 21.33-44; Mr. 12.1-11)

⁹Tyicuan ta quichaha catyi ra Jesús noo cuhva ihya chi ñáyivi: —Noo ra tachí ra cuaha yoho tichaha ndivi nu ñuhú ra. Yahá cuan ta chahá noo ra ñuhú cuan chi suhva ra casaha tyiño. Tyicuan ta naha cuahan ra inga ñuu. ¹⁰Ta chaa quivi cha iñi chiti cuan. Tyicuan ta tachí ra chi noo musu vatyí cuquehen ra suhva chiti cha tahán chi chi ra. Soco cacañi xaan ra casahá tyiño cuan chi musu cuan. Ta sacunuhu ra chi ra chihin nu ndaha nu ndii ra. ¹¹Tyicuan ta chitoho yoho tichaha ndivi cuan tachí tucu ra chi inga musu. Suri cacañi xaan ra chi ra. Ta cacahan uhvi ra chi ra. Ta natachi ra chi ra. Soco suri ñahri cachaha ra cuiso ra cunuhu. ¹²Tyicuan ta chitoho cuan tachí tucu ra chi inga ra. Soco suri tyicuan caa chinyacuvi tucu ra chihin ra. Ta sañicuehe ra chi ra. Ta tava ñehe ra chi ra yucuan.

¹³Yahá cuan ta quichaha catyi chitoho ñuhu cuan: “¿Yoso caa cunyacuvi vityin? Cua tachi chi sehi, ra cha cuñi vavahi. Ta cha nanyehe ra chi ra, vasi casaha ra ñáyivi chi ra, vatyí sehi cuví chi ra.” ¹⁴Soco cuhva cha cananyehe ra casahá tyiño cuan chi ra, catyí ra chi ra tahan ra: “Ican ra ihya cundoo chihin ñuhú ihya tatu chihi sutu ra. Soco nacahñi yo chi

ra. Vatyí ndoo maa yo chihin ñuhú ihya”, catyí ra. ¹⁵Tyicuan ta tava ñehe ra chi sehe chitoho ñuhú cuan ityi chata chacu. Ta cacahñi ra chi ra —catyí ra Jesús.

Tyicuan ta catyí ra Jesús chi ñáyivi nyicú cuan:

—¿Ñáá cha cusacuvi chitoho ñuhú cuan chi ra cacahñi chi sehe ra cha cuhva cha cuñi nyoho? ¹⁶Catyí chi ndo vatyí quichi ra ta cahñi ra chi ra casahá tyiño cuan. Ta cuhva ra ñuhú cuan chi inga ra —catyí ra Jesús.

Ta cuhva cha chiñi ñáyivi tuhun cuan, yuhví xaan ñu cuví. Ta quichaha catyí ñu:

—iÑa cuñi Nyoo ta cuvi tyicuan caa! —catyí ñu.

¹⁷Soco ra Jesús nanyehe ra chi ñu ta catyí ra:

—Tyicuan caa cucuvi. Vatyí nyaá nu tutu Nyoo ta catyí chi tuhun tyehe caa:

Yuu cha ña cuñi ra casavahá vehe cotyiño ra,

Ican cuan cuví yuu cha niñi ca.

¹⁸Tari tahnu noo ra cha canacava siqui yuu, tyicuan caa tiví ñu ña cuñi quichaha tuhun cahín. Ta siin ri, tari taxin nyihi noo ra cha canacava yuu siqui, tyicuan caa cunaa ñu ña cuñi quichaha tuhun cahín —catyí ra Jesús.

¹⁹Ta ra cacuví nuu chi tata sutu ta ra casacuahá cuenda ley vehe ñuhu catuvi iñi ra vatyí tuhun cha catyí ra Jesús, chi maa ra nañi cuan. Ta cuñi ra catiin ra chi ra Jesús vatyí cacahñi ra chi ra. Soco ña cachitó maa ra yoso caa. Vatyí yuhví ra chi ñáyivi.

**Tuhun cha tyiahví ñu xuhun chi
gobiernu ñuu Roma**

(Mt. 22.15-22; Mr. 12.13-17)

²⁰Tyicuan ta catachĭ ra chi suhva ra vatyĭ cunducu nyehe ra chi ra Jesús. Ta casahā ra tyĭ ra vaha cacuvi ra. Vatyĭ coto ra ñáá noo tuhun ña vaha cahán ra Jesús tacuhva cuvi catiĭn ra chi ra. Ta cuhva cuenda ra chi ra chi gobernador. ²¹Yucuan chaha candacā tuhun ra casavaha chii cuan chi ra Jesús:

—Maestro, chitó ndi vatyĭ vaha tuhun cahún. Ta sañahún cha vaha chi ñáyivĭ. Ta ñima cuhva iyó ri ñu nyehun soco añima ñu ñandihĭ. Ta maa ri maa ityĭ Nyoo sañahún.

²²Catyĭ chi ndi ĩatu vaha cha tyiahvi yo cha chicán gobiernu ñuu Roma chi yo, o ña vaha? —catyĭ ra.

²³Soco ra Jesús tuvĭ ĩni ra vatyĭ cuñĭ ra nducu nyehe ra chi ra. Ta catyĭ ra chi ra:

—¿Ñáá tuhun cuñĭ ndo nducu nyehe ndo chii? ²⁴Sañaha ndo noo xuhun chiña chii, na nyehi. ¿Yóó chi nuu ta yóó chi sivi nyaá nu xuhun ihya? —catyĭ ra.

Tyicuan ta nacahān ra cuan, ta catyĭ ra:

—Nuu gobiernu, ta sivi ra ñandihĭ —cacatyĭ ra.

²⁵Tyicuan ta catyĭ ra Jesús:

—Tu tyicuan caa, cūhva ndo xuhun chiña chi ra cuví gobiernu cuan vatyĭ chi maa ra tahán chi. Ta cūhva tucu ndo chi Nyoo cha tahán chi chi ra —catyĭ ra Jesús chi ra.

²⁶Ta ña cuví maa sandahvi ñaha ra chi ra Jesús chihin tuhun cahán

ra nuu ñáyivĭ. Ta iyo xaan cacuñĭ ra tuhun cha nacahān ra. Ta taxi ri cuví ra.

**Nu cacuñĭ ra saduceo sandavi ñaha
ra chi ra Jesús**

(Mt. 22.23-33; Mr. 12.18-27)

²⁷Cha yaha cuan ta chaā coyo suhva ra saduceo nu nyaá ra Jesús. Maa ra cuví ra casañahá vatyĭ ña nandotó ndiyĭ.

²⁸Tyicuan ta catyĭ ra chi ra Jesús: —Maestro, sandoō ra Moisés tuhun ihya vatyĭ tatu noo ra chihĭ ra ta ndoo ñasihi ra, tatu yori sehe ra chiyō chihin ña, tahán chi cha tandaha yañi ra chihin ña tacuhva cha ma cunaa tata yañi ra. ²⁹Soco cuñĭ ndi coto ndi vatyĭ chiyō ucha tahan ra chihin yañi ra. Ta ra cha ñihi ca chicoō ñasihi ra, soco yori sehe ñu chiyō, ta chihĭ ra. ³⁰Tyicuan ta naquehēn ra cha cu uvi suri maa ña cuan. Ta yori tucu sehe ñu chiyō. Ta chihĭ tucu ra cuan. ³¹Ta suri tyicuan caa cuví chihin ra cu uñi cuan. Ta suri tyicuan caa cuví chi ndi ucha ra. Ni noo ra ta yori sehe ra chiyō chihin ña. ³²Ta nu ndihĭ tuhun chihĭ ndihĭ maa ña. ³³Ta cuñĭ ndi coto ndi yóó ra cuví ñasihi chi ña chichi cha ndi ucha tahan ra cuan nu cunandoto ñu nuu Nyoo —cacatyĭ ra saduceo cuan.

³⁴Tyicuan ta nacahān ra Jesús, ta catyĭ ra:

—Ihya ñayivĭ, rayĭ ta ñusihi tandaha ñu. ³⁵Soco ñu cha tahán chi nandoto inga ñayivĭ nu nyacá ñaha Nyoo, ña tandaha ca ñu ta ni ma cuhva ca ñu sehe ñu tandaha.

³⁶Ta ñahri tuhun chihĭ iyó nyicuan.

Soco cucuvi ñu tari ángel. Ta cuví ñu sehe Nyoo cha ndicha vaha vatyí nandoto ñu. ³⁷Cha ndicha cuví vatyí ra Moisés nu sacoto ra tuhun cha cayu taca iñu cuan, yucuan sacoto ra chi yo vatyí ñu chihi nandoto ñu. Vatyí yucuan catyí ra vatyí Sutu Mañi yo Nyoo cuenda ra Abraham, ta Nyoo cuenda ra Isaac, ta Nyoo cuenda ra Jacob, cuví chi ra. ³⁸Vatyí Nyoo ñima Nyoo cuenda ñáyivi chihi cuví ra. Nyoo cuenda ñu nyitó cuví ra. Vatyí cha cuenda Nyoo tandihi yo ta nyitó ñima yo vasi chihí coño ñuhu yo —catyí ra Jesús.

³⁹Tyicuan ta suhva ra casacuahá cuenda ley vehe ñuhu catyí ra:

—Vaha xaan nacahun Maestro — catyí ra.

⁴⁰Yucuan ta ña caña ca maa iñi ra candaca tuhun ra ñáá ca tuhun chi ra Jesús.

Cristo vachi ra tata ra David, ta suri cuví tucu ra Sehe Nyoo

(Mt. 22.41-46; Mr. 12.35-37)

⁴¹Tyicuan ta ndaca tuhun ra Jesús chi ñu:

—¿Ñáá tuhun cha catyí ndo vatyí ra Cristo tata ra David vachi ra?

⁴²⁻⁴³Vatyí suri maa ra David catyí ra nu libru Salmo tyehe caa:

Cahán Suti Nyoo chihin Suti ra Cristo, ta catyí ra chi ra:

“Cunyaa chiyo vahi nyacua nya cuhve chi ra xaan iñi chuun vatyí cuaca chahun siqui ra”, catyí Nyoo chihin yuhu ra David ta cha naha.

⁴⁴¿Yoso caa cha ra vachi tata ra David cuví chi ra Cristo, ta suri

maa ra David catyí vatyí Sutu ra cuví chi ra Cristo? —catyí ra Jesús.

Nu catyí ra Jesús vatyí cuaha xaan cuatyí ra casacuahá cuenda ley vehe ñuhu iyó

(Mt. 23.1-36; Mr. 12.38-40; Lc. 11.37-54)

⁴⁵Tandihi ñáyivi cachiñi ñu tuhun cahán ra Jesús chihin ra cachicá noo chihin ra nu catyí ra tyehe caa:

⁴⁶—Saha ndo cuenda chi ndo chihin ra casacuahá ley vehe ñuhu. Tahán xaan iñi ra cuihno ra sahma cañi. Ta cuñi ra vatyí saha ndo ñáyivi chi ra nuyahvi ta cuhva ndo nocumi chi ra. Ta nanducú ra tyayu vaha cunyaa ra chichi vehe ñuhu ta nu cuahan ra vico. ⁴⁷Ta naha chicán tahvi ra chi Nyoo nu tuvi, cha cuñi ra cha catyí ñáyivi tyi vaha ñáyivi cuví ra. Soco suri maa ra tinyaá ra vehe ñu ndahvi cha chihí yíi vatyí ña cuví tyiyahvi ñu xuhun cha tavá ra siqui ñu. Yucuan chaha ñihi ca cutachi tuñi Nyoo chi ra —catyí ra Jesús.

Noo ofrenda cha chaha noo ñaha sihi cha chihí yíi

(Mr. 12.41-44)

21 Ta nyehe ra Jesús vatyí cuaha xaan ñu tyayii catyihí ra xuhun chichi caja cha nanyaá chichi vehe ñuhu cahnu. ²Ta nyehe tucu ra noo ñaha ndahvi cha chihí yíi. Ta tyihí ña uvi tahan ri xuhun cuatyí. ³Ta catyí ra Jesús: —Cha ndicha catyí chi ndo vatyí nuu Nyoo cuaha ca tyihí ñaha ndahvi ihya ta ñima ca tandihi ñu tyayii cuan. ⁴Vatyí cha ndoó ri siqui chi ñu catyihí ñu. Soco ñaha

ihya tyihí ña tandihí cha iyó chi ña
—catyí ra.

**Nu catyí ra Jesús vatyí cucani ñáyivi
vehe ñuhu cahnu**

(Mt. 24.1-2; Mr. 13.1-2)

⁵Tyicuan ta suhva ñu ndatuhún
ñu tuhun vehe ñuhu cahnu cuan.
Ta catyí ñu vatyí tyaqui xaan yuu.
Tyaqui xaan tacaá cha chahá ñáyivi.
Tyicuan ta quichaha catyí ra Jesús:

⁶—Coo quivi ta tandihí cha
nyehé ndo ihya cutani. Ni noo yuu
ta ma coso ca siqui tahan. Vatyí
cusanacoyo ra xaan iñi chi ndo.

**Ñáá ndihí seña cha cucuvi cha ni
cumañi ca naa ñáyivi**

(Mt. 24.3-28; Mr. 13.3-23)

⁷Tyicuan ta quichaha candaca
tuhun ra chi ra Jesús, ta catyí ra:
—Maestro, ¿ama cucuvi tandihí
tuhun cahun ihya? ¿Yoso caa ta
coto ndi tatu cha cuyatyin cha naa
ñáyivi? —cacatyí ra.

⁸Tyicuan ta catyí ra Jesús:
—Saha vaha ndo cuenda, coto
sandavi ñaha ra chi ndo. Vatyí
cuaha xaan ra cuquichi, ta
cucotyíño ra sivi, ta cucatyí ra:
“Yuhu cuví Cristo ra cha saquichí
Nyoo chi. Cha cuñí cunaa ñáyivi”,
cucatyí ra. Soco ma cunyicon ndo
chi ra. Ta ma chino iñi ndo chi ra.
⁹Ta quivi ñihí ndo tuhun tyi iyó
cuatyí ta cañí tahan ñáyivi, ma
nayuhvi ndo. Vatyí tandihí cuan
cutahan chi cuvi xihna ca. Soco
cumañi ca chaa quivi cha naa
ñáyivi.

¹⁰Ta catyí tucu ra:

—Ñáyivi iyó noo ñuu cuchañi tahan
ñu chihin ñáyivi inga ñuu. Ta cucoo

cuatyí. ¹¹Ta cutaan nahnu. Ta
cucoo tama. Ta cucoo cuehe tandihí
ri ityi. Ta cunyehe ñáyivi cuaha
xaan cha yuhví andivi. Cuaha xaan
seña nahnu cha ña tuhvá ñu nyehe
cunyehe ñu. ¹²Soco cha cumañi ca
cuví ihya, cutasi iñi ñáyivi chi ndo.
Ta cucacan ñu cuatyí chaha ndo.
Vatyí cucutuñi chi ndo ta cucuhva
cuenda ñu chi ndo chi tata sutu. Ta
cutyihí ñu chi ndo chichi vehe caa.
Ta cunyaca ñu chi ndo nuu rey ta
nuu ra cacuví tyiño cha catyí yuhu.
¹³Tyicuan ta cuvi cahan ndo tuhun
chihin ñu. ¹⁴Soco saha ndo cuenda
ta ma caca xiñi ndo ñáá tuhun
cunacahan ndo chihin ra cuví
tyiño cuan. ¹⁵Vatyí yuhu cucuhve
tuhun cunacahan ndo. Ta cucuhve
cha chiñi tuñi xiñi ndo. Vatyí ni
noo ra xaan iñi chi ndo ta ma cuvi
chasaha ra chi ndo chihin tuhun
cahán ra. ¹⁶Soco ñáyivi cunacuhva
cuenda ñu chi ndo nuu ñu xaan iñi
chi ndo. Nyacua nya sutu ndo ta
sihi ndo, yañi ndo, tahan ndo, ta
ra tahan ndo cunacuhva cuenda
ra chi ndo chi ñu xaan iñi chi ndo.
Ta yihí nyoho cucahñi ñu chi ndo.
¹⁷Tandihí ñáyivi ta cutasi cuñí ñu
nyehe ñu chi ndo cha catyí yuhu.
¹⁸Soco ni noo ixi xiñi ndo ta ma
cunaa. ¹⁹Tatu ma ndu uvi iñi ndo
chii, cucacu añima ndo.

²⁰Quivi nyehe ndo vatyí
nicachico yuhu ñuu Jerusalén ihya
nyicú sindaro, coto ndo vatyí cha
cuñi chaa quivi cha sanaa ra ñuu
ihya. ²¹Ta ñáyivi cha nyicú ityi
Judea, na cono ñu ta na tixehe
nuu ñu ityi yucu. Ta ñu nyicú ñuu
Jerusalén ihya, na quita ñu. Ta
ñu nyicú nu chiqui, ma ndichi ñu

ñuu ihya. ²²Vatyi yucuan quivi cutachi tuñi Nyoo chi ñáyivi ñuu ihya. Vatyi cuchino cava tandihi cuhva catyí maa nu tutu Nyoo. ²³Ta ndahvi ñusihí cha ñohó sehe quivi cuan. Ta ndahvi ñu cha iyó cha lee sehe cha ni chaxín ca. Vatyi cuaha xaan tindocho cunyehe ñu ta tandihi ñáyivi. Vatyi cuxaan xaan Nyoo chihin ñáyivi ñuu Jerusalén ihya. ²⁴Síndaro cucahñi ra chi suhva ñáyivi chihin mityi ra. Ta suhva ñu cutiin ra ta cunyaca ra chi ñu vehe caa inga ñuu. Ta ñáyivi cha ñima ñu Israel cuví, cucuaca chaha ñu Jerusalén nyacua nya quivi cha catyí maa Nyoo.

**Yoso caa cuquichi Rayii cha quichi
nya gloria inga chaha**

(Mt. 24.29-35, 42-44; Mr. 13.24-37)

²⁵Tyicuan ta cuaha cha iyo cunyehe ñáyivi nu ñanyii, ta nu yoo, ta nu tiño. Ta ihya siqui ñuhu ñáyivi cunayuhvi ñáyivi chihin cha iyo cunacatyin tyañuhu. ²⁶Ta cucuña ñu chihin cha yuhví ñu cha chicá xiñi ñu ñáá ndihi cha cua cuvi ihya siqui ñuhu ñáyivi. Vatyi nyacua nya cha iyó andivi cunacanda. ²⁷Tyicuan ta cunyehe ñu chi yuhu Rayii cha quichi nya gloria vachi chichi noo vico tyaqui chihin tunyee iñi Nyoo, ta chihin cha cahnu cuví ra. ²⁸Ta cuhva cha quichaha tuhun ihya, sandunii ndo iñi ndo ta cusii cuñi ndo vatyi numi xaan ta cucacu ndo —catyí ra.

²⁹Tyicuan ta chaha ra Jesús noo cuhva ihya, ta catyí ra:

—Saha ndo cuenda noo yutun cha nañi higuera, o ñáá nonga yutun.

³⁰Tatu cha cua cuyatyin cha coon

savi cha nduyutya numa tun. ³¹Ta tyicuan caa tucu nyoho, tatu cha nyehe ndo vatyi cha quichaha tandihi tuhun cha catyí chi ndo, coto ndo vatyi cha cuyatyin quivi cha cunyaca ñaha Nyoo siqui ñuhu ñáyivi ihya.

³²Soco catyí chi ndo vatyi tuhun ihya cucuvi cha ni ri ca cha iyó ñáyivi. ³³Ta coo quivi cucunaa andivi ta ñuhu ñáyivi, soco tuhun cahán yuhu, tyicuan ri cucuvi tari cuhva catyí.

³⁴Ta saha ndo cuenda chi ndo coto ndundava añima ndo chihin vicio, ta coho xaan ndo ndixi, o caca xaan iñi ndo tuhun tundocho ñáyivi ihya. Ta coto sana iñi ndo ta chaa quivi quichi yuhu ta quichi tundocho siqui ndo. ³⁵Vatyi tyicuan caa cucuvi chi tandihi ñáyivi iyó siqui ñuhu ñáyivi. Sana iñi ñu ta tari noo cha cua nacasi Nyoo nu ñohó ñu ta ma cuvi quita ñu. ³⁶Soco nyoho cuatu tuhva ri ndo. Cacan tahvi ndo chi Nyoo tandihi quivi, tacuhva tyinyee ra chi ndo. Ta ma cunaa ndo quivi cuan, tacuhva cuvi chaa vaha ndo nuu yuhu Rayii cha quichi nya gloria —catyí ra Jesús.

³⁷Ta cha ñucahñu sañahá ra Jesús chi tandihi ñáyivi chichi vehe ñuhu cahnu. Ta cha cha cuaa chahán ra yucu Olivo. ³⁸Ta tandihi ñáyivi chaa coyo ñu chichi vehe ñuhu cahnu ndihi ñaha ri. Vatyi cuiñi ñu tuhun cahán ra.

**Nu cua xico ra Judas Iscariote chi ra
Jesús**

(Mt. 26.1-5, 14-16; Mr. 14.1-2, 10-11; Jn. 11.45-53)

22 Ta cha nyaña yatyin quivi cha coo vico pascua

vico nu tuhva ñu chachi pan cha ñahri yuchan iya yihí chihin. ²Ta ra cacuví nuu chi tata sutu chihin ra casacuahá cuenda ley vehe ñuhu, nducú xaan ra cuhva yoso caa ta cacahñi ra chi ra Jesús. Soco cayuhví ra chi ñáyivi.

³Tyicuan ta quihví cuihna chi ra Judas cha catyí ñáyivi Iscariote chi. Ta maa ra cuví noo ra cha uchi uvi tahan ra cha nacachi ra Jesús. ⁴Ta ra cuan, chahān ra chi cahan ra chihin ra cuví nuu chi tata sutu, ta chihin ra cuví nuu chi ra sahá cuenda vehe ñuhu cahnu. Ta candatuhun tahan ra yoso caa cunacuhva cuenda ra chi ra Jesús. ⁵Ta ra cuan sii xaan cacuví chi ra. Ta tyaa ra cuhva vatyí cuhva ra xuhun chi ra Judas. ⁶Ta ra Judas ndoo ra vaha. Ta quichaha nducu ra cuhva yoso caa cuhva cuenda ra chi ra Jesús chi tata sutu cuan, cuhva cha yori ñáyivi nyicú chihin ra.

Nu cuxiñi ra Jesús chihin ra cachicá noo chihin ra

(Mt. 26.17-29; Mr. 14.12-25;

Jn. 13.21-30; 1 Co. 11.23-26)

⁷Ta chaq quiví cha cuví vico nu chachí ñu pan cha ñahri yuchan iya yihí. Ta suri quiví cuan tuhva ñu chahñi ñu noo mbee luhlu cha vico pascua cuan. Vatyí cachi ñu chi ti.

⁸Ta ra Jesús tachí ra chi ra Pedro chihin ra Juan, ta catyí ra chi ra:

—Cuahan ndo cua sanduvaha ndo mbee cha cuxiñi yo —catyí ra.

⁹Tyicuan ta quichaha ndaca tuhun ra chi ra:

—¿Nya cuñún cha sanduvaha ndi cha cuxiñi yo? —cacatyí ra.

¹⁰Tyicuan ta catyí ra Jesús chi ra:

—Cuahan ndo chichi ñuu. Ta yucuan cunañihi ndo chi noo ra nyisó noo quiyi ndutya. Ta cuahan ndo chata ra nyacua nya nu quihví ra chichi vehe. ¹¹Ta catyí ndo chi chitoho vehe cuan: “Ra Sacuaha, cuñi ra coto ra nya nyaá cuarto nu sanduvaha ra cha cuxiñi ra chihin ra cachicá noo chihin ra, vatyí casanducahnu ra vico pascua.” Tyicuan caa catyí ndo chi ra.

¹²Tyicuan ta maa ra cuan cusañaha ra cuarto cahnu ityi siqui nu cu uvi piso chi ndo. Ta cha yaha nduvii. Ta yucuan sanduvaha ndo cha cuxiñi yo —catyí ra chi ra.

¹³Tyicuan ta cuahan coyo ra. Ta nañihi ra tandihi tari cuhva catyí ra Jesús. Tyicuan ta casanduvaha ra cha cuxiñi ra cha vico pascua cuan.

¹⁴Yucuan ta cha chaq cuhva cha cuxiñi ra Jesús ta tandihi apóstol ra, cachicunicyu ra yuhu mesa.

¹⁵Tyicuan ta ra Jesús quichaha catyí ra:

—Cuñi xain cuxiñi in caa ri chihin ndo cuenda vico pascua ihya cha ni ri ca cha cumañi ca cunyehi tundoho ta cúvi. ¹⁶Vatyí nya ri ca ihya cua cachi ta cucúvi. Yucuan ta cachi tiqui soco nya nu nyacá ñaha Nyoo —catyí ra.

¹⁷Tyicuan ta quehen ra noo vasu vinu. Ta nacuhva ra tyiyahvi nyoo chi Nyoo, ta sayaha ra chi tandihi ra nyicú chihin ra. Ta quichaha catyí ra:

—Quehen ndo ihya. Ta coho ndo suhva suhva. ¹⁸Vatyí catyí chi ndo vatyí ma coho que vinu tichaha ndivi nyacua nya quichi cha nyacá ñaha Nyoo ñayiví ihya —catyí ra.

¹⁹Ta yaha cuan ta quehen ra pan. Ta nacuhva ra tyahvi nyoo chi

Nyoo. Ta tahv̄i sava ra. Ta chah̄a ra chi ra cachicá noo chihin ra. Ta quichaha catyí ra:

—Ican ihya cuví coñe. Vatyí cha catyí ndo ta cua cuhva cuende chii ta cúvi. Tyicuan ri ñicohon iñi ndo chii ta cuxiñi ndo tyehe caa —catyí ra.

²⁰Ta cha yah̄a cuxiñi ra, tyicuan ta quehen tucu ra vaso vinu tichaha ndivi, ta quichaha catyí ra:

—Chihin ihya natyihí tahan Nyoo tuhun chaa chihin ndo vityin. Vatyí vinu cha yihí chichi vaso ihya, tari ñiñi cuví. Ta cha catyí nyoho ta cucati ñiñi. Vatyí cucúvi cha catyí ndo.

²¹Soco vityin, ra cha cua nacuhva cuenda chii chi ra xaan iñi chii, iin ri yoso ndaha ra chihin ndahi nu mesa ihya. ²²Vatyí yuhu Rayi cha quichi nya gloria cua cuví chii tari cuhva cha nyaá maa tyi cuví chii. Soco indahvi ra ndahvi, ra cha cunacuhva cuenda chii! —catyí ra Jesús.

²³Tyicuan ta ra cachicá noo chihin ra Jesús quichaha candaca tuhun ra chi tahan ra, nya ra cuví ra cua nacuhva cuenda chi ra chi ra xaan iñi chi ra.

Nu candatuhún ra cachicá noo chihin ra Jesús yóo ra cahnu ca cuví

²⁴Yah̄a cuan ta quichaha candatuhun ra cachicá noo chihin ra Jesús nya ra cahnu ca cuví.

²⁵Soco ra Jesús catyí ra:

—Chitó nyoho vatyí ra nyacá ñaha chi ñáyivi iyó siqui ñuhu ñayivi, ñihi xaan yosó ra siqui ñu. Ta cacuñi ra vatyí catyí ñáyivi tyi tyinyee ra chi ñu. ²⁶Soco nyoho ña

tahán chi sacuvi ndo tari sacuví ra cuan. Vatyí tatu cuñi ndo cuví ndo ra cuví nuu, tahán chi sacuvi ndo tyiño nuu ñáyivi. Vatyí tatu sacuví ndo tyiño nuu ñáyivi, ican ndo cuví ra cuví nuu. ²⁷Vatyí ihya siqui ñuhu ñayivi ra cuví nuu cuví ra cha ña sahá tyiño. Ta nyaá ra yuhu mesa ta musu ra sacuví ra tyiño nuu ra. Soco yuhu ra cuví nuu cuví, ta sacuví tyiño nuu ndo.

²⁸Soco nyoho tyicuan ri ndihi ndo chihin, tandihi chaha cha nyehí tundoho. ²⁹Yucuan chaha, yuhu chahí noo nu cunyaca ñaha ndo tari cha chah̄a Suti chii cha cunyaca ñahi. ³⁰Vatyí cucachi ndo cucho ndo yuhu mesa chihin nya nu nyacá ñahi. Ta yucuan cunyaa ndo nu tyayu tyaqui. Ta cunyaca ñaha ndo chi ndi uchi uvi tahan ityí ñáyivi vachi tata ra Israel.

Catyí ra Jesús vatyí cua catyí ra Pedro vatyí ña ñohó nuu ra chi ra
(Mt. 26.31-35; Mr. 14.27-31; Jn. 13.36-38)

³¹Tyicuan ta catyí ra Jesús chi ra Pedro:

—Nyehe vahun, yoho Simón. Vatyí cuihna, ra nañi Satanás, cha chican ra chi Nyoo na cuhva ra ityí chi ra vatyí quisi ñihno ra chi ndo tari naquisi ñihno yo trigo, tacuhva ndu uvi iñi ndo chi Nyoo. ³²Soco chicán xain chi Nyoo cha catyun, vatyí ma ndihi cha chinó iñun chi ra. Ta quivi ndu uvi iñun cuatyun ta na chino vaha iñun chii cutyinyeun chi ra tahun cha ma sandihi ra cha cachino iñi ra chii —catyí ra Jesús chi ra Simón.

³³Ta ra Simón catyí ra chi ra: —Sutu Mañi yuhu, cha iyó vahi vatyí cuhin chuhun vasi vehe caa, vasi tuhun chihi —catyí ra.

³⁴Tyicuan ta catyí ra Jesús chi ra:
—Pedro, catyí chuun vatyí vityin cha ni ri ca cha cumañi ca cuacu chaa loho, yoho cha uñi tahan chaha cucatyun vatyí ña ñohó nuun chii —catyí ra Jesús chi ra.

Nu cha cuñí chaa cuhva cha cunacuhva cuenda ra Judas chi ra Jesús

³⁵Tyicuan ta ndaca tuhun ra Jesús chi ra cachicá noo chihin ra, ta catyí ra:
—Ñicohon iñi ndo quivi cha tachi chi ndo vatyí cucahan noo ndo nuu ñáyivi ta ñahri nyiso ndo, ni ri cha cachi ndo, ni ri xuhun, ni ri sahma ndo. ¿Atu chiyo cha cumañi chi ndo quivi cuan? —catyí ra Jesús.

Tyicuan ta canacahan ra, ta catyí ra:
—Ñahri cha cumañi chi ndi.

³⁶Tyicuan ta quichaha catyí ra Jesús chi ra:

—Soco vityin, tatu iyó cha cachi ndo ta iyó xuhun ndo, cuiso ndo. Ta tatu ñahri mityi ndo, xico ndo noo sahma ndo ta sata ndo. ³⁷Vatyí catyí chi ndo, vatyí tandihi tuhun cha nyaá nu tutu Nyoo cuchino cava vatyí tyehe caa catyí chi: “Sahá ñu tuhun tyi cuví ra noo ra quiñi iyó.” Tyicuan caa catyí tuhun nu tutu Nyoo. Ta tandihi cuan cuchino cava —catyí ra.

³⁸Tyicuan ta quichaha catyí ra cachicá noo chihin ra:

—Ihya nyaá uvi tahan mityi —catyí ra.

Tyicuan ta catyí ra Jesús:

—Cha iyó vaha ri —catyí ra.

Nu chicān tahvi ra Jesús chi Nyoo Getsemaní

(Mt. 26.36-46; Mr. 14.32-42)

³⁹Tyicuan ta quitā ra Jesús vehe cuan. Ta cuahan ra nya yucu Olivo.

Tari cuhva tuhvá maa ra chahan. Ta ra cachicá noo chihin ra cuahan coyo ra chata ra. ⁴⁰Ta cuhva cha chaa ra yucuan, quichaha catyí ra chi ra cachicá noo chihin ra:

—Çacan tahvi ndo chi Nyoo tacuhva ma cuvi chasaha cuihna chi ndo.

⁴¹Tyicuan ta cuahan ra Jesús cha cañi ca, tari cuhva cha chaa noo yuu tatu tuchi yo. Yucuan ta chicuiñi chiti ra. Ta quichaha cahan ra chihin Nyoo, ⁴²ta catyí ra:
—Sutu Mañi yuhu, tu yoho ta cuñún, cuhva cha ma nyehi tundoho ihya. Soco ma cuvi tari cuhva cha cuñí mai. Soco na cuvi tari cuhva cha cuñí maun —catyí ra.

⁴³Tyicuan ta tuví noo ángel, vatyí cuhva ca ra tunyee iñi chi ra. ⁴⁴Ta cha ni ri ca cha nyehé xaan ra Jesús tundoho vatyí cuihya vavaha iñi ra, ta ñihi ca chicān tahvi ra chi Nyoo. Ta cuaha xaan tyeen ra quitā ta canacoyó nu ñuhú, ta tari caa niñi caa.

⁴⁵Yucuan ta nducuitā ra cha ndiñi cahan ra chihin Nyoo. Ta cuanuhu ra nu canyicu tandihi ra cachicá noo chihin ra. Ta nyehē ra vatyí caquixí ra, cha cuenda vatyí cacuihya xaan iñi ra, ña cacunyeē ra ñumahna ta caquixí ra.

⁴⁶Tyicuan ta quichaha catyí ra Jesús chi ra:

—¿Ñáá tuhun cha caquixí ndo? Nducuita ndo. Ta çacan tahvi ndo chi Nyoo, tacuhva cha ma cuvi chasaha cuihna chi ndo.

Nu chahā cuenda ra Judas chi ra Jesús chi ra xaan iñi chi ra

(Mt. 26.47-56; Mr. 14.43-50; Jn. 18.2-11)

⁴⁷Ni cahán ca ra Jesús tuhun ihya, ta cuaha xaan ra cachaa coyo.

Ta ityi nuu vachi ra Judas, noo ra chicá noo chihin ra Jesús cuví ra. Ta tuhva ra chi ra Jesús vatyí cua tyayuhu ra xitín ra. ⁴⁸Tyicuan ta catyí ra Jesús chi ra:

—Judas, ¿atu chihin cha cua tyayuhun chii, nacuhvá cuendon chi yuhu, Rayii cha quichi nya gloria, chi ra xaan iñi chii? —catyí ra Jesús.

⁴⁹Ta ra canyicú chihin ra Jesús quichaha ndaca tuhun ra chi ra:

—Sutu Mañi yuhu, ¿atu sañicuehe ndi chi ra chihin mityi? —catyí ra.

⁵⁰Yucuan ta noo ra, chahnya ra soho chiyo vaha noo ra cha cuví musu ra cuví nuu chi tata sutu.

⁵¹Soco ra Jesús catyí ra chi ra:

—Saña ndo. Vaha ri —catyí ra.

Tyicuan ta naquehen ra Jesús soho ra cuan. Ta natyaa ra, ta nduvaha.

⁵²Ta ra cacuví nuu chi tata sutu chihin ra cacuví nuu chi ra sahá cuenda vehe ñuhu, chihin ra cacuví mandoñi, ican ra cuví ra quichi coyo vatyí catiín ra chi ra Jesús. Ta quichaha catyí ra Jesús chi ra:

—¿Atu vachi coyo nyoho siqui chihin cha xaan ta chihin yutun tari cha vatyí minoo ra suhu cuví yuhu sahá ndo? ⁵³Ndiquivi chinyaí chichi vehe ñuhu cahnu, ¿ñáá tuhun ña cuví tiín ndo chii? Soco vityin chaq cuhva cha ñaa iñi vatyí ra ña vaha nyacá ñaha. Yucuan chaha vachi tiín ndo chii.

Nu catyí ra Pedro vatyí ña ñohó nuu ra chi ra Jesús

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

⁵⁴Tyicuan ta catiín ra chi ra Jesús. Ta cua nyaca ra chi ra nya vehe ra

cuví nuu chi tata sutu. Ta ra Pedro nyasava ri cuahan ra chata ra. ⁵⁵Ta cha chaq coyo ra vehe ra cuví nuu chi tata sutu cuan, casanatahan ra ñuhu nuquehe. Ta chicunycú cutya ra nicachico ri nu cayú ñuhu cuan. Ta chicunya tuu ra Pedro mahñu ñáyivi cuan. ⁵⁶Ta cuhva cha ndundichin cha cayu ñuhu cuan, tyicuan ta noo ñaha cha cuví musu tata sutu cuan nanyehé ña chi ra. Ta quichaha catyí ña:

—Ra ihya chicá noo ra chihin ra cuan —catyí ña.

⁵⁷Soco ra Pedro catyí ra:

—Yuhu ña ñohó nui chi ra cuan.

⁵⁸Tañi ri cuan ta nyehé tucu inga ra chi ra, ta catyí ra:

—Yoho, ra cuenda ra cuan cuvún —catyí ra.

Ta ra Pedro catyí ra:

—Ñima —catyí ra.

⁵⁹Ta cha yahá noo ora, ta nanyehé tucu inga ra chi ra ta catyí ra chi ra tahan ra:

—Cha ndicha cuii vatyí ican ra ihya cuví noo ra cha chicá noo chihin ra cuan. Vatyí suri ra Galilea cuví ra —catyí ra.

⁶⁰Tyicuan ta catyí ra Pedro:

—Ña chité ñáá tuhun cahún —catyí ra.

Ta caa cuhva ri cuan, ni cahán ca ra Pedro tuhun cuan, ta chacu chaa ri noo loho.

⁶¹Tyicuan ta ra Jesús nanyehé ra nuu ra Pedro. Ta ra Pedro nicohon iñi ra tuhun cha catyí ra Jesús chi ra: “Cuhva cha ni cumañi ca cuacu chaa loho, yoho cha catyun tyi ña ñohó nuun chii uñi tahan chaha.”

⁶²Tyicuan ta quita ra Pedro ityi chata vehe. Ta chacu vavaha ra cha cuihya iñi ra.

Nu cachacú nyaa ra chi ra Jesús ta cacañi ra chi ra

(Mt. 26.67-68; Mr. 14.65)

⁶³Tyicuan ta ra casahá cuenda chi ra Jesús, quichaha chacu nyaa ra chi ra. Ta cacañi ra chi ra. ⁶⁴Cachahñi ra sahma nuu ra, ta quichaha cacatu ra nuu ra. Ta cacatyí ra chi ra:

—Nacoto yóo cha cañi chuun — cacatyí ra chi ra.

⁶⁵Ta cuaha vavaha ca cha cacahan ra chi ra.

Nu ndacá tuhun ra chi ra Jesús tatu Sehe Nyoo cuví chi ra

(Mt. 26.59-66; Mr. 14.55-64; Jn. 18.19-24)

⁶⁶Ta cha cundichin inga quivi cuan. Ta candu in ri ra chahnu ñuu cuan chihin ra cuví nuu chi tata sutu, ta ra casacuahá cuenda ley vehe ñuhu. Ta caquehen ra chi ra Jesús. Ta cuahan coyo ra chihin ra nya nu cuví junta cahnu. Ta quichaha candaca tuhun ra chi ra:

⁶⁷—Çatyí chi ndi ¿atu ra Cristo ra cha saquichi Nyoo cuvún? —catyí ra chi ra.

Ta ra Jesús nacahan ra, ta catyí ra:

—Tatu catyí chi ndo vatyi ican, ma chino iñi ndo. ⁶⁸O tatu ndaca tuhun ñáa cha ndaca tuhun chi ndo, ma nacahan ndo ni ma saña ndo chii. ⁶⁹Soco vityin ta ityi nuu ca yuhu Rayi cha quichi nya gloria cucunyai chiyo vaha Nyoo ra cha iyó tandihi tunyee iñi chi —catyí ra.

⁷⁰Tyicuan ta tandihi ra quichaha ndaca tuhun ra chi ra:

—Tu tyicuan caa, Sehe Nyoo cuví chuun —catyí ra.

Tyicuan ta nacahan ra Jesús ta catyí ra:

—Suri maa ndo catyí tyi ican cuví.

⁷¹Tyicuan ta quichaha cacatyí ra cuan chi ra tahan ra:

—Nyehe nuu. Yuhu maa ra quita. Ña ñiñi ca cha tava yo cha ndaa. Vatyi suri maa yo chiñi —cacatyí ra.

Nu nyehę ra Pilato vatyi ñahri cuatyí ra Jesús

(Mt. 27.1-2, 11-14; Mr. 15.1-5; Jn. 18.28-38)

23 Tyicuan ta tandihi ra nducuita ra. Ta cua nyaca ra chi ra nya nu nyaá ra Pilato, ra cuví gobernador. ²Tyicuan ta quichaha cacatyí ra chi ra Pilato:

—Ra ihya, sativí ra chi ñáyivi chihin cha cahán ra nuu ñu, ta catyí ra vatyi ña vaha tyiyahvi ndi xuhun chi gobiernu ñuu Roma. Ta siin ri catyí ra vatyi ra Cristo ra cha saquichi Nyoo vatyi cuví ra rey cuví ra —cacatyí ra.

³Tyicuan ta ra Pilato quichaha ndaca tuhun ra chi ra Jesús, ta catyí ra:

—¿Atu ican yoho cuví Rey cuenda ñu Israel? —catyí ra.

Ta nacahan ra Jesús, ta catyí ra:

—Ican, suri maun catyí.

⁴Tyicuan ta quichaha catyí ra Pilato chi ra cuví nuu chi tata sutu ta chi ñáyivi:

—Ñahri cuatyí ra ihya —catyí ra chi ñu.

⁵Soco xaan ca nanduví ñu. Ta quichaha cacatyí ñu:

—Cahnu xaan cuatyí ra. Cuaha xaan tisihi chaha ra, vatyi cahán ra nuu ñáyivi. Cha xihna ri quichaha cahan noo ra nuu ñáyivi ityi

Galilea. Ta nicañi maa ityi vachi ra cahán ra chihin ñáyivi nyacua nya chaá ra Judea ihya —catyí ñu.

**Nu tachi ra Pilato chi ra
Jesús nuu ra Herodes**

⁶Cuhva cha chiñi ra Pilato tuhun ihya, quichaha ndaca tuhun ra tatu ra Galilea cuví ra Jesús. ⁷Ta catyí ñáyivi chi ra vatyí ican. Tyicuan ta sacuhun ra Pilato chi ra nya nu nyaá ra Herodes. Vatyí ra Herodes cuví ra gobernador nicahnu Galilea. Soco quívi cuan ñohó ra ñuu Jerusalén. ⁸Ta cuhva cha nanyehe ra Herodes chi ra Jesús, sii xaan cuví chi ra. Vatyí cha naha xaan cuñi ra nyehe ra chi ra. Vatyí ñihí ra tuhun vatyí cuaha xaan milagru sacuví ra. Ta cuñi xaan ra nyehe ra noo milagru cha sacuví ra Jesús. ⁹Ta cuaha xaan tuhun ndaca tuhun ra chi ra. Soco ra Jesús ña nacahan maa ra. ¹⁰Ta yucuan canyicú tucu ra cuví nuu chi tata sutu ta ra casacuahá ley vehe ñuhu. Ta catyaa xaan ra cuatyí siqui ra. ¹¹Tyicuan ta ra Herodes chihin sindaro cuenda ra chacu nyaa ra chi ra. Ta sandihvi noo ra noo sahma yahvi ta tyaqui chi ra, tari cha tuhvá rey ñihnó. Tyicuan ta natachi ra Herodes chi ra inga chaha nuu ra Pilato. ¹²Ta quívi cuan ra Pilato chihin ra Herodes nduvaha iyó ra chihin tahan ra. Vatyí nu quichi chi, ña cuví canyehe ra chi tahan ra.

**Nu cutuñí chi ra Jesús vatyí cucúvi
ra**

(Mt. 27.15-26; Mr. 15.6:15; Jn. 18.39—19.16)

¹³Tyicuan ta ra Pilato sandu iin ri ra chi ra cuví nuu chi tata sutu,

ta chi ra cuví tyiño, ta chi ñáyivi ñandihí. ¹⁴Ta catyí ra chi ñu:

—Nyoho quichi nyaca ndo chi ra ihya chii. Ta catyí ndo vatyí sativí ra chi ñáyivi. Soco yuhu cha sacutuñi chi ra nuu ndo. Ta ñahri cuatyí ra nañihí tari cuhva catyí ndo. ¹⁵Ta ni ri ra Herodes ña nañihí ra ni noo cuatyí ra. Yucuan chaha sandichí ra chi ra inga chaha nu nyai. Nyehe ndo vatyí ñahri cha sacuví ra, ñahri cuatyí ra. Ta ña tahán chi cha cúvi ra. ¹⁶Yucuan chaha cua tachi tuñi ri chi ra. Yaha cuan ta sañe chi ra —catyí ra Pilato.

¹⁷Tyicuan caa catyí ra Pilato vatyí cha ni ri ca cha iyó vico cuan, tahán chi cha saña ra noo ra ñohó vehe caa, tari cuhva cha tuhva maa ra. ¹⁸Soco tandihí ñu iin ri nacanachaa ñu, ta catyí ñu:

—Cahñi chi ra Jesús. Ta saña chi ra Barrabás —catyí ñu.

¹⁹Ta ra Barrabás cuan ñohó ra vehe caa cha cuenda cha cuñi ra nacanda ra siqui ra cuví tyiño. Ta siin ri chahñi ra chi ñáyivi. ²⁰Ta ra Pilato cuñi ra saña ra chi ra Jesús. Ta quichaha catyí ra chi ñáyivi cuan inga chaha vatyí cusaña ra chi ra. ²¹Soco ñáyivi chaa ca caná chaa ñu, ta catyí ñu:

—Na cúvi ra nu cruzi.

²²Tyicuan ta cha cu uñi chaha catyí ra Pilato chi ñu:

—Soco iñáá cha ña vaha sacuvi ra ihya? Nyehe tyi ña tahán chi cúvi ra. Tacuhva cutachi tuñi ri chi ra, ta sañe chi ra —catyí ra Pilato.

²³Soco ñáyivi caná chaa ca ñu, ta catyí ñu vatyí tyaa ra chi ra nu cruzi. Ta cuví chasaha ñu. Vatyí maa ñu ta ra cacuví nuu chi tata

sutu caná chaa ñu. ²⁴Tyicuan ta sacuvi ra Pilato tari cuhva catyí ñu. ²⁵Ta tari cuhva catyí ñáyivi, saña ra chi ra Barrabás cha ñohó vehe caa cha cuenda cha cuñí ra nacanda ra siqui ra cuví tyiño ta cha cuenda cha chahñi ra. Ta sacuvi ra chi ra Jesús tari cuhva catyí ñu.

Nu cua cunyaa ra Jesús nu cruzi
(Mt. 27.32-44; Mr. 15.21-32; Jn. 19.17-27)

²⁶Yucuan ta quehen sindaro chi ra Jesús. Ta cuahan ra chihin ra. Ta catiñ tucu ra chi noo ra Cirene cha nañí Simón. Ra cuan ni cua ndichi ra cha chahan ra nu chiqui. Ta saniñi sindaro chi ra, na cuiso ra cruzi ra Jesús ta cuahan ra chata ra.

²⁷Ta cuaha xaan ñáyivi cuahan chata ra. Ta cuaha xaan ñusihi chacú chaa ñu cha cuihya iñi ñu cha catyí ra. ²⁸Soco ra Jesús nanyehé ra chi ñu. Ta quichaha catyí ra chi ñu:

—Tandihi nyoho ñusihi ñuu Jerusalén, ma cuacu ndo cha catyí yuhu. Cuacu ndo, soco cha catyí maa ndo ta cha catyí sehe ndo.

²⁹Vatyí cuquichi quivi nu cunyehe xaan ndo tundoho. Ta cucahan ñáyivi chihin tandihi ndo cha cuví ndo ñusihi cha yori sehe ndo iyó. Ta cucatyí ñu chi ndo: “Vaha xaan vatyí yori sehe ndo iyó vatyí cuaha xaan tundoho nyehé yo vityin”, cucatyí ñu chi ndo. ³⁰Vatyí quivi cuan cucuñí ñu vatyí na canacoyo yucu siqui ñu tacuhva sahvi chí chi ñu. ³¹Vatyí tatu tyehe caa sacuvi ñu chihin yuhu cha ñahri cuatyí. Yaha ca cuhva cunyacuvi tucu ñu chihin maa ndo cha iyó cuatyí ndo —catyí ra Jesús.

³²Ta quehen tucu sindaro cuan chi uvi tahan ra quiñi iyó, vatyí cahñi ra chi ra iñ ri chihin ra Jesús. ³³Tyicuan ta cachaa ra noo nu nañi Nu Cuví Yiqui Xiñi Ndiyí. Ta yucuan chicatacaa ra chi ra Jesús nu cruzi. Ta tyicuan caa tucu chinyacuvi ra chihin ninduvi tahan ra iyó cuatyí cuan. Noo ra chitacaá ra nuu cruzi chiyo vaha ra Jesús. Ta nonga ra cuan chitacaá ra nuu cruzi chiyo satyin ra. ³⁴Ta cuhva cha tacaá ra Jesús nu cruzi cuan, quichaha catyí ra:

—Sutu Mañi yuhu, saha tucahnu iñi chi ra. Vatyí ña chitó ra ñáá cha nyacuví ra chihin —catyí ra.

Tyicuan ta sindaro cuan chahan ra noo sihva chihin sahma ra Jesús. Nya ra saha ganaa caquehen ra sahma cuan. ³⁵Ta ñáyivi tayucú ñu nyehé ñu. Ta nyacua nya ra cacuví nuu cuenda vehe ñuhu, ta chacú cuehe ra nyehé ra chi ra Jesús. Ta catyí ra:

—Sacacu ra chi inga ñáyivi. Soco vityin na sacacu tucu ra chi maa ra, tatu ndicha cha Cristo, ra cha saquichi Nyoo, cuví ra —cacatyí ra.

³⁶Ta suri cahán cuehe tucu sindaro chi ra. Ta catuhva ra chi ra. Ta chaha ra vinu iya coho ra. ³⁷Ta quichaha cacatyí ra chi ra:

—Tatu rey cuenda ñáyivi Israel cuvún. Sacacu chuun —cacatyí ra.

³⁸Ta siqui cruzi ityi xiñi ra nyaá noo nu tyaa ra chihin griego, chihin latín, ta chihin hebreo. Tyehe caa quita cahán letra cuan: “Ican ra ihya cuví Rey cuenda ñu ñuu Israel” —catyí nu vitu cuan.

³⁹Ta noo ra quiñi iyó cha tacaá xiin ra Jesús, quichaha cahan ra chihin ra, ta catyí ra:

—Tatu ndicha cha Cristo cuvún, sacacu chuun. Ta sacacu chi ndi ñandíhi —catyí ra.

⁴⁰Soco inga ra cuan catyí ra chi ra:

—¿Atu ña yuhvún chi Nyoo? Vatyí nyehún suri tundoho cha nyehé maa ra vityin. ⁴¹Maa yo nyehé yo tundoho ihya vatyí iyó cuatyí yo. Soco ra ihya ñahri cuatyí ra iyó —catyí ra.

⁴²Tyicuan ta quichaha catyí ra chi ra Jesús:

—Yoho Jesús, ñicohon iñun tuhin quivi cunyaca ñahun —catyí ra.

⁴³Tyicuan ta ra Jesús catyí ra chi ra:

—Cha ndicha catyí chuun vatyí tañi ri vityin ta cunyaun chihin nya paraíso nu nyaá ñanima ñu chinó iñi chi Nyoo —catyí ra Jesús chi ra.

Nu chihí ra Jesús

(Mt. 27.45-56; Mr. 15.33-41; Jn. 19.28-30)

⁴⁴Tyicuan ta ñáá cuhva ora quichaha nduñaa ñayivi, nyacua nya caa uñi cha cha iñi. ⁴⁵Vatyí nduñaa ñanyii. Ta sahma cha tacaá chichi vehe ñuhu cahnu cuan, tahnya sava.

⁴⁶Tyicuan ta quichaha cana chaa ra Jesús:

—Sutu Mañi yuhu, natyaí ñanime chichi ndahun —catyí ra.

Ta cuhva cha catyí ra tuhun ihya, ta chihí ra.

⁴⁷Ta ra cuví nuu chi sindaro cuan, nyehe ra tandíhi cha cuví cuan. Ta sacahnú ra chi Nyoo, ta catyí ra:

—Ñahri ndicha cuii cuatyí ra iyó —catyí ra.

⁴⁸Ta tandíhi ñayivi cha canyicú yucuan canyehe ñu cha cuví cuan.

Ta cuahan coyo ñu ta suri cacañí ñu ndaha ñu yiqui nyica ñu.

Vatyí chitó ñu vatyí ña vaha cha chinyacuví ñu chihin ra Jesús. ⁴⁹Ta tandíhi ñu cha ñohó nuu chi ra Jesús, ta ñusihi cha chinyicoñ chi ra nya Galilea, canyicú ñu nya sava ri. Ta nyehe ñu tandíhi cha cuví yucuan.

Nu cua cuchí ra chí ra Jesús

(Mt. 27.57-61; Mr. 15.42-47; Jn. 19.38-42)

⁵⁰Ta iyó noo ra vaha, nañi ra José.

Ta Arimatea ityi Judea cuví ñuu ra.

Ta cuví ra noo ra cuví nuu cuenda Junta Cahnu ñu Israel. ⁵¹Ta ra José

cuan nyatú ra quivi cha cunyaca ñaha Nyoo. Ta ña ndoo ra vaha chihin cha sacuví ra tahan ra, ra cacuví nuu cuenda tata sutu cuan.

⁵²Tyicuan ta chahan ra chicacan ra coño ñuhu ra Jesús chi ra Pilato.

⁵³Ta yahá cha sanoq ra José cuan coño ñuhu ra Jesús nu cruzi, ta natyihí ra chichi noo sahma cha cuví lino. Ta cuahan ra cua cuchí ra chí ra chichi noo ñaña chaa cha cuví yavi yuu cha savahá ñu. ⁵⁴Ta viarni cuví, quivi cha sanduvahá ñayivi cha cachi ñu cha sabaru inga quivi, quivi nyitatu ñu. Ta cha cuñí cuví sabaru.

⁵⁵Ta tandíhi ñusihi cha quichi chihin ra Jesús nya Galilea, cuahan ñu chata ra. Ta nyehe ñu chichi yavi yuu cuan. Ta nyehe ñu yoso caa chicava coño ñuhu ra. ⁵⁶Ta cuanuhu coyo ñu nya vehe ñu. Ta sanduvahá ñu ndutya vixi chahán vatyí cutyihí ñu coño ñuhu ra Jesús coto coo xico. Vatyí tyicuan caa cuví costumbre cuiya cuan. Tyicuan ta nyitatu ñu inga quivi cuan tari

cuhva catyí maa tuhun cha tachí Nyoo chi yo.

Nu nandoto ra Jesús

(Mt. 28.1-10; Mr. 16.1-8; Jn. 20.1-10)

24 Cundichin timingu quivi nu quichaha vitya. Ta ñaha cuiri cuahan coyo ñusihi cuan nya nu ñaña ra Jesús. Ta nyisó ñu ndutya vixi chahán cha sanduvaha ñu. ²Ta cuhva cha cha coyo ñu, nanyehe ñu vatyí ña nyasí ca yavi yuu cuan tari cuhva chinyasí maa. ³Ta quihví ñu chichi, soco ña nañihí ñu coño ñuhu Sutu Mañi yo Jesús. ⁴Ta yucuan tayucú ñu chihin cha yuhví ñu. Ta ña chitó ñu ñáá cunyacuvi ñu. Ta tuví uvi tahan rayí nuu ñu. Ta xiño vavaha sahma cañihnó ra. ⁵Ta chihin cha yuhví ñu, ta chicuñi chiti ñu chihin nuu ñu nya nu ñuhú. Tyicuan ta quichaha cacatyí ra cuan chi ñu: —¿Ñáá tuhun nanducú ndo chi ra Jesús ihya nu ñohó ndiyi? ⁶Yori ra ñohó ihya, vatyí cha nandoto ra. Nícohon iñi ndo tuhun cha cahán ra chihin ndo quivi chicá noo ra Galilea. ⁷Catyí ra vatyí tahán chi cucuhva cuenda ñu chi ra ndaha ra iyó cuatyí. Vatyí cuví ra Rayí cha quichi nya gloria. Ta tahán chi cucahñi ra chi ra nu cruzi. Soco nu cu uñi quivi cunandoto ra. Tyicuan caa catyí ra chi ndo —catyí ángel cuan chi ñu.

⁸Tyicuan ta nichohon iñi ñu tuhun cahán ra Jesús quivi cuan. ⁹Ta cuanuhu coyo ñu. Ta nacatyí ñu chi ndi uchi iin tahan ra apóstol ra Jesús chihin tandihí ca ñáyivi. ¹⁰Ta ñu sacoto tuhun cuan chi ra cuan cuví ñu cu María, ñaha Magdala,

ta cu Juana, ta cu María sihi ra Jacobo, ta suhva ca ñusihi. ¹¹Soco ra cachicá noo chihin ra Jesús cuñí maa ra vatyí cahán ri maa ñu. Ta ña chinó iñi ra tuhun cahán ñu.

¹²Soco ra Pedro nducuita ra ta chino vavaha ra cuahan ra cuanyehe ra nya chichi ñaña ra Jesús tatu ndicha. Ta nanyehe ra chichi yavi yuu cuan tyi sahma ri cayucú inchiyo xiin. Tyicuan ta cuanuhu ra nya vehe. Ta iyo cuñí ra vatyí ñahri ca coño ñuhu ra Jesús catuví chichi ñaña cuan.

Noo cha cuví ityi Emaús

(Mr. 16.12-13)

¹³Suri maa quivi cuan, uvi tahan ra chicá noo chihin ra Jesús cuahan coyo ra nya ñuu cha nañí Emaús, tari noo cha uchi iin kilómetro cha quita yo Jerusalén. ¹⁴Ta cuahan coyo ra ta ndatuhún ra tuhun ñáá ndihí cha cuví. ¹⁵Ta cha ni ri ca cha candatuhún ra, ta ra Jesús natahan ra chi ra nu cuahan coyo ra. ¹⁶Soco ni ri maa nyehé ra chi ra Jesús, ña canicohon nuu ra chi ra. Vatyí tari cha iyó noo cha chasi nuu ra tacuhva cha ma canicohon nuu ra chi ra Jesús. ¹⁷Tyicuan ta quichaha ndaca tuhun ra Jesús chi ra:

—¿Ñáá tuhun ndatuhún xaan ndo? ¿Ñáá tuhun cha cuihya xaan iñi ndo? —catyí ra chi ra.

¹⁸Ta ra cha nañí Cleofas, nacahan ra. Ta catyí ra:

—¿Atu ñima nya Jerusalén quichi yoho? ¿Atu ra inga ñuu cuvún? ¿Atu ña chitón cha cuví ñuu cuan? —catyí ra.

¹⁹Tyicuan ta catyí ra Jesús chi ra: —¿Ñáá cha cuví?

Ta quichaha canacatyí ra chi ra:
 —Tuhun ra Jesús ra ñuu Nazaret.
 Vatyí cuví ra noo ra profeta Nyoo.
 Ta chihin tunyee iñi cahnu Nyoo
 sacuví ra cha vaha nuu Nyoo ta nuu
 ñáyivi. ²⁰Soco ra cacuví nuu chi
 tata sutu ta ra cacuví nuu cuenda
 vehe ñuhu, nacuhva cuenda ra
 chi ra chi sindaro ñuu Roma. Ta
 cachahñi ra chi ra. Ta chihí ra nu
 cruzi. ²¹Ta cha vityin cha iyó uñi
 quívi cuví tuhun cuan. Ta nyuhu
 cuñí maa ndi vatyí ican ra cuví ra
 cusacacu chi ñáyivi Israel. ²²Soco
 vityin iyo xaan cuñí ndi cha nacatyí
 suhva ñusihí chi ndi. Vatyí maa
 ñu, ñaha cuii ri chahan coyo ñu
 nu ñaña ra. ²³Ta nacatyí ñu chi
 ndi vatyí ñahri ca coño ñuhu ra
 catuví. Ta nacatyí ñu vatyí nyehe
 ñu uvi tahan ángel. Ta catyí ángel
 cuan chi ñu vatyí ra Jesús nyitó
 ra. ²⁴Yaha cuan ta chahan coyo
 tucu suhva ra tahan ndi nu ñaña.
 Ta nyehe ra vatyí cha ndicha cuví
 tari cuhva catyí ñusihí cuan. Vatyí
 ñahri ca coño ñuhu ra Jesús catuví
 —catyí ra chi ra.

²⁵Tyicuan ta ra Jesús catyí ra chi
 ra:

—Chiin xaan cutuñí iñi ndo. Ta
 cuee xaan chinó iñi ndo tuhun tyaa
 ra profeta Nyoo ta cha naha. ²⁶¿Atu
 ña chitó ndo vatyí tahán chi cha
 cunyehe xihna ra Cristo tundoho?
 Yaha cuan ta tahán chi cuñihi ra
 tyiño cha cunyaca ñaha ra —catyí
 ra Jesús chi ra.

²⁷Tyicuan ta quichaha nacuhva
 ra cuenda yoso caa cuahan tuhun
 ra nu tutu Nyoo. Ta quichaha
 cahan ra tuhun cha tyaa ra Moisés
 ta cha naha. Ta yaha cuan ta

cahan ra tuhun tandihí libru cha
 tyaa ra profeta Nyoo.

²⁸Ta cuhva cha chaa ra nya ñuu
 Emaús cuan nu cuahan coyo ra, ta
 saha ra Jesús vatyí cañi ca cuahan
 ra. ²⁹Tyicuan ta cacatyí ra chi ra na
 ndoo ra chihin ra. Ta catyí ra:

—Ndoo chihin ndi vatyí cha cua
 quee ñanyii —cacatyí ra.

Tyicuan ta cuahan ra Jesús
 nya vehe ninduvi ra cuan. ³⁰Ta
 cuhva cha chicunyaá ra yuhu
 mesa chihin ra, quehen ra pan. Ta
 chaha ra tyahvi nyoo chi Nyoo. Ta
 chahnu sava ra, ta chaha ra chi
 ra. ³¹Ta caa cuhva ri cuan nuña
 nuu ra canicohon nuu ra chi ra
 Jesús. Soco ra Jesús cuanaa ri ra.
³²Tyicuan ta quichaha catyí ra chi
 ra tahan ra:

—Yucuan chaha vaha xaan cuñí
 ánima yo cuhva cha vachi ra chihin
 yo, ta nacatyí vaha ra yoso caa
 cuahan tuhun Nyoo cha nyaa nu
 tutu chi yo, ta nicohon nuu yo chi
 ra —cacatyí ra.

³³Ñahri ca cha canyatú ra, ta
 cuanuhu coyo ra nya Jerusalén.
 Ta yucuan nañihí ra chi ndi
 uchi iin ra chicá noo chihin ra
 Jesús, canyicú ra. ³⁴Tyicuan ta
 quichaha canacatyí ndi uchi iin
 tahan ra chi ra cha nichaa coyo
 cuan:

—Ndicha vatyí Sutu Mañi yo,
 nandotó ra. Vatyí ra Simón nyehe
 ra chi ra —cacatyí ra.

³⁵Tyicuan ta ra cha ni nachaa
 coyo cuan canacatyí tucu ra yoso
 caa ndatuhun ra Jesús chihin ra ityi
 cuahan ra ñuu Emaús, ta yoso caa
 canicohon nuu ra chi ra nu chahnu
 ra pan.

**Nu tuvi ra Jesús nu canyicu ra
cachicá noo chihin ra**

(Mt. 28.16-20; Mr. 16.14-18; Jn. 20.19-23)

³⁶Ni cahán ca ra tuhun cuan ta tuvi ra Jesús nu canyicú ra. Ta chahá ra nocumi, ta catyí ra:

—Na coo cha taxi ri añima ndo.

³⁷Tyicuan ta canayuhví xaan ra. Ta cacuñí maa ra vatyí noo tatyí ri cuví. ³⁸Tyicuan ta catyí ra Jesús chi ra:

—¿Ñáá tuhun cha nayuhvi ndo?

¿Ñáá tuhun cha chicá uvi iñi ndo?

³⁹Nyehe ndo ndahi. Ta nyehe ndo chahi. Vatyí suri mai cuví. Tiiñ ndo chii ta coto ndo. Vatyí tatyí, ñahri coño ñuhu. Ta ñahri yiqui tari cha nyehé ndo tyi yihí chi yuhu —catyí ra Jesús.

⁴⁰Ta cuhva cha catyí ra tuhun ihya, sañahá ra ndaha ra ta chaha ra. ⁴¹Soco maa ra chaha cha iyo cacuñí ra ta sii cacuñí ra nyacua ña chinó vaha iñi ra. Tyicuan ta catyí ra Jesús chi ra:

—¿Atu iyo cha cachi? —catyí ra.

⁴²Tyicuan ta chahá ra chiin yuhu tiyaca tyihyo chihin tyañuñu chi ra. ⁴³Ta quehen ra. Ta quichaha chachi ra. ⁴⁴Ta catyí ra chi ra:

—Tandihí cha cuví chii, ican ihya cuví cha catyí chi ndo quiví cuan. Ta catyí chi ndo vatyí tyicuan caa cucuvi, tari cuhva nyaá tuhun cha tyaa ra Moisés ta

ra profeta Nyoo ta cha nyaá nu libru salmo —catyí ra chi ra.

⁴⁵Tyicuan ta chahá ra Jesús vatyí na cutuñi iñi tandihí ra cuan yoso caa catyí nu tutu Nyoo. ⁴⁶Tyicuan ta catyí ra Jesús chi ra vatyí tyicuan caa nyaá nu tutu Nyoo vatyí tahán chi cha cúvi ra Cristo. Ta nu cu uñi quiví nandoto ra. ⁴⁷Ta tahán chi coto ñáyivi tuhun sivi ra Cristo ñuu Jerusalén, ta yaha cuan ta tandihí ñuu nicahnu ñuhu ñayivi. Tacuhva cuvi ndu uvi iñi ñu ta ndachi cuatyí ñu.

⁴⁸—Ta nyoho cuví ndo cha ndaa tandihí tuhun ihya. ⁴⁹Ta cusaquichi mai Tatyí Ii Nyoo siqui ndo tari catyí Suti tyi cuhva ra chi ndo. Soco cunyicu ndo Jerusalén ihya. Ta ma quita maa ndo nyacua nya quichi tunyee iñi Tatyí Ii Nyoo cuquihi chi ndo —catyí ra Jesús.

Nu nandaq xica ra Jesús andivi

(Mr. 16.19-20)

⁵⁰Tyicuan ta ra Jesús cuahan ra chihin tandihí ra cachicá noo chihin ra ityi chata ñuu, nya ñuu Betania. Ta sandaa ra ndaha ra. Ta nasoco ra chi ra. ⁵¹Ta cha ni ri ca cha nasoco ra chi ra, nandaq xica ra andivi. ⁵²Tyicuan ta tandihí ra sacahnú xaan ra chi ra. Ta sii xaan cacuví chi ra, cuanuhu coyo ra Jerusalén. ⁵³Ta tyicuan ri chinyicú ra chichi vehe ñuhu cahnu cuan, ta sacahnú xaan ra chi Nyoo.